

उत्पत्ति

संसार क उत्पत्ति पहिला दिन उजियारा

1 सुरु में परमेस्सर अकास अउ भुइँया क रचेस। 2 भुइँया सुनसान रही; अउ भुइँयाँ प कछू भी नाहीं रहा। समुद्दर प अँधियारा छावा रहा, अउ परमेस्सर क आत्मा पानी प मँडरात रहा। 3 तब परमेस्सर कहेस, “उजियारा होइ” अउ उजियारा होइ गवा। 4 परमेस्सर उजियारा क लखेस अउ उ जानि गवा कि इ नीक बाटइ। तबहिँ उ उजियारा का अँधियारा से अलग कई दिहेस। 5 परमेस्सर उजियारा क नाउँ “दिन” अउ अँधियारा क नाउँ “रात” दिहेस।

साँझ भइ अउ भिन्सार भवा। इ पहिला दिन रहा।

दूसर दिन-अकास

6 तब परमेस्सर कहेस, “पानी क एक ढेर क दूसर ढेर स अलगावइ बरे वायुमण्डल* होइ जाइ।” 7 एँह बरे परमेस्सर वायुमण्डल क बनएस अउ पानी क अलग किहेस। कछू पानी वायुमण्डल क ऊपर रहा अउ कछू वायुमण्डल क नीचे। 8 परमेस्सर वायुमण्डल क “अकास” कहेस। तब साँझ भइ अउ भिन्सार भवा। इ दूसर दिन रहा।

तीसर दिन-झुरान भुइँया अउ पेड़-पौधा

9 अउर तब परमेस्सर कहेस, “भुइँया क पानी एक ठउरे प बटुर जाइ जेहसे झुरान भुइँया देखाइ देइ” अउ अइसा ही भवा। 10 परमेस्सर झुरान भुइँया क नाउँ “धरती” धरेस अउ जउन पानी बटुरा रहा, ओका “समुद्दर” क नाउँ दिहेस। परमेस्सर लखेस कि इ नीक अहइ।

11 तब परमेस्सर कहेस, “भुइँया, घास अउ पौधा जउन अन्न पइदा करत हीं अउर फलन क बिरवा उगावइ। फलन क बिरवा जेकरे फलन क भीतर बिया होइ अइसा फल पइदा करइँ अउ हर एक तु पौधा आपन जाति क बिया बनावइ। इ पौधन क भुइँयाँ प निकरइ द्या।” अउ अइसा ही भवा। 12 भुइँयाँ घास अउ पौधा पइदा किहेस जउन अनाज पइदा करत हीं अउ अइसा बिरवा अउ पौधा उगाएस जेनके फलन क भीतर बिया होत हीं। हर एक तु पौधा आपन आपन जाति क मुताबिक बिया पइदा किहेस अउ परमेस्सर लखेस कि इ नीक अहइ। 13 तब साँझ भइ अउ भिन्सार भवा। इ तीसर दिन रहा।

चउथा दिन-सूरज, चाँद अउ तारा

14 तब परमेस्सर कहेस, “अकास में जोतियन होइ द्या। इ

जोतियन दिन क रात स अलगाइ देइ। इ जोतियन खास त्यौहार क दिनन क अवइ अउर दिन अउ रात होइ एँकरे बरे में एक चीन्हा होब्या। 15 इ जोतियन भुइँयाँ प प्रकास देइ बरे अकासे में ठहारि जाइँ।” अउर अइसा ही भवा।

16 तब परमेस्सर दुइ बड़की जोतियन बनएस। परमेस्सर ओहमाँ स बड़की जोति क दिन प राज करइ बरे बनएस अउ छोटकी जोति क राति प राज करइ खातिर बनएस। परमेस्सर तारा भी बनएस। 17 परमेस्सर इ जोतियन क अकासे में एँह बरे धरेस कि पृथ्वी पइ चमकइ। 18 परमेस्सर इ जोतियन क अकासे में एँह बरे धरेस कि उ दिन अउ राति प राज करइ। इ सबइ जोतियन उजियारा क अँधियारा स अलगाइ दिहन अउ परमेस्सर इ लखेस कि इ नीक बा।

19 तब साँझ भइ अउ भिन्सार भवा। इ चउथा दिन रहा।

पँचवा दिन-मछरियन अउ पंछिन

20 तबहीं परमेस्सर कहेस, “पानी बहोत सारी जीव जन्तूअन स भरि जाइ अउ पंछी भुइँयाँ क ऊपर वायु में बिचरइँ।” 21 एँह बरे परमेस्सर समुद्दर में बड़वार बड़वार जलजन्तु बनएस। परमेस्सर ओन सबहिँ परानियन क बनएस जउन समुद्दर में बिचरत हीं। सागर में किसिम किसिम क जलजन्तु बाटेन। परमेस्सर इ सबन क रचना किहेस। परमेस्सर हर तरह क पंछी भी बनएस जउन अकासे में उड़त हीं। परमेस्सर लखेस कि इ नीक अहइ।

22 परमेस्सर इ जनावरन क आसीर्बाद दिहेस, अउ कहेस, “जा अउ बहोत स बच्चन क पइदा करा अउ सागरे क आपन सन्तानन स भरि द्या।” उ पंछी क भी कहेस कि आपन सन्तानन क कइ गुना बढ़ावा।

23 तब साँझ भइ अउ भोर भवा। इ पँचवा दिन रहा।

छठाँ दिन-भुइँया क जीव जन्तु अउ मनई

24 तब परमेस्सर कहेस, “भुइँया हर जाति क जीव जन्तु पइदा करइ। बहोत स अलग अलग जाति क जनावर होइँ। हर जाति क बड़का जनावर अउ नान्ह नान्ह रेंगइवाला जनावर होइँ अउ इ जनावर आपन जाति क मुताबिक अउर जनावर बनावइँ” अउ इहइ सब भवा।

25 तउ, परमेस्सर हर जाति क जनावर बनएस। उ जंगली जनावर, पालतू जनावर, अउ सबहिँ नान्ह नान्ह रेंगइवाला जीउ बनाएस अउर परमेस्सर लखेस कि इ नीक अहइ।

26 तब परमेस्सर कहेस, “अब मनई क आपन सरुप अउर आपन जइसा बनाएँ मनई हमरी तरह होइ। उ सागर क सब मछरियन प अकासे क पंछियन प राज करी। उ भुइँया क

वायुमण्डल हिब्रू भाखा में एकर अरथ अहइ “फइलाव” या “मण्डल।”

सब बड़वार जनावरन अउ सब नान्ह रेगंडवालन जीउ प राज करी।”

27^{एह} बरे परमेस्सर मनई क आपन सरुप में बनएस। परमेस्सर मनई क आपन ही सरुप में सिरजेस। परमेस्सर ओनकइ नर अउ नारी बनाएस। 28^{परमेस्सर} ओनका असीसेस। परमेस्सर ओनसे कहेस, “बहोत सारे संतानन पइदा करा, नसलन क बढ़ावा अउर भुइँया क भरि दया। भुइँया पइ कब्जा कर ल्या। अउ ओह प राज करा। सागर क मछरियन प अउ अकासे क पंछिन प राज करा। भुइँया क हर जीउ-जन्तु प राज करा।”

29^{परमेस्सर} कहेस, “लखा, मई तू पवन क सब किसिम क बिआदार बृच्छ पौधा अउ सारा फलदार बृच्छ दिहेउँ ह। इ सबइ अन्न अउ फल तोहार भोजन होइ। 30^{मई} हर एक ठु हरिअर पेड़ पौधा गोरु बरे देत अहउँ। इ सबइ हरिअर बृच्छ पौधा ओनकइ चारा होइ। भुइँया क हर एक ठु जनावर, अकासे क हर एक पंछी अउ भुइँया प रेगंडवाला सब जीउ जन्तु इ चारा क खइहीं।” इ सबइ बातन भईन।

31^{परमेस्सर} अपने जरिये हर एक ठु चीज लखेस जेका उ बनाएस रहा। अउ उ निहारेस कि हर चीज बहोतइ नीक बाटइ। साँझ भइ अउ भोर भवा। इ छठवाँ दिन रहा।

सतवाँ दिन-आराम

2 इ तरह धरती, अकास अउ ओकर हर एक चीज क रचब पूर होइ गवा। 2^{परमेस्सर} आपन कीन्ह जात काम क पूरा कइ लिहेस। एह बरे सतएँ दिन परमेस्सर अपने काम में आराम किहेस। 3^{परमेस्सर} सतएँ दिन क असीसेस अउ ओका पवित्र दिन बनइ दिहेस। परमेस्सर उ दिना क पवित्र दिन एह बरे बनएस कि संसार क बनवत समइ जउन उ काम करत रहा उ सबहिं कामे स उ दिन उ आराम किहेस।

मनई जाति क सुरुआत

4^इ धरती अउ अकास क इतिहास अहइ। इ कथा उ चिजियन क अहइ, जउन परमेस्सर क जरिये धरती अउ अकास बनवत टेम प भइन। 5^{तब} धरती प कउनो बृच्छ पौधा नाहीं रहा। अउ खेतन में कछू भी नाहीं उगत रहा। काहेकि यहोवा तब तलक धरती प बरखा नाहीं पठए रहा अउ बृच्छ पौधन क देखइ भालइ वाला कउनो मनई भी नाहीं रहा। 6^{मुला} कुहिरा भुइँया स उठत रहा अउ पानी समूचइ धरती क सींचत रहा।

7^{तब} यहोवा परमेस्सर भुइँया स धूरि उठाएस अउ मनई क बनएस। यहोवा मनई क नाके में जिन्नगी क साँस फूँकैस अउ मनई एक ठु जिअत परानी बन गवा। 8^{फुन} यहोवा परमेस्सर पूरब में अदन नाउँ क ठउरे में एक बाग लगाएस। यहोवा परमेस्सर आपन बनावा भवा मनई क इहइ बगिया में राखेस। 9^{यहोवा} परमेस्सर हर एक सुन्नर बृच्छ अउ खइया बरे सबहिं किसिम क नीक बृच्छ क उ बगिया में उगाएस। बगिया क बीचउ बीच यहोवा परमेस्सर जिन्नगी क बृच्छ क धरेस अउ उ बृच्छ क भी राखेस जउन अच्छाई अउ बुराई क जानकारी देत रहा।

10^{अदन} स होइके एक ठु नदी बहत रही अउ उ बाग क सींचत रही। उ हुवाँ स अगवा जाइके चार ठु नान्ह नान्ह धारा में बदल गइ रही। 11^{पहिली} नदी क नाउँ पीसोन रहा। इ नदी हवीला पहँटा क चारिहुँ कइँती बहत रही। 12^उ पहँटा में सोना अहइ अउ उ सोना नीक बाटइ। मोती अउर गोमेदक रतन उ पहँटा में अहइँ। 13^{सूसरी} नदी क नाउँ गीहोन अहइ जउन इथोपिया देस क चारो तरफ बहत ह। 14^{तीसरी} नदी क नाउँ दजला बा। इ नदी अस्सूर क पूरब में बहत ह। चउथी नदी फरात अहइ।

15^{यहोवा} परमेस्सर मनई क अदन क बाग में रखेस। मनई क काम पेड़-पौधा लगाउब अउ बगिया क रखवारी करब रहा। 16^{यहोवा} परमेस्सर मनई क हुकुम दिहेस। यहोवा परमेस्सर कहेस, “तू बगिया क कउनो भी बृच्छ स फल खाइ सकत ह। 17^{मुला} तू नीक अउ खोट क गियान देइवाला बृच्छ क फल नाहीं चख सकत ह। अगर तू उ बृच्छ क फल खाइ लेब्या तउ तू मरि जाब्या।”

पहिली मेहरारु

18^{तब} यहोवा परमेस्सर कहेस, “मनई क अकेले रहब नीक नाहीं। मई ओकरे तरह एक मनई ओका मदद बरे बनउब।”

19^{यहोवा} परमेस्सर धरती क हर एक जनावर अउ अकासे क हर पंछी क भुइँया क माटी स बनएस। यहोवा परमेस्सर इ सबहिं जीउन क मनई क समन्वा लइ आवा अउ मनई हर एक क नाउँ राखेस। 20^{मनई} पालतू गोरु, अकासे क सब पंछिन अउ जंगल क सबहिं जनावर क नाउँ रखेस। मनई ढेर क जनावर अउ पंछिन क लखेस। मुला मनई कउनो अइसा मदद करइया नाहीं पाइ सका जउन ओकरे जोगग होइ। 21^{एह} बरे यहोवा परमेस्सर मनई क गहरी नदि में सुवाइ दिहेस अउ जब उ सोवत रहा; यहोवा परमेस्सर मनई क तन स एक पसुली निकारि लिहस। तब यहोवा मनई क चाम क बन्द कइ दिहस जहाँ स उ पसुली निकारे रहा। 22^{यहोवा} परमेस्सर मनई क पसुली स मेहरारु क बनएस। तब यहोवा परमेस्सर मेहरारु क मनई क लगे लिआवा। 23^{अउर} मनई कहेस,

“आखिर मैं! हमरे तरह एक मनई। ऐंकर हाइ मोरे हाइ मैं स आवा ऐंकर तन मोरे तन स आवा। काहेकि इ मनई स निकारी गइ, एह बरे मई ऐंका मेहरारु कहब।”

24^{इहइ} कारण स मनई आपन महतारी-बाप क तजिके आपन मेहरारु क संग रही अउ उ दुइनउँ एक तन होइ जइहीं। 25^{मनई} अउ ओकर मेहरारु बगिया में नंगा रहेन; मुला उ पचे लजात नाहीं रहेन।

पाप क सुरु होब

3 यहोवा परमेस्सर जउन जंगली जनावरन क बनएस ओहमों स सरप सबन त जिआदा होसियार अउर धोखेबाज रहा। उ मेहरारु क धोखा देइ चाहत रहा। सरप मेहरारु स कहेस, “हे मेसरारु! का फुरइ परमेस्सर तोहसे कहेस ह कि तू बगिया क कउनो फल जिन चख्या?”

2मेहरारु सरप स कहेस, “नाहीं परमेस्सर इ नाहीं कहेस। हम बगिया क पेड़े स फल खाइ सकित ह। 3मुला एक तु बृच्छ बाटइ जेकर फल हम पचे नाहीं खाइ सकित। परमेस्सर हम पचन स कहेस ह, ‘तोहका उ बृच्छ क फल नाहीं खाइ चाही जउन बगिया क बीच में बाटइ। तोहका उ बृच्छ क छुअइ तलक नाहीं चाहीं नाहीं तउ मरि जाब्या।”

4मुला सरप मेहरारु स कहेस, “तू मरिब्या नाहीं। 5परमेस्सर जानत ह कि तू पचे उ बृच्छ स फल खाब्या तउ नीक अउ बुरा क बारे में जानि लेब्या। अउर तब तू उहइ होब्या जइसे परमेस्सर अहइ।”

6फुन मेहरारु निहारेस कि बृच्छ सुनर बाटइ। उ लखेस कि फल खाइ बरे नीक बाटइ अउ उ बृच्छ ओका बुद्धिमती बनाइ। तउ बृच्छ स कछू फल तोड़ेस अउ खाएस भी। तब उ अपने भतार क कछू फल खाइ बरे दिहस जउन ओकरे संग रहा।

7तब ओनकइ अखियाँ खुलि गएन। दुइनउँ जानेन कि उ पचे नंगा बाटेन। उ दुइनउँ क लज्जा अनुभव भवा। तउ उ पचे अंजीरे क पत्ता लिहेन अउ ओका सिएन अउ आपन नंगापन क ढाँपि लिहेन।

8तब मनसेधू अउ मेहरारु साँझ क ठंडी बयार में यहोवा परमेस्सर क आवइ क अवाज बगिया में अनकेन। उ पचे बगिया में बृच्छन क बीच लुकाइ गएन। 9यहोवा परमेस्सर गोहराइके मनई स पूछेस, “तू कहाँ बाट्या?”

10मनई जवाब दिहेस, “मई तोहरे टहरइ क अवाज बगिया में सुनेउँ अउ मई डेराइ गएँ काहेकि मइ नंगा रहेउँ। एँह बरे मई लुकाइ गएँ।”

11यहोवा परमेस्सर मनई स पूछेस, “तोहका कउन बताएस ह कि तू नंगा धड़ंग अहा? तू कउने वजह स सरमाइ गया ह? का तू उ बिसेख बृच्छ क फल चख्या ह जेका मई तोहका न खाइ बरे हुकुम दिहेउँ ह?”

12तब मनई कहेस, “तू जउन मेहरारु मोरे बरे बनया ह उ उहइ बृच्छ स मोका फला दिहस ह, अउर मई ओका खाएँ ह।”

13फुन यहोवा परमेस्सर मेहरारु स कहेस, “इ तू का किह्या ह?” मेहरारु कहेस, “सरप मोका बगदाइ दिहस। उ मोका मूरख बनाएस अउर मई फल चखि लिहेउँ।”

14तब यहोवा परमेस्सर कीरा स कहेस, “तू इ बहोतइ बुरा किहा। एँह बरे तोहार बुरा ही होइ। दूसर जनावर क बनिस्वत तोहार बहोतइ बुरा होइ। तू आपन पेट क सहारा रेगंड बरे बेबस होब्या। अउर तू धूरि फाँकइ क बेबस होब्या जिन्नगी क सब दिन में।

15मई तोहका अउ मेहरारु क एक दूसरे क दुस्मन बनाउब। तोहार गदेलन अउ एँकर बच्चा आपस में दुस्मन होइहीं। तू एँनकइ गदेलन क गोड़े में डसब्या अउ उ तोहार मूँड कुचल देइहीं।”

16तब यहोवा परमेस्सर मेहरारु स कहेस, “मई तोहका गाभिन होइ क हालत में बहोतइ दुखी करब। अउर जब तू लरिका पइदा करिबिउ, तोहका बहोत जियादा पीरा होइ। तू आपन भतार क बहोतइ चहिबिउ, मुला उ तोह प प्रभुताई करी।”

17तब यहोवा परमेस्सर मनई स कहेस,

“मई हुकुम दिहेउँ रहे कि तू बिसेख बृच्छ क फल जिन खाया। मुला तू आपन मेहरारु क बात सुन्या अउर उ बृच्छ क फल खाया ह। एँह बरे मई तोहरे कारण इ भुईया क सराप देत हउँ आपन जिन्नगी क पूरे टेमें तलक उ भोजन बरे जउन धरती देत ह तोहका कठिन मेहनत करइ क पड़ी।

18मुला धरती तोहरे बरे काँटन अउर खर-पतवार पइदा करी। अउर तू ओन पौधन क खाब्या जउन खेत में उगत ह।

19तू आपन खइया बरे कठोर मेहनत करब्या। तू तब तलक मेहनत करब्या जब तलक माथा प पसीना न आवइ। तू तब तलक कठोर मेहनत करब्या जब तलक तोहार मउत न आइ जाइ। उ टेमें तू दूसरी दाई माटी बन जाब्या। जब मई तोहका बनए रह्यो, तबहिं तोहका माटी स बनए रह्यो अउर जब तू मरिब्या तब तू उहइ माटी में फुन मिलि जाब्या।”

20आदम आपन मेहरारु क नाउँ हव्वा राखेस, काहेकि सब मनइयन क उ आदि महतारी रही।

21यहोवा परमेस्सर मनई अउ ओकरे मेहरारु बरे जनावर क चाम स पोसाक बनाएस। तब यहोवा इ सबइ पोसाक ओनका दिहस।

22यहोवा परमेस्सर कहेस, “लखा, मनई हमरे जइसा होइ गवा अहइ। मनई अच्छाई अउ बुराई जानत ह अउर अब मनई जिन्नगी क बृच्छ स भी फल लइ सकत ह। अगर मनई उ फले क खाई तउ सदा ही जिअत रही।”

23तब यहोवा परमेस्सर मनई क अदन क बगिया तजइ बरे बेबस किहस। जउने माटी स आदम बना रहा उ भुईया प आदम क कठोर मेहनत करइ क पड़ी। 24परमेस्सर आदम क बाग स बाहेर खदेर दिहस। तब परमेस्सर करूब सरगदूतन क बगिया क फाटक क रखवारी बरे राखेस। उ एक आगी क तरवार भी राखेस। इ तरवार जिन्नगी क बृच्छ क राह क रखवारी करत भइ चारिहुँ कइँती चमकत रही।

पहिला परिवार

4 आदम अउ ओकर मेहरारु हव्वा क बीच में तने क रिस्ता भवा अउ हव्वा एक तु बच्चा जन्मेस। बच्चा क नाउँ काबील रखा गवा। हव्वा कहेस, “यहोवा क मदद स मई एक मनई पाएँ ह।”

2एँकरे पाछे हव्वा एक तु दूसर बच्चा क जन्मेस। इ लरिका काबील क भाई हाबिल रहा। हाबिल गडरिया बना। काबील किसान बना।

पहिला कतल

3-4फसिल क टेमें काबील एक तु भेंट यहोवा क लगे लइ आवा। जउन अनाज काबील आपन जमीन में उपजावत रहा, ओहमों स तनिक अन्न उ लइ आवा। मुला हाबिल आपन जनावरन क झुण्ड में स कछू जनावर लावा। हाबिल आपन सबन त नीक भेड़ी क सबन त बढ़िया हींसा लइ आवा। यहोवा हाबिल अउ ओकरी भेंट क अंगीकार

किहस। 5मुला यहोवा काबील अउ ओकरे जरिये लाइ गइ भेंट क अंगीकार नाहीं किहस। ओकर चेहरा उदास होइ गवा। 6यहोवा काबील स पूछेस, “तू काहे कोहान अहा? तोहार चेहरा काहे बहोत उदास भवा देखत बाटइ? 7अगर तू नीक काम करिब्या तउ तू मोरी निगाह में ठीक रहब्या। तब मई तोहका अपनाउब। मुला अगर तू उ काम नाहीं करिब्या जउन कि नीक अहइ तउ पाप तोहार दरवाजे पइ घात में रहब्या। इ तोहका तबाह करइ चाहत ह। मुला तोहका एँका आपन बस में रखइ चाही।”

8काबील आपन भाई हाबिल स कहेस, “आवा हम मैदान में चली।” एँह बरे काबील अउ हाबिल मैदान में गएन। तब काबील आपन भाई प हमला कइ दिहस अउ ओका मारि डाएस।

9पाछे यहोवा काबील स पूछेस, “तोहार भाई हाबिल कहाँ बा?”

काबील जवाब दिहस, “मोका नाहीं मालूम। का इ मोर काम अहइ कि मई आपन भाई क चउकसी अउ देखभाल करउँ?”

10तबइ यहोवा कहेस, “तू इ का किहा? तोहरे भाई क रकत जमीन स बोलत अहइ कि का होइ ग अहइ? 11तू आपन भाई क कतल किहा ह, भुईँया तोहरे हाथे स ओकर रकत लेइ बरे खुल गइ अहइ। एँह बरे तोहका अगिया नाही अहइ कि तू धरती स कउनो लाभ उठावा। 12बीता जमाना में तू फसल लगाया अउ उ अच्छी जामी। मुला अब तू बढ़िया फसल बोउब्या अउ जमीन तोहार अच्छी फसल होइ में मदद न करी। तोहका भुईँया प घर न मिली। तू जगह-जगह भटकत रहब्या।”

13तब काबील कहेस, “इ सजा ऐतनी जियादा अहइ कि मई सह नाहीं सकत हउँ। 14लखा, तू आज मोका धरती स तजि दिहस मई न तउ तोका देख पाउब अउर न ही तोर निकट रह पाउब। मोर घर नाहीं बा। मोका जगह-जगह भटकइ प बेबस कीन्ह जाई। अउर यदि कउनो मनई मोका पाइ तउ उ मोका मारि डाइ।”

15तब यहोवा काबील स कहेस, “मई इ नाहीं होइ देब। यदि कउनो तोहका मारी तउ मई उ मनई क बहोत कठोर सजा देब।” तब यहोवा काबील प एक चीन्हा बनाएस। इ चीन्हा उ बतावत रहा कि काबील क कउनो न मारइ।

काबील क परिवार

16तब काबील यहोवा क तजि क चला गवा। काबील नोद देस में रहइ लाग।

17काबील आपन मेहरारु क संग तने क रिस्ता किहस। उ गाभिन होइ गइ। उ हनोक नाउँ क बच्चा जन्म दिहस। काबील एक सहर बसाएस, अउर ओकर नाउँ आपन पूत क नाउं प हनोक ही राखेस। 18हनोक स ईराद पइदा भवा, ईराद स महूयाएल पइदा भवा, महूयाएल स मतूसाएल पइदा भवा अउर मतूसाएल स लेमेक पइदा भवा।

19लेमेक दुइ मेहरारु स बियाह किहस। एक मेहरारु क नाउँ आदा अउ दूसर क नाउँ सिल्ला रहा। 20आदा याबल क जन्मेस। याबाल ओन मनइयन क बाप रहा जउन तम्बू में

रहत रहेन अउ गोरु क पाल पोस क आपन गुजर बसर करत रहेन। 21आदा क दूसर पूत यूबाल भी रहा। यूबाल, याबाल क भाई रहा। यूबाल ओन मनइयन क बाप रहा जउन बीणा अउ बाँसुरी बजावत रहेन। 22सिल्ला तूबलकैन क जन्म दिहस। तूबलकैन ओन मनइयन क बाप रहा जउन काँसा अउ लोहा क पेसा करत रहेन। तूबलकैन क बहिन क नाउँ नामा रहा। 23लेमेक आपन मेहरारुअन स कहेस:

“ऐ आदा अउ सिल्ला मोरउ बात सुना। लेमेक क मेहरारुओ! जउन बतियन मई कहत हउँ, सुना। एक मनई मोका चोट पहुँचाएस, मई ओका मारि डालेउँ। एक जवान मोका चोट पहुँचाएस एँह बरे मई ओका मारि डाएउँ।”

24जदि काबील क कतल करइ क सजा सात गुना अहइ तउ लेमेक क कतल क सजा सतहत्तर गुना होब्या।”

आदम अउ हव्वा क नवा पूत पइदा भवा

25आदम अउ हव्वा क संग पुन तने क रिस्ता भवा अउ हव्वा एक ठु अउर बच्चा क जन्म दिहस। उ पचे इ लरिका क नाउँ सेत राखेन। हव्वा कहेस, “परमेस्सर मोका एक अउर पूत दिहस ह। काबील हाबिल क मारि डाएस मुला सेत अब मोरे लगे अहइ।” 26सेत क भी एक पूत रहा। एकर नाउँ एनोस रहा। उ टेमें लोगन यहोवा क आराधना करई लागेन।*

आदम क परिवारे क इतिहास

5 इ अध्याय में आदम क परिवार क बंसज क बारे में अहइ। परमेस्सर मनई क आपन सरुप में बनाएस। 2परमेस्सर ओनका नर अउर मादा बनाएस। जउन दिन ओनका बनाएस उहइ दिन उ ओनका असीसेस अउर ओनका नाउँ “आदम” राखेस।

3जब आदम एक सौ तीस बरिस क होइ गवा तब उ एक अउर बच्चा क बाप भवा। इ पूत ठीक आदम क तरह देखाइ देत रहा। अदम आपन पूत क नाउँ सेत राखेस। 4सेत क जन्म क पाछे आदम आठ सौ बरिस जिअत रहा। इ दिनन में आदम क दूसर बेटवन अउ बिटियन भइन। 5इ तरह आदम पूरा नौ सौ तीस बरिस जिअत रहा, तब उ मरा।

6जब सेत एक सौ पाँच बरिस क होइ गवा तब ओका एनोस नाउँ क पूत पइदा भवा। 7एनोस क जन्म क पाछे सेत आठ सौ सात बरिस जिअत रहा। इहइ सेत क दूसर बेटवन अउ बिटियन पइदा भइन। 8इ तरह सेत पूरा नौ सौ बारह बरिस जिअत रहा, तब उ मरा।

9एनोस जब नब्बे बरिस क भवा, ओका केनान नाउँ क पूत पइदा भवा। 10केनान क जन्म क पाछे एनोस आठ सौ पन्द्रह बरिस जिअत रहा। इ दिनन एकर दूसर बेटवन अउ बिटियन पइदा भइन। 11इ तरह एनोस पूरा नौ सौ पाँच बरिस जिअत रहा, तब उ मरा।

12जब केनान सत्तर बरिस क भवा, ओका महललेल नाउँ क पूत पइदा भवा। 13महललेल क जन्म क पाछे केनान आठ सौ चालीस बरिस जिअत रहा। इ दिनन केनान

उ टेमें ... लागेन इ सब्ब क अरथ अहइ यहोवा क गोहरावइ लागेन।

क दूसर बेटवन अउ बिटियन पइदा भइन। 14इ तरह केनान पूरा नौ सौ दस बरिस जिअत रहा, तब उ मरा।

15जब महललेल पैसठ बरिस क भवा, ओका येरेद नाउँ क पूत पइदा भवा। 16येरेद क जन्म क पाछे महललेल आठ सौ तीस बरिस जिअत रहा। इ दिनन में ओका दूसर बेटवन अउ बिटियन पइदा भइन। 17इ तरह महललेल पूरा आठ सौ पंचान्बे बरिस जिअत रहा। तब उ मरा।

18जब येरेद एक सौ बासठ बरिस क भवा तउ ओका हनोक नाउँ क पूत पइदा भवा। 19हनोक क जन्म क पाछे येरेद आठ सौ बरिस जिअत रहा। इ दिनन में ओका दूसर बेटवन अउ बिटियन पइदा भइन। 20इ तरह येरेद पूरा नौ सौ बासठ बरिस जिअत रहा, तब उ मरा।

21जब हनोक पैसठ बरिस क भवा, ओका मतूसेलह नाउँ क पूत पइदा भवा। 22मतूसेलह क जन्म क पाछे हनोक परमेस्सर क संग तीन सौ बरिस रहा। इ दिनन ओकर दूसर बेटवन अउ बिटियन पइदा भइन। 23इ तरह हनोक पूरा तीन सौ पैसठ बरिस जिअत रहा। 24एक दिना हनोक परमेस्सर क संग चलत* रहा अउ अछन्न होइ गवा काहेकि परमेस्सर उठाइ लिहस।

25जब मतूसेलह एक सौ सत्तासी बरिस क भवा, ओका लेमेक नाउँ क पूत पइदा भवा। 26लेमेक क जन्म क पाछे मतूसेलह सात सौ बयासी बरिस जिअत रहा। इ दिना ओकरे दूसर बेटवन अउ बिटियन पइदा भइन। 27इ तरह मतूसेलह पूरा नौ सौ ओनहत्तर बरिस जिअत रहा, तब उ मरा।

28जब लेमेक एक सौ ब्यासी बरिस क भवा, उ एक ठु पूत क बाप बना। 29लेमेक आपन पूत क नाउँ नूह धरेस। लेमेक कहेस, “हम किसान लोग कठोर मेहनत करित ह काहेकि परमेस्सर भुइँया क सरापे अहइ। मुला नूह हम पचन क अराम देब।”

30नूह क जन्म क पाछे, लेमेक पाँच सौ पंचान्बे बरिस जिअत रहा। इ दिनन ओकरे दूसर बेटवन अउ बिटियन पइदा भइन। 31इ तरह लेमेक पूरा सात सौ सतहत्तर बरिस जिअत रहा, तब उ मरा।

32जब नूह पाँच सौ बरिस क भवा, ओकरे सेम, हाम अउर येपत नाउँ क पूत पइदा भएन।

लोग पापी होइ गएन

6 भुइँया प मनइयन क गनती बाढ़इ लाग। इ मनइयन क बिटियन पइदा भइन। 2अब परमेस्सर क पूतन लखेन कि मनई क बिटियन सुन्नर अहइँ। एँह बरे परमेस्सर क पूतन आपन आपन इच्छा क मुताबिक जेसे चाहेन ओसे बियाह किहेन।

अतब यहोवा कहेस, “लोग सिरिफ मानव अहइ। मईँ हमेसा आपन आतिमा क इ सबन स दुःखी न होइ देब। मईँ ओनका एक सौ बीस बरिस क जिन्नगी देब।”

4ओन दिनन अउर ओकर पाछे भी हुआँ नेफिलिम लोग* उ धरती में रहत रहेन। जब परमेस्सर क पूतन मनइयन क बिटियन सादी किहेन तउ ओन स बच्चे पैदा

हनोक चलत सब्द क अरथ अहइ “हनोक परमेस्सर क संग संग चलत रहा।”

भएन। उ पचे मसहूर लोग रहेन। उ पचे पुराने जमाने स बहादुर रहेन।

5यहोवा लखेस कि भुइँया प मनई बहोत जिआदा पापी अहइँ। यहोवा लखेस कि मनई लगातार बुरी बात ही सोचत ह।

6यहोवा क इ बात क दुःख भवा कि मईँ भुइँया प मनई क काहे बनाएउँ? यहोवा इ बात स बहोत दुःखी भवा। 7एँह बरे यहोवा कहेस, “मईँ आपन बनई भइ भुइँया क सब मनइयन क खतम कइ देब। मईँ हर एक मनई, जनावर अउ भुइँया प रेगंडवाला हर एक जीउ जन्तु क नास करब। मईँ अकासे क चिरइयन क भी खतम कइ देब। काहे? काहेकि मईँ इ बात स दुःखी अहउँ कि मईँ इ सबहि चीजन क बनाएउँ।”

8मुला भुइँया प यहोवा क खुस करइ वाला एक मनई रहा-नूह।

नूह अउ जल क प्रलय

9इ नूह क जिन्नगी क कहानी बाटइ। उ आपन समइ में एक बहोत ही अच्छा मनइ रहा। अउर उ हमेसा परमेस्सर क अनुसरण किहेस। 10नूह क तीन पूत रहेन, सेम, हाम अउ येपत।

11-12परमेस्सर धरती प निगाह दउड़ाएस अउ उ निहारेस कि भुइँया क मनइयन बर्बाद कइ दिहे अहइँ। हर एक ठउरे प मारकाट फइला रहा। मनई पपियाइ ग रहेन अउ क्रूर होइ ग रहेन, अउर उ पचे धरती प आपन जिन्नगी बर्बाद कइ दिहे रहेन।

13एँह बरे परमेस्सर नूह स कहेस, “सब मनइयन धरती क किरोध अउ हिंसा स पाट दिहे अहइँ। इ खातिर मईँ सबहि जिअत प्राणियन क नास कइ देब। मईँ ओनका भुइँया स हटाइ देब। 14गोपेर क काठ बइपरा अउ आपन खातिर एक ठु जहाज बनावा। जहाज में कमरन बनावा अउ जहाज क राल स भीतरे अउ बाहरे लीपि द्या।

15“जउन जहाज मईँ बनावइ चाहत हउँ ओकर नाप जोख तीन सौ हाथ लम्बा, पचास हाथ चौड़ा, तीस हाथ ऊँच अहइ। 16जहाज बरे छत स करीब एक हाथ खाले खिरकी बनावा। जहाज क बगल में फाटक बनावा। जहाजे में तीन मंजिल बनावा। ऊपर क मंजिल, बिचकउ मंजिल अउ तरखाले क मंजिल।

17“तू पचन क जउन बतावइ चाहत हउँ ओका धियान स सुना। मईँ धरती प बइवार भारी पानी क बाढ़ लिआउब। अकासे क नीचे सबहि जीउन क नास करब। धरती क सब जीउ मरि जइहीं। 18मुला मईँ तू सबन क बचाउब। तब मईँ तोहसे एक खास करार करब। तू, तोहार पूतन, तोहार मेहरारु अउ तोहार पतोहुअन सबहि जहाज में सवार होइहीं। 19संग मैं तोहका जिअत प्राणी क जोड़ा भी लइ आवइ क

नेफिलिम लोग नेफिलिम लोग उ दिना उहइ देस में रहत रहेन। इ सबइ एकरे पाछे भी हुआँ रहत रहेन जब परमेस्सर क पूत लोग मनई क बिटियन स बियाह किहेन अउ इ मेहररुअन लरिकन क जन्म दिहना। इ लरिकन मसहूर भएन। इ सबइ पुराना जमाना स बहादुर रहेन।

होइ। हर एक प्राणी क नर अउ मादा जोड़ा जहाजे में लिआवा। आपन संग ओनका जिअत राखा। 20धरती क हर किसिम क चिरइयन क जोड़ा भी हेरा। धरती क हर किसिम क जनावरन क जोड़ा हेरा। धरती प रेंगइवाला हर एक जीउ क जोड़ा क भी हेरा। धरती प हर किसिम क जनावरन क नर अउ मादा तोहरे संग होइहीं। जहाजे प ओनका जिअत राखा। 21धरती प सब किसिम क भोजन भी लइ जहाजे प लइ आवा। इ भोजन तोहरे बरे अउ जनावरन बरे होइ।”

22नूह इ सब कछू किहस। नूह परमेस्सर क सब हुकुम क मान लिहस।

जल प्रलय सुरु होत ह

7 तब यहोवा नूह स कहेस, “मई लखेउँ ह कि इ समइ क बुरे मनइयन में तू ही एक नीक मनई अहा। ऐह बरे तू आपन परिवार क बटोरा अउ तू पचे सबहिं जहाजे में चला जा। 2हर एक सुद्ध जनावर क सात जोड़ा, (सात तु नर अउ सात तु मादा) संग में लइ ल्या अउ धरती क ऊपर दूसर असुद्ध जनावरन में स एक एक जोड़ा नर अउ मादा लिआवा। इ सबहिं जनावरन क आपन संग जहाजे में लइ आवा। 3हवा में उड़इवाला सब पंछिन क सात तु जोड़ा (सात तु नर अउ सात तु मादा) लिआवा। एहसे इ सबइ जनावरन भुईया प जिअत रइहीं, जब कि दूसर जनावरन मिटि जइहीं। 4अब स सतएँ दिन मई भुईया प बहोतइ भारी बर्खा पठउब। इ बर्खा चालीस दिन अउ चालीस रात रही। पृथ्वी क सबहिं जिअइवाले प्राणी मर बिलाइ जइहीं। मोर बनई सब चिजियन नस्ट होइ जइहीं।” 5नूह ओन सबहिं बतियन क मानेस जउन यहोवा हुकुम दिहे रहा। 6बर्खा आवइ क टैम नूह छः सौ बरिस क रहा। 7नूह अउ ओकर परिवार बाढ़ क पानी स बचइ बरे जहाजे में चला गवा। नूह क मेहरारु, ओकर पूतन अउ ओनकइ मेहररुअन ओकरे संग रहिन। 8पृथ्वी क सब सुद्ध जनावरन अउ असुद्ध जनावरन, पंछियन अउ भुईया प रेंगइवाला सब जीउ। नूह क संग जहाजे में चढ़ेन। 9इ सबइ जनावरन क नर अउ मादा जोड़ा परमेस्सर क हुकुम स जहाजे में चढ़ेन। 10सात दिना पाछे बाढ़ सुरु भइ। धरती प बर्खा होइ लाग।

11-13दूसर महीना क सतरहें दिन, जब नूह छःसौ बरिस क रहा, धरती क नीचे क सब सोता फूट पड़ेन अउ धरती स पानी बहब सुरु होइ गवा। उहइ दिन धरती प भारी बर्खा होइ लाग। अइसा लाग माना कि अकासे क खिड़की खुल गइ होइ। चालीस दिन अउ चालीस रात तलक बर्खा धरती प होत रही।” ठीक उहइ दिन नूह, ओकर मेहरारु, ओकर पूत, सेम, हाम अउ येपेत अउर ओकर मेहररुअन जहाजे प चढ़ेन। 14उ पचे अउ धरती प हर किसिम किसिम क जनावर जहाजे में रहेन। हर तरह क गोरु, धरती प रेंगइवाले हर किसिम क जीउ अउ हर तरह क पंछी जहाजे में रहेन। 15इ सबइ जनावरन नूह क संग जहाजे में रहेन हर जाति क जिअत जनावरन क इ सबइ जोड़ा रहेन। 16परमेस्सर क हुकुम क मुताबिक सबहिं जनावरन जहाजे में चढ़ेन। ओकरे भीतर जाए क पाछे यहोवा दरवाजा बन्द कइ दिहस।

17चालीस दिना तलक भुईया प पानी क प्रलय होत रहा। पानी बाढ़ब सुरु भवा अउ उ जहाजे क धरती स ऊपर उठाइ दिहस। 18पानी बाढ़त रहा अउ जहाज धरती स बहोतई ऊपर तैरत रहा। 19पानी ऐतना ऊँच उठा कि ऊँचा त ऊँचा पहाड़ भी पानी में बूड़ गएन। 20पानी पहाड़े क ऊपर बहत रहा। पानी सब स ऊँच पहाड़े स पन्द्रह हाथ ऊँच रहा।

21-22धरती क सब जीउ मारा गएन। हर एक मेहरारु अउर मनई मरि गएन। सबहिं पंछी अउ सबहिं तरह क जनावर मर गएन। सबहिं तरह क जनावरन अउर रेंगइवालन जनावरन मरि गएन। धरती क हर एक जीउ, सांस लेइवालन परानी मरि गएन। 23इ तरह परमेस्सर धरती क सब जिअत हर एक मनई, हर एक जनावर, हर एक रेंगइवाला जीउ अउ हर एक पंछी क नास कइ दिहस। इ सबइ धरती स खतम होइ गएन। सिरिफ नूह, ओकरे संग जहाजे में चढ़े मनइयन अउ जनावरन क जिन्नगी बची रही। 24अउर पानी एक सौ पचास दिना तलक भुईया क बोरे रहा।

पानी क प्रलय खतम होत ह

8 मुला परमेस्सर नूह क नाहीं बिसरा। परमेस्सर नूह अउ जहाजे में ओकरे संग रहइवालन सब पसुअन अउ जनावरन क सुमिरे रहा। परमेस्सर धरती प हावा चलाएस अउ सारा पानी घटइ होइ लाग। 2अकासे स बर्खा थमि गइ अउ धरती क नीचे स पानी बहब रुकि गवा। 3धरती क बोखइवाला पानी लगातार घटत चला गवा। एक सौ पचास दिन पाछे पानी ऐतना उतरि गवा कि जहाज फुनि स धरती प उतरा। 4जहाज अरारात क पहाड़न में स एक प आइके टिक गवा। इ सतएँ महीना क सत्रहवाँ दिन रहा। 5पानी उतरत गवा अउ दसवें महीना क पहिला दिन पहाड़न क चोटी पानी क ऊपर देखोए देइ लाग।

6जहाजे में बनी खिड़की क नूह चालीस दिन पाछे खोलेस। 7नूह एक कौआ क बाहेर उड़ाएस। कौआ उड़िके तब तलक फिरतइ रहा जब तलक धरती पूरी तरह झुराइ न गइ। 8नूह एक तु फ़ाक्ता भी बाहेर पठएस। उ इ जानइ चाहत रहा कि पानी धरती प घटि गवा या नाहीं।

9फ़ाक्ता क कहूँ बइठइ क ठउर नाहीं मिला काहेकि अबहुँ तलक पानी धरती प फइला रहा। ऐह बरे उ नूह क निअरे जहाजे प पुनि लौटि आवा। नूह आपन हाथ फइलाइके फ़ाक्ता क जहाजे प वापस भितरे लइ लिहसे।

10सात दिन पाछे नूह फुनि फ़ाक्ता क पठएस। 11उ दिन दुपहर क पाछे फ़ाक्ता नूह क लगे आवा। फ़ाक्ता क मुँह में एक तु ताजी जइतून क पाती रही। इ चीन्हा नूह क इ बतावइ बरे रहा कि अब धरती प झुरान भुईया अहइ। 12नूह सात दिन पाछे फुन फ़ाक्ता क पठएस। मुला इ टैम फ़ाक्ता लौटा ही नाहीं।

13ओकरे पाछे नूह जहाजे क दरवाजा खोलेस। नूह लखेस अउ पाएस कि भुईया झुरान बा। इ नूह क छः सौ एक बरिस क पहिले महीना क पहिला दिन रहा। 14दूसर महीना क सत्ताइसवाँ दिन तलक भुईया पूरी तरह झुराइ गइ।

15तब परमेस्सर नूह स कहेस, 16“जहाज क तजा। तू तोहार पत्नी तोहार पूत लोग अउ ओनकइ मेहररुअन सब अब बाहेर आवा। 17हर एक जिअत प्राणी, सब पंछी, जनावरन अउ भुइँया प रेगंवालन सबहिं क जहाज स बाहेर लिआवा। इ सबइ जनावरन बहोत स जनावरन पइदा करिहीं अउ भुइँया क भरि देइहीं।”

18एँह बरे नूह आपन पूतन, आपन मेहरारु, आपन पूतन क मेहरारुअन क संग जहाज स बाहेर आवा। 19सबहिं जनावरन, सब रेगंइवाला जीउ अउ सब पंछी जहाज क तजि दिहेन। सब जनावर जहाज स नर अउ मादा क जोड़ा क संग बाहेर आएन।

20तब नूह यहोवा बरे एक वेदी बनाएस। उ कछू सुध्द पंछियन अउ कछू सुध्द जनावरन क लिहेस अउ ओनका वेदी प परमेस्सर क भेट क रुप में बारेस।

21यहोवा इ सब बलिदानन क सुगन्धि पाइके खुस भवा। यहोवा मन-ही-मन कहेस, “मई फिन कबहुँ मनई क कारण भुइँया क न सरापब। मनई छोटी उम्र स ही बुरी बात सोचइ लागत ह। एँह बरे जइसा मई अबहिं किहेउँ ह। इ तरह अब मई कबहुँ सब प्राणियन क सजा न देब। 22जब तलक इ भुइँया रही तब तलक यह पइ फसल पइदा करइ अउ फसल काटइ क समइ हमेसा रही। भुइँया प गरमी अउ जाड़ा अउ दिन अउ रात हमेसा होत रइहीं।”

नई सुरुआत

9 परमेस्सर नूह अउ ओकर पूतन क असीसेस अउ ओनसे कहेस, “बहोत स बच्चा पइदा करा अउ आपन लोगन स भुइँया भरि द्या। 2भुइँया क सब जनावरन तोहरे डरे स थरथरइहीं अउ अकासे क हर एक पंछी तोहसे डरिहीं। भुइँया प रेगंइवाला हर एक जीउ अउ समुद्धर क हर एक मछरी तू मनइयन क अदब करी अउ तू पचन स डेराइ। तू इ सबहिं क ऊपर हुकुम चलउब्या। 3बीते भए समइ में तू पचन क मई हर एक ठु पेड़-पौधा खाइ बरे दिहेउँ रहेउँ। अब हर एक जनावर भी तोहार भोजन होइ। मई भुइँया क हर चीज तू पचन क देत हउँ-अब इ सबइ तोहार अहई। 4किन्तु मई तू पचन क एक हुकुम देत अहउँ कि तू कउनो जनावरन क तब तलक न खाया जब तलक ओहमा ओनका रक्त बाटइ। 5मई तोहरी जिन्नगी क बदले तोहार रक्त माँगब कहइ क अरथ अहइ मई उ जानवरे क जिन्नगी माँगब जउन कउनो मनई क मारी। अउर मई उ मनई क जिन्नगी माँगब जउन दूसरे मनई क मारी।

6“परमेस्सर मनई क आपन सरुप में बनाएस ह। एँह बरे जउन कउनो मनई क खून बहाइ, ओकर खून मनई क जरिये बहावा जाइ।

7“नूह तोहका अउ तोहरे पूतन क ढेर लरिका होई अउ धरती क मनइयन स भाँठि द्या।”

8तब परमेस्सर नूह अउ ओकरे पूतन स कहेस, 9“अब मई तोहका अउ तोहरे सन्ताने क बचन देत हउँ। 10मई इ बचन तोहरे संग जहाजे स बाहेर आवइवालन सबहिं पंछिन, सब गोरुअन अउ सब जनावरन क देत हउँ। मई धरती पइ रहइवालन सबहिं वस्तुअन क बचन देत हउँ। 11मई तोहका

बचन देत हउँ, “पानी क बाढ़ स धरती क सब जिन्नगी बर्बाद होइ गइ मुला अब इ कबहुँ न होइ। अब बाढ़ फिन कबहुँ धरती क जिन्नगी क बर्बाद न करी।”

12अउर परमेस्सर कहेस, “इ सिद्ध करइ बरे मई तोहका इ बचन दिहेउँ ह कि मई तोहका कछू देब। इ सबूत बताइ कि मई तोहसे अउ भुइँया क सबहिं जिअत प्राणियन स एक ठु करार किहेउँ ह। इ करार भविस्स में सदा बनी रही जेकर सबूत इ अहइ। 13कि मई बदरन में इन्द्र धनुख बनाएउँ ह। इन्द्र धनुख मोरे अउ भुइँया क बीच करार क सबूत अहइ। 14जब मई भुइँया क ऊपर बदरे क लिआउब तउ तू बादरन में इन्द्र धनुख देखब्या। 15जब मई इ इन्द्र धनुख क निहारब तबहिं मई तोहरे, भुइँया क सबहिं जिअत प्राणियन अउ आपन बीच भई करार क सुमिरब। इ करार इ बात क बाटइ कि बाढ़ फुन कबहुँ भुइँया क प्राणियन क नास न करी। 16जब मई धियान स बादरन में इन्द्र धनुख क निहारब तब मई सदा बनी रहइवाली करार क सुमिरब। मई आपन अउ भुइँया क सब जिअत प्राणियन क बीच भइ करार क सुमिरब।”

17इ तरह यहोवा नूह स कहेस, “उ इन्द्र धनुख मोरे अउ भुइँया क सब जिअत प्राणियन क बीच भइ करार क सबूत बाटइ।”

समस्या फुन सुरु होत हीं

18नूह क पूत लोग ओकरे संग जहाज स बाहेर आएन। ओनकइ नाउं सेम, हाम अउ येपेत रहेन। (हाम तउ कनान क बाप रहा।) 19इ तीनउ नूह क पूतन रहेन अउ संसारे क सबहिं मनई इ तीनउ स पइदा रहेन।

20नूह किसान बना। अंगूर क बगिया लगाएस। 21नूह अंगूर क दाखरस बनाएस अउ पिएस। उ दाखरस पीके मस्त होइ गवा अउ तम्बू में लोटि गवा। उ कउनो ओढ़ना नाहीं पहिरे रहा। 22कनान क बाप हाम अपने बाप क नंगा देखेस। उ तम्बू स बाहेर आपन भइयन क बताएस। 23तबहिं सेम अउ येपेत एक ठु ओढ़ना लिहस। उ दुइनउँ ओढ़ना क पीठ प डाइके उलटे मुहँ तम्बू में गएन। उ पचे आपना बाप उ नंगापन क ढाँक दिहस जबकि उ समइ ओकर मुहँ क रुख तम्बू क समन्वा रहा। इ तरह उ पचे आपन बाप क नंगापन नाहीं लखेन।

24पाछे नूह सोइके उठा। (उ दाखरस क नसा क कारण सोअत रहा।) तब ओका पता लाग कि ओकर सब त नान्ह पूत हाम ओकरे संग का किहे रहा।

25एँह बरे नूह सराप दिहेस,

“इ सराप कनान बरे होइ कि उ आपन भइयन क दास होइ।”

26नूह इ भी कहेस,

“सेम क परमेस्सर यहोवा धन्न होइ! कनान सेम क दास होइ।

27परमेस्सर येपेत क जिआदा भुइँया देइ। परमेस्सर सेम क तम्बू में रहइ अउर कनान ओकर दास बनइ।”

28बाढ़ क पाछे नूह साढ़े तीन सौ बरिस जिअत रहा। 29नूह पूरा साढ़े नौ सौ बरिस जिअत रहा, तब उ मरा।

रास्ट्र बाढ़ अउ फइल जाइ

10 नूह क पूत सेम। हाम अउ येपेत रहेन। बाढ़ क पाछे इ तीनउँ बहोत स पूतन क बाप भएन। हिआँ सेम, हाम अउ येपेत स पइदा होइवालन पूतन क सूची दीन्ह जात अहइ:

येपेत क संतान

2येपेत क पूत रहेन: गोमेर, मागोग, मादै, यावान, तूबल, मेसेक अउ तीरास।

3गोमेर क पूत रहेन: असकनज, रीपत अउ तोगर्मा

4यावान क पूत रहेन: एलीसा, तर्सीस, किक्ती अउ दोदानी।

5भूमध्य सागर क चारिहुँ कइँती तटे प जउन मनई रहइ लागेन उ पचे येपेत क संतान ही रहेन। हर एक पूत क आपन अलग प्रदेस रहा। सब परिवार बाढ़ेन अउ अलग अलग रास्ट्र बन गएन। हर एक रास्ट्र क आपन आपन भाखा रही।

हाम क संतान

6हाम क पूत रहेन: कूस, मिस्त्र, फूत अउ कनान। 7कूस क पूत रहेन: सबा, हवीला, सबता, रमा, सबूतका। रमा क पूत रहेन: सबा अउ ददान। 8कूस क एक पूत निम्रोद नाउं क भी रहा। निम्रोद भुइँया प बहोत बरिआर मनई भवा रहा। 9यहोवा क समन्वा निम्रोद, एक बड़का सिकरी रहा। ऐँह बरे लोग दूसर मनइयन क बराबरी निम्रोद स करत हीं अउर कहत हीं, “इ मनई, यहोवा क समन्वा बड़का सिकारी निम्रोद क तरह अहइ।”

10निम्रोद क राज्ज सिनार देस में बाबुल, एरेख, कलना अउ अक्कद प्रदेस स सुरु भवा। 11निम्रोद अस्सूर में भी गवा। हुवाँ उ नीनवे, रहोबोतीर, कालह अउ 12रेसेन नाउँ क नगरन क बसाएस। (रेसेन, नीनवे अउ बड़का सहर कालह, क बीच क सहर बाटइ।)

13मिस्त्रप (मिस्त्र) - लूद, अनाम, लहाब, नप्तूह, 14पत्रूस, कसलूह अउ कप्तोर देसन क लोगन क बाप रहा। (पलिस्ती लोग कसलूह लोगन स आए रहेन।) 15कनान सीदोन क बाप रहा। सिदोन कनान क पहिला पूत रहा। कनान, हित क भी बाप रहा। हित, हिक्ती लोगन क बाप रहा। 16अउर कनान, यबूसी, एमोरी, गिर्गासी, 17हिक्वी, अर्की, सीनी, 18अर्वदी, समारी, हमाती लोगन क भी बाप रहा। कनान क परिवार संसार क अलग अलग हींसा में फइला रहेन,

19कनान लोगन क भुइँया उत्तर में सीदोन स दक्खिन में गगर तलक, पच्छिम में अज्जा स पूरब में सदोम अउ अमोरा तलक, अदमा अउ सबोयीम स लासा तलक रहा।

20इ सबइ लोग हाम क संतान रहेन। उ पचे परिवारन, भाखान, देसन अउर रास्ट्रन क अनुसार व्यवस्थित रहेन।

सेम क संतान

21सेम येपेत क बड़का भाई रहा। सेम क एक संतानन एबेर हिब्रू लोगन क बाप रहा।

22सेम क पूत एलाम, अस्सूर, अर्पखद, लूद अउ अराम रहेन।

23अराम क पूत ऊस, हूल, गेतेर अउ मस रहेन।

24अर्पखद सेलह क बाप रहा। सेलह एबेर क बाप रहा। 25एबेर क दुइ पूत रहेन। एक पूत क नाउँ पेलेग रहा। ओका इ नाउँ ऐँह बरे दीन्ह गवा काहेकि जिन्गी क टेम में धरती क बटवारा भवा। दूसर भाई क नाउँ योक्तान रहा।

26योक्तान अल्मोदाद, सेलेप, हसर्मावेत, येरह, 27यदोरवाम, ऊजाल, दिक्ला, 28ओबाल, अबीमाल, सबा, 29ओपीर हवीला अउ योबाब क बाप रहा। इ सबहिँ लोग योक्तान क संतान भएन। 30इ सबइ लोग मेसा अउ पुर्बिहा पहाड़ी प्रदेस क बीच क भुइँया में रहत रहेन। मेसा सपारा प्रदेस कइँती रहा।

31उ लोग सेम क परिवारे स रहेन। उ सबइ परिवार, परिवार क आधार पइ, भाखा क आधार पइ, देस क आधार पइ अउर रास्ट्र क आधार पइ बाँटा भवा रहा।

32नूह क पूतन स चलइ वाला परिवारन क इ सूची अहइ। उ पचे आपन आपन रास्ट्र में बाँटा भवा रहत रहेन। बाढ़ क पाछे सारी भुइँया प फइलइवाला लोग भी एनही परिवारे स निकरि आएन।

संसार बाँटे गवा

11 बाढ़ क पाछे संसार एक ही भाखा बोलत रहा। सब लोग एक ही सब्द-भण्डार बइपरत रहेन। 2लोग पूरब कइँती स बढेन। ओनका सिनार देस में एक मइदान मिला। लोग हुवाँ बसइ गएन। 3लोग कहेन, “हम पचन क ईटा बनउब अउ ओका पजावा में तपावइ चाही, ताकि उ सबइ पक्की होइ जाई।” ऐँह बरे मनइयन आपन घर बनावइ बरे पाथरन क जगह ईटा क बइपरेन। अउ मनइयन चूना क गारा क जगह राल क प्रयोग किहेन।

4लोग कहेन, “हम पचे आपन खातिर एक ठु सहर बनाई अउ हम सबइ एक बहोत ऊँच इमारत बनाउब जउन अकासे क छुइ। हम पचे नामी होइ जाब। अगर हम पचे अइसा करब तउ पूरी धरती प बिखरेब नाहीं। हम पचे एक ही ठउर प एक संग रहब।”

5यहोवा सहर अउ बहोत ऊँच इमारत क लखइ बरे तरखाले आवा। यहोवा मनइयन क इ सब बनावत लखेस। 6यहोवा कहेस, “इ सबइ लोग एक भाखा बोलत हीं अउर मई निहारत हउँ कि उ पचे इ काम खतम करइ बरे एकउटा अहइ। इ तउ, इ सबइ जउन कछू कइ सकत हीं ओकर, सिरिफ सुरुआत अहइ। हाली ही उ पचे सब कछू करइ जोगग होइ जइहीं जउन इ पचे करइ चइहीं। 7ऐँह बरे आवा हम तरखाले चली अउ एनकइ भाखा क गड्डमड्ड कइ देइ। तब उ पचे एक दूसर क बात न बूझि पइहीं।”

8यहोवा मनइयन क समूचइ धरती प फइलाइ दिहस। ऐँहसे मनइयन सहर क बनाउब पूरा नाहीं किहन। 9इहइ उ ठउर रहा जहाँ यहोवा समूचइ संसार क भाखा क गड्डमड्ड कइ दिहस। ऐँह बरे इ ठउर क नाउँ बाबुल धरा गवा। इ तरह यहोवा उ जगहिया स मनइयन क पृथ्वी क सब देसन में फइलाएस।

सेम क परिवार क कहानी

10इ सेम क परिवारे क कहानी बाटइ। बाढ़ क दुइ बरिस पाछे जब सेम सौ बरिस क रहा ओकर पूत अर्पखद क जनम भवा। 11ओकरे पाछे सेम पाँच सौ बरिस जिअत रहा। ओकरे दूसर पूत अउ बिटियन रही।

12जब अर्पखद पैतीस बरिस क रहा ओकर पूत सेलह क जनम भवा। 13सेलह क पइदा होइ क पाछे अर्पखद चार सौ तीन बरिस जिअत रहा। इ दिन ओकर दूसर पूतन अउ बिटियन पइदा भइन।

14सेलह क तीस बरिस होइ क पाछे ओकर पूत एबेर क जन्म भवा। 15एबेर क जन्म क पाछे सेलह चार सौ तीन बरिस जिअत रहा। इ दिनन में ओकरे पूतन अउ बिटियन पइदा भएन।

16एबेर क चौतीस बरिस क होइ क पाछे ओकरे पूत पेलेग क जन्म भवा। 17पेलेग क जन्मे क पाछे एबेर चार सौ तीस बरिस अउर जिअत रहा। इ दिनन में ओकरे दूसर पूतन अउ बिटियन पइदा भइन।

18जब पेलेग तीस बरिस क भवा, ओकर पूत 'रु' क जन्म भवा। 19'रु' क जन्म क पाछे पेलेग दुइ सौ नौ बरिस अउर जिअत रहा। उ दिनन में ओकरे दूसर बिटियन अउ बेटवन क जन्म भवा।

20जब रु बत्तीस बरिस क भवा, ओकरे पूत सरुग क जन्म भवा। 21सरुग क जन्मे क पाछे रु दुइ सौ सात बरिस अउर जिअत रहा। इ दिनन ओकरे दूसर बेटवन अउ बिटियन पइदा भएन।

22जब सरुग तीस बरिस क भवा, ओकरे पूत नाहोर क जन्म भवा। 23नाहोर क जन्म क पाछे सरुग दुइ सौ बरिस अउर जिअत रहा। इ दिनन में ओकरे दूसर पूतन अउ बिटियन क जन्म भवा।

24जब नाहोर उनतीस बरिस क भवा, ओकर पूत तेरह क जन्म भवा। 25तेरह क जन्म क पाछे नाहोर एक सौ उन्नीस बरिस अउर जिअत रहा। इ दिनन में ओकरे दूसर बिटियन अउ बेटवन क जन्म भवा।

26तेरह जब सत्तर बरिस क भवा, ओकरे पूत अब्राम, नाहोर अउ हारान क जन्म भवा।

तेरह क परिवार क कहानी

27इ तेरह क परिवार क कहानी अहइ। तेरह अब्राम, नाहोर अउ हारान क बाप रहा। हारान लूत क बाप रहा। 28हारान आपन जन्मभूमि कसदियन क उर सहर में मरा। जब हारान मरा तब ओकर पिता तेरह जिअत रहा। 29अब्राम अउ नाहोर दुइनउँ आपन आपन बियाह किहन। अब्राम क मेहरारु सारै रही। नाहोर क मेहरारु मिल्का रही। मिल्का हारान क बिटिया रही। हारान मिल्का अउ यिस्का क बाप रहा। 30सारै क कउनो बच्चा नहीं रहा काहेकि उ कउनो बच्चा क जन्म देइ जोगग नहीं रही। 31तेरह आपन परिवार क संग लिहिस अउ कसदियन क उर सहर क तजि दिहिस। उ पचे कनान क जात्रा करइ क मन में ठान लिहन। तेरह आपन पूत अब्राम, आपन पोता लूत (हारान क पूत), आपन पतोहू (अब्राम क मेहरारु) सारै क संग लिहिस। उ पचे हारान

तलक जात्रा किहन अउ हुआँ ठहराउब तय किहन। 32तेरह दुइ सौ पाँच बरिस जिअत रहा। तब उ हारान में मरि गवा।

परमेस्सर अब्राम क बोलावत ह

12 यहोवा अब्राम स कहेस, "आपन देस अउ आपन लोगन क तजि द्या। आपन बाप क परिवारे क तजि द्या अउर उस देस जा जेका मई तोहका देखाउब।

2मई तोहका आसीबाद देब। मई तू पचन स एक महान रास्ट्र बनाउब। मई तू सबन क नाउँ मसहूर करब। लोग तोहरे नाउँ क प्रयोग दूसर लोगन क आसीबाद देइ बरे करइहीं।

3मई उ पचन क असीसब, जउन तोहका असीसिहीं। मुला मई ओनका सराप देब जउन तोहका सराप दिहिस। मई धरती प सब मनइयन क असीसइ बरे तोहका बइपरब।"

अब्राम कनान जात ह

4तउ अब्राम यहोवा क हुकुम मानेस। उ हारान क तजि दिहिस अउ लूत ओकरे संग गवा। इ समइ अब्राम पचहत्तर बरिस क रहा। 5अब्राम जब हारान तजेस तउ उ अकेल्ला नाहीं रहा। अब्राम आपन मेहरारु सारै, भतीजा लूत अउ हारान में ओनकइ संग जउन कछू रहा, सबक संग लइ आवा। अब्राम क जउन सब दास लोग मिला रहेन, उ सबइ भी ओकरे संग गएन। अब्राम अउ ओकर दल छारान क तजि दिहिस अउ कनान देस तलक जात्रा किहिस। 6अब्राम कनान देस में सकेम क सहर अउ मोरे क बड़का बृच्छ तलक जात्रा किहिस। उ समइ कनानी लोग हुआँ रहत रहेन।

7यहोवा अब्राम क समन्वा परगट भवा। यहोवा कहेस, "मई इ देस तोहरे संतानन क देब।"

यहोवा अब्राम क समन्वा जउने जगह प परगट भवा उ जगह प अब्राम एक वेदी यहोवा क आराधना बरे बनाएस। 8तब अब्राम उ जगह क तजि दिहिस अउ बेटेल क पूरब पहाड़े प जात्रा किहिस। अब्राम हुवाँ आपन तम्बू गाड़िस। बेटेल सहर पच्छिम में रहा। आइ सहर पूरब में रहा। उ जगह अब्राम यहोवा बरे दूसर वेदी बनाएस अउ अब्राम हुवाँ यहोवा क उपासना किहिस। 9एकरे पाछे अब्राम फुन जात्रा किहिस। उ नेगव कईंती जात्रा किहिस।

मिस्त्र में अब्राम

10इ दिनन भुइँया बहोतइ झुरान रही अउ कउनो खाइ क चीज नाहीं जमत रही। एँह बरे अब्राम जिअत रहइ बरे मिस्त्र चला गवा। 11अब्राम लखेस कि ओकर मेहरारु सारै बहोत सुन्नर रही। एँह बरे मिस्त्र में आवइ क पहिले अब्राम सारै स कहेस, "मई जानत हउँ कि तू बहोतइ सुन्नर अहा। 12जब मिस्त्र क लोग तोहका निहरिहीं तउ उ पचे कहिहीं, 'इ मेहरारु एकर पत्नी अहइ।' तब उ सबइ मोका मारि डइहीं काहेकि तोहका बइठाइ लेइहीं। 13इ खातिर तू मनइयन स कह्या कि तू मोर बहिन अहा। तब उ पचे मोका नाहीं मरिहीं। उ पचे मोहे प दया करिहीं काहेकि उ पचे बूझि लेइहीं कि मई तोहार भाई अहउँ। इ तरह तू मोर जिन्नगी बचउबिउ।"

14इ तरह अब्राम मिस्र में पहुँचा। मिस्र क लोग लखेन, सारै बहोत सुन्नर मेहरारु अहइ। 15कछू मिस्र क अफसर लोग ओका लखेन। उ पचे फिरौन स कहें कि उ बहोतइ सुन्नर मेहरारु अहइ। उ सबइ अफसरन सारै क फिरौन क घर लइ गएन। 16फिरौन अब्राम क ऊपर दया किहेस काहेकि उ पचे बूझ गएन कि उ सारै क भइया बाटइ। फिरौन अब्राम क भेड़ी, गोरु अउ गदहन क दिहस। अब्राम ऊँटन क संग मनसेधु अउ मेहरारु नउकरन पाएस।

17फिरौन अब्राम क मेहरारु क रखि लिहस। एहसे यहोवा फिरौन अउ ओकरे घरे क मनइयन में खराब बेरामी सँचराइ दिहस। 18तउ फिरौन अब्राम क बोलाएस। फिरौन कहेस, “तू मोरे संग बड़ा खोट किहा ह। तू इ नाहीं बताया कि सारै तोहार पत्नी अहइ। काहे? 19तू कह्या, ‘इ मोर बहिन अहइ।’ तू अइसा काहे कह्या? मई एँका एँह बरे राखा कि इ मोर मेहरारु होइ। मुला अब मई तोहार मेहरारु क तोहका लउटावत अहउँ। एँका ल्या अउ जा।”

20तब फिरौन आपन मनइयन क हुकुम दिहस कि उ पचे अब्राम क मिस्र क बाहेर पहुँचाइ देइ। इ तरह अब्राम अउ ओकर मेहरारु उ जगह तजेन अउर उ पचे सब चिजियन क संग लइ गएन जउन ओनकइ रही।

अब्राम कनान लउटा

13 अब्राम मिस्र तजि दिहस। अब्राम आपन मेहरारु अउ आपन सबहिँ सामान क संग नेगव स होइ के जात्रा किहस। लूत भी ओकरे संग रहा। 2इ टेम अब्राम बहोतइ धनी रहा। ओकरे संग ढेरिके जनावर, बहोत सी चाँदी अउ ढेर क सोना रहा।

3अब्राम चारिहुँ कइँती जात्रा करत रहा। उ नेगव क तजेस अउ बेतेल वापस गवा। उ बेतेल अउर आइ क बीच क जगह में पहुँचेस। इ उहइ ठउर रहा जहाँ अब्राम अउ ओकर परिवार पहिले तम्बू लगाइके ठहरा रहा। 4इ उहइ ठउर रहा जहाँ अब्राम एक वेदी बनाए रहा। एँह बरे अब्राम इहाँ यहोवा क आराधना किहस।

अब्राम अउ लूत अलग भएन

5इ टेम लूत भी अब्राम क संग जात्रा करत रहा। लूत क लगे ढेरिके जनावर अउ तम्बू रहेन। 6अब्राम अउ लूत क लगे एँतना जिआद जनावर रहेन कि भुइँया एक लागे ओनका चारा नाहीं दइ सकत रही। 7अब्राम अउ लूत क गड़ेरिया या आपुस में तखड़ावइ-बखड़ावइ लागेन। (उ दिनन में कनानी लोग अउ परिज्जी लोग भी इहइ पहुँटा में रहत रहेन।)

8अब्राम लूत स कहेस, “हमरे अउ तोहरे बीच कउनो तखड़ा बखड़ा न होइ चाही। हमार अउर तोहार गड़ेरियन क बीच में झगाड़ा नाहीं होइ चाही। हम पचे सबहिँ भाई अही। 9हम पचन क अलग होइ जाइ चाही। तू जउन चाहा ठउर चुन ल्या। अगर तू बाई कइँती जाब्या तउ मई दाहिन कइँती जाब। अगर तू दाहिन कइँती जाब्या तउ मई बाई कइँती जाब।”

10लूत द्रिस्टी दउड़ाएस अउ यरदन क घाटी क निहारेस। लूत निहारेस कि हुवाँ बहोत पानी अहइ। (इ बात उ टेम क बाटइ जब यहोवा सदोम अउ अमोरा क नास नाहीं किहे रहा। उ टेम यरदन क घाटी सोअर तलक यहोवा क बगिया क नाई पूरे राह क संग संग फइली रही। इ भुइँया मिस्र देस क भुइँया क नाई नीक रही।) 11एँह बरे लूत यरदन क घाटी में रहब अंगीकार किहस। इ तरह दुइनउँ मनई अलग अलग होइ गएन अउ लूत पूरब कइँती जात्रा सुरु किहेस।

12अब्राम कनान प्रदेस में रहा अउ लूत घाटी क सहसन में रहा। लूत सदोम क दक्खिन में बढ़ा अउ रुकि गवा। 13सदोम क मनई बहोत पापी रहेन। उ पचे सदा यहोवा बरे खिलाफ पाप करत रहेन।

14जब लूत चला गवा तब यहोवा अब्राम स कहेस, “आपन चारिहुँ कइँती निहारा, उत्तर, दक्खिन, पूरब अउ पच्छिम कइँती लखा। 15इ सारी भुइँया, जेका तू लखत अहा, मई तोहका अउ तोहरे पाछे जउन तोहार लोग रइहीं ओनका देत अहउँ। इ प्रदेस सदा तोहार अहइ। 16मई तोहरे लोगन क धरती क धूल क कण क नाई अनगिनत बनउब। अगर कउनो धरती क कण क गन सकइ तउ उ तोहरे मनइयन क भी गन सकी। 17एँह बरे आवा। आपन धरती प चला। मई एँका अब तोहका देत अहउँ।”

18इ तरह अब्राम आपन तम्बू हटाएस। उ मग्ने क बड़का बृच्छ क लगे रहइ लाग। इ हेब्रोन सहर क निचके रहा। उ ठउरे प अब्राम एक वेदी यहोवा क आराधना बरे बनाएस।

लूत धरा गवा

14 अम्रापेल सिनार क राजा रहा। अर्योक एल्लासार क राजा रहा। कदोर्लाओमेर एलाम क राजा रहा। तिदाल गोथीम क राजा रहा। 2इ सबहिँ राजा लोगन में सदोम क राजा बेरा, अमोरा क राजा बिसा, अदमा क राजा सिनाब, सबोथीम क राजा सेमेवेर अउ बेला। (बेला सोअर भी कहा जात रहा।) क राजा क संग एक जुद्ध भवा।

3सिद्दीम क घाटी में इ सबहिँ राजा आपन आपन फउज स मिलेन। (सिद्दीम क घाटी आजुकल नून क समुद्दर अहइ।) 4इ सबइ राजा लोग कदोर्लाओमेर क सेवा बारह बरिस तलक किहन। मुला तेरहवाँ बरिस उ सबइ ओकरे खिलाफ होइ गएन। 5एँह बरे चौदहवें बरिस में राजा कदोर्लाओमेर दूसर राजा लोगन क संग ओनसे लड़इ आवा। कदोर्लाओमेर अउ ओकरे संग क राजा लोग रपाई लोगन क असतरोत्कनम में हराएन। उ पचे हाम में जूजि लोगन क भी हराएन। उ पचे एमि लोगन क। उ सबइ एमि लोगन क साबेकियातैम में हराएन। 6अउर उ पचे होरीत लोगन क सेईर क पहाड़ी पहुँटा स हराइके एल्पारान कइँती खदेरेन। (एल्पारान मरुभूमि क निचके बाटइ।) 7तब राजा कदोर्लाओमेर पाछे कइँती घूमा अउ एमिसपात क गवा। इ कादेस कहा जात ह। अउर सबहिँ अमालेकी लोगन क हराएस। उ एमोरी लोगन क भी हराएस। इ पचे हससोन्तामार में रहत हीं।

8उ समइ सदोम क राजा, अमोरा क राजा, अदमा क राजा, सबोथीम क राजा, अउ बेला क राजा, (बेला सोअर ही अहइ।) सबहिँ एक संग मिलिके आपन दुस्मनन स लड़इ

बरे गएन। 9उ पचे एलाम क राजा कदोर्लाओमेर, गोयीम क राजा तिदाल, सिनार क राजा अम्रापेल, अउर एल्लासार क राजा अर्थेक स लड़ेन। इ तरह चार राजा पाँच राजा लोगन स लड़त रहेन।

10सिद्धीम क घाटी में राल स भरा भवा ढेरिके गड्डा रहेन। सदोम अउ अमोरा क राजा अउ ओकर फउजियन पराइ गएन। ओकरे बहुत सारे फउजियन ओन गड्डन में गिर गएन। मुला दूसर लोग पहाड़ी में पराइ गएन।

11सदोम अउ अमोरा क लगे जउन कछू रहा ओका ओनकइ दुस्मन लइ लिहिन। उ पचे ओनकइ सब भोजन-ओढ़ना क लइ लिहिन अउ उ पचे चला गएन। 12अब्राम क भाई क पूत लूत सदोम में रहत रहा, ओका दुस्मन कैद कइ लिहिन। उ पचे ओका अउर ओकरे लगे जउन कछू भी रहा लइ लिहिन। 13एक ठु मनई जउन धरा नहीं जाइ सका उ हिब्रू मनई अब्राम क इ सबइ सारी बातन क बताएस। एमोरी मग्ने क बृच्छन क लगे अब्राम आपन डेरा डाएस। मग्ने एस्कोल अउ आनेर एक समझौता एक दूसरे क मदद करइ बरे किहे रहेन अउर उ पचे अब्राम क मदद खातिर एक समझौता किहे रहेन।

अब्राम लूत क छोड़वत ह

14तब अब्राम क पता लाग कि लूत धरा ग अहइ। तउ उ आपन पूरा परिवार क बटोरेस अउ ओनमें स तीन सौ अठारह प्रसिच्छित फउजियन क अब्राम दान नगर तलक दुस्मनन क पाछा किहस। 15उहइ रात उ अउर ओकर मनइयन ओनका खिलाफ धावा बोलि दिहिन। उ पचे दुस्मनन क हराएन अउ दमिस्क क उत्तर में होवा तलक ओनकइ पाछा किहिन। 16तब अब्राम दुस्मनन क जरिये चोरोंइ गइ सब चिजियन लइ आएन। अब्राम लूत, ओकर मेहरारुअन अउर ओकरे नउकरन अउर ओकरे सबहिं चिजियन क लइ आवा। 17कदोर्लाओमेर अउ ओकरे संग क सब राजा लोगन क हराए क पाछे अब्राम आपन घरे लौटि आवा। जब उ घर आवा तउ सदोम क राजा ओसे भेटंइ सावे क घाटी में पहुँचा। (एँका अब राजा क घाटी कहत हीं।)

मेल्कीसेदेक

18सालेम क राजा मेल्कीसेदेक भी अब्राम स भेटंइ गवा। मेल्कीसेदेक, सर्वोच्च परमेस्सर क याजक रहा। मेल्कीसेदेक रोटी अउ अंगूरे क दाखरस लइ आवा। 19मेल्कीसेदेक अब्राम क आसीर्बाद दिहस अउ कहेस:

“अब्राम, सर्वोच्च परमेस्सर तोहका आसीर्बाद देइ। परमेस्सर भुइँया अउ अकास बनाएस।

20अउर हम सर्वोच्च परमेस्सर क उपासना करित ह। परमेस्सर दुस्मनन क हरावइ में तोहार मदद किहेस।”

तबहिं अब्राम लड़ाई में मिली हर चीज क दसवाँ हीसां मेल्कीसेदेक क दिहस। 21तब सदोम क राजा कहेस, “तू इ सब चीजन क अपने लगे रखि सकत ह, मोका सिरिफ ओन मनइयन क दइ द्या जेनका दुस्मन धइ ल गए रहेन।”

22मुला अब्राम सदोम क राजा स कहेस, “मई सर्वोच्च परमेस्सर यहोवा जउन भुइँया अउ आकास क बनएस ह:

ओकरे समन्वा इ किरिया खावा ह 23कि जउन आप क चीज बाटइ ओहमों स कछू भी न लेब। हियँ तलक कि एक ठु धागा व पनही क फीता भी न लेब। मई इ नहीं चाहित कि आप कहई, ‘मई अब्राम क धनी बनाएँ।’ 24मई सिरिफ उ भोजन क अपनाउब्या जेका हमार जवान लोग खाएस ह। मुला तू दूसर मनइयन क भी ओकर हीसा देई। हमरी लड़ाई में जीती भइ चीजनक आप लइ लेई अउ एहमों स कछू आनेर, एस्कोल अउ मग्ने क दइ देई। इ मनइयन लड़ाई में हमार मदद किहेन रहेन।”

अब्राम क संग परमेस्सर क करार

15 इ बातन क होइ जाए क पाछे यहोवा क हुकुम अब्राम क एक ठु दरसन में आवा। परमेस्सर कहेस, “अब्राम, डेराअ, नहीं। मई तोहार रच्छा करब अउ मई तोहका बड़का पुरस्कार देब।”

2मुला अब्राम कहेस, “हे यहोवा अइसा कछू भी नहीं अहइ जेका तू मोका देब्या अउर उ मोका खुस करी। काहेकि मोरे पूत नहीं अहई। एँह बरे मोर दास दमिस्क क बसइया एलीएजेर मोरे मरइ क पाछे मोर सब कछू पाइ।”

3अब्राम कहेस, “तू ही लखा, तू मोका कउनो पूत नहीं दिहा ह। एँह बरे मोरे घरे में पइदा भवा एक ठु दास मोर सबहिं चिजियन क पाइ।”

4तब यहोवा अब्राम स बात किहस। परमेस्सर कहेस, “तोहरी चीजन क तोहार इ दास न पाइ। तोहरे एक ठु बेटवा होइ अउर तोहार पूत ही तोहार चिजियन क पाइ।”

5तब परमेस्सर अब्राम क बाहेर लइ गवा। परमेस्सर कहेस, “आकास क लखा। अनगिनत तारन क निहारा। इ सबइ एँतना अहई कि तू गन नहीं सकत्या। भविस्स में तोहार परिवार अइसा ही होइ।”

6अब्राम यहोवा पइ बिस्वास किहेस अउर उ ओका नीक समझेस।

7परमेस्सर अब्राम स कहेस, “मई ही उ यहोवा अहई जउन तोहका कसदियन क ऊर स बाहेर लइ आएँ। इ मई एँह बरे किहई कि इ पहँटा मई तोहका दइ सकऊँ, तू इ पहँटा क आपन कब्जा में कइ सका।”

8मुला अब्राम कहेस, “हे यहोवा, मोर सुआमी, मई कइसे पतियाँ कि इ पहँटा मोका मिली?”

9परमेस्सर अब्राम स कहेस, “हम पचे एक करार करब। तू मोका तीन बरिस क एक ठु गइया, तीन बरिस क एक बोकरी, अउ तीन बरिस क एक भेड़ा लिआवा। एक ठु फाक्ता अउ एक कबूतर क बच्चा भी लिआवा।”

10अब्राम इ सबहिं चिजियन क परमेस्सर क लगे लइ आवा। अब्राम इ जनावरन क मारि डाएस अउ हर एक क दुइ दुकड़ा कइ डाएस। अब्राम एक आधा टूक एक कइँती अउ दूसर आधा टूक दूसर कइँती ओकरे ठीक आमने-सामने धरेस। अब्राम पंछिन क दुइ टूका नहीं किहेस। 11तनिक देर पाछे मांसाहारी पंछी मरे भए जनावरन क खाइ क बरे खाले आइ गएन मुला अब्राम ओनका खदेरेस।

12पाछे सूरज बूड़इ लाग। अब्राम क गहरी नींद आइ गइ। खौफनाक अँधियारा ओका चारिहुँ कइँती स घेरि

लिहस। 13तब यहोवा अब्राम स कहेस, “तोहका इ सबइ बातन क जानइ चाही। तोहार संतानन बिदेसी बनिहीं अउर उ पचे देस में जइहीं जउन ओनका न होइ। उ पचे हुआँ दास होइहीं। चार सौ बरिस तलक ओनके संग बुरा बिउहार होइ। 14मई उ रास्ट्र क निआव करब अउ ओका सजा देब जउन ओन लोगन क गुलाम बनाएस अउर जब तोहरे सन्तानन उ देसे क तजि देइहीं तउ आपन संग ढेर नीक चीज लइ जइहीं।

15“तू बहोत लम्बी उमर तलक जिअत रहब्या। तू सान्ति स मरब्या अउ तू आपन पुरखन क लगे दफनावा जाब्या। 16चार पीढ़ीयन क पाछे तोहार लोग इहइ पहँटा में फुन अइहीं। इ टेम तोहार लोग एमेरियो क हरइहीं। हिआँ क बसइयन एमोरियन क, सजा देइ बरे मई तोहरे लोगन क बइपरब। इ बात भविस्स में होइ काहेकि एमोरियन सजा पावइ लायक बुरा अबहिं नार्हीं भवा अहई।”

17जब सूरज बूड़ि गवा, तउ बहोत अँधियारा छाइ गवा। मरा भवा जनावर अबहिं तलक जमीन प ओलरा भए रहेन। हर एक जनावर दुइ हींसा में कटा भवा बहावा रहेन। उहइ समइ धुआँ अउ आगी क एक खम्भा जनावरन क टूक क बीच स गवा।

18इहइ तरह उ दिन यहोवा अब्राम क बचन दिहस अउ ओनके संग करार किहस। यहोवा कहेस, “मई इ पहँटा तोहरे संतानन क देब। मई मिस्र क नदी अउ बड़की नदी परात क बीच क पहँटा ओनका देब। 19इ देस केनी, कनिज्जी, कदमोनी, 20हित्ती, परीज्जी, रपाई, 21एमोरी, कनानी, गिर्गासी अउ यबूसी लोगन क अहइ।”

दासी हाजिरा

16 सारै अब्राम क मेहरारु रही। अब्राम अउ ओकरे कउनो लरिका नार्हीं रहा। सारै क लगे एक तु मिस्र क दासी रही। ओकर नाउँ हाजिरा रहा। 2सारै अब्राम स कहेस, “लखा, यहोवा मोका कउनो बच्चा नार्हीं दिहे अहइ। ऐह बरे मोरी दासी क संग सारीरिक संबन्ध करा होइ सकत ह कि ओकर बच्चा मोर अपना बच्चा होइ जाब।”

अब्राम आपन मेहरारु क कहब मान लिहस। 3कनान में अब्राम क दस बरिस रहइ क पाछे इ बात भइ अउ सारै आपन भतार अब्राम बरे हाजिरा क दइ दिहस। हाजिरा मिस्र क दासी रही।

4हाजिरा, अब्राम स गाभिन भइ। जब हाजिरा इ देखेस तउ ओका बहोत गरब भवा अउ इ महसूस करइ लाग कि मई आपन मालकिन सारै स बड़िया अहउँ।

5मुला सारै अब्राम स कहेस, “मोर दासी अब मोसे घिना करत ह अउ एकरे बर मई तोहका दोखी मानत हउँ। मई ओका तोहरे बरे दिहेउँ। उ गाभिन भइ अउर तब उ महसूस करइ लाग कि उ मोसे बड़िया बा। मई चाहत हउँ कि यहोवा सही निआव करी।”

6मुला अब्राम सारै स कहेस, “तू हाजिरा क मालकिन अहा। तू ओकरे संग जउन चाहा कइ सकत ह।” ऐह बरे सारै आपन दासी पइ अत्याचार किहस अउर ओकर दासी पराइ गइन।

हाजिरा क पूत इस्माएल

7यहोवा क सरगदूत रेगिस्तान में पानी क सोता क लगे हाजिरा क पाएस। इ सोता सूर जाइवाला रहे प रहा। 8सरगदूत कहेस, “हाजिरा, तू सारै क दासी अहा। तू हिआँ काहे अहा? तू कहाँ जात अहा?”

हाजिरा कहेस, “मई आपन मालकिन सारै क हिआँ स पराइ जात अहउँ।”

9यहोवा क सरगदूत ओसे कहेस, “तू आपन मालकिन क घर जा अउर ओका सोंप द्या।” 10यहोवा क सरगदूत ओसे फुन कहेस, “तोहसे बहोत स लोग पइवा होइहीं। इ सबइ लोग ऐतना होइ जइहीं कि गना नार्हीं जाइ सकिहीं।”

11यहोवा क सरगदूत अउर भी कहेस,

“अबहिं तू गर्भ धरे अहा अउर तोहका एक पूत होइ। तू ओकर नाउँ इस्माएल राख्या। काहेकि यहोवा तोहका देइ भए कस्ट क सुनेस ह।

12इस्माएल एक तु जंगली गदहा क तरह जंगली अउ अजाद होइ उ सब क खिलाफ होइ अउर सबहीं ओकर खिलाफ होइ जाइ। उ आपन भाइयन क लगे आपन डेरा डाइ मुला उ ओनके खिलाफ होइ।”

13तब हाजिरा परमेस्सर क जउन ओसे बात करत रहा, एक नवा नाउँ स यहोवा क पुकारेस। उ कहेस, “तू परमेस्सर ह जउन मोका लखत ह।” उ ओसे उ नाउँ ऐह बरे दिहस काहेकि उ आपन आप स कहेस, “मई महसूस करत हउँ कि उ मोरे ऊपर निगाह राखत ह।” 14ऐह बरे उ कुआँ क नाउँ लहैरोइ पड़ा। उ कुआँ कादेस अउ बेरेद क बीच में बाटइ।

15हाजिरा अब्राम क पूत क जन्म दिहस। अब्राम पूत क नाउँ इस्माएल धरेस। 16अब्राम उ टेम छियासी बरिस क रहा जब हाजिरा इस्माएल क जन्म दिहस।

खतना करार क सबूत

17 जब अब्राम निन्यानबे बरिस क भवा, यहोवा ओह पइ परगट भवा। यहोवा कहेस, “मई सर्वोच्च परमेस्सर अहउँ। मोरे आगे चला अउर इमानदार रहा। 2जदि तू इ करा, तउ मई आपन अउ तोहरे बीच एक करार करब। मई तोहका बचन देत हउँ कि मई तोहका बहोत सारा संतान देबउ।”

3अब्राम परमेस्सर क समन्वा आपन मुँह जमीन कइँती निहुराएस। तब परमेस्सर ओहसे बात किहस अउ कहेस, 4“हमरे करार क इ हींसा मोर अहइ। मई तोहका कइउ रास्ट्र क बाप बनाउब। 5मई तोहरे नाउँ क बदल देब। तोहार नाउँ अब्राम नार्हीं होइ। तोहार नाउँ इब्राहीम होइ। मई तोहका इ नाउँ ऐह बरे देत अहउँ कि तू बहोत स रास्ट्रन क बाप बनब्या। 6“मई तोहका बहोत संतानन देब। तोहसे नवा रास्ट्र अउर राजा लोग पइवा होइहीं। 7अउर मई आपन अउ तोहरे बीच एक करार करब। इ करार तोहरे सबहिं संतानन बरे होइ। मई तोहार अउ तोहरे सबहिं संतानन क परमेस्सर रहब। इ करार सदा बनी रही। 8अउर मई इ प्रदेस तोहका अउ तोहरे सबहिं संतानन क देब। मई उ प्रदेस तोहका देब जेहसे होइके तू जात्रा करत रहब्या। मई तोहका कनान प्रदेस देब।

मई तोहका इ प्रदेस सदा बरे देब अउर मई तोहार परमेस्सर रहबा।”

9परमेस्सर इब्राहीम स कहेस, “अब करार क इ हींसा तोहार हींसा अहइ। मोर इ करार क मानब तू अउ तोहार संतानन करिहीं। 10इ उ करार अहइ कि जेका तू मनब्या। इ करार मोरे अउ तोहरे बीच अहइ। इ तोहरे सबहिं संतानन बरे अहइ। हर एक लरिका जउन पइदा होइ ओकर खतना जरूर होइ। 11तू बाहरी चाम क एक निसान बरे कटब्या कि तू आपन अउ मोरे बीच क करार क मानत रहब्या। 12जब लरिका आठ दिन क होइ जाइ तब तू ओकर खतना करया। हर एक लरिका जउन तोहरे मनइयन क बीच पइदा होइ या कउनो लरिका जउन विदेसी स खरीदइ भवा तोहार दास स पइदा होइ, ओकर खतना जरूर होइ। 13इ तरह तोहरे रास्ट्र क हर एक लरिका क खतना होइ। जउन लरिका तोहरे परिवारे में पइदा होइ या दास क रुप में बसेहा जाइ ओकर खतना होइ। 14इहइ मोर नेम अहइ अउर मोरे अउ तोहरे बीच करार अहइ। जउन कउनो मनई क खतना नाहीं होइ उ आपन मनइयन स अलगाइ दीन्ह जाइ। काहेकि उ मनई मोरे करार क तोड़ दिहस।”

इसहाक प्रण क पूर

15परमेस्सर इब्राहीम स कहेस, “मई सारै क जउन तोहार मेहरारु अहइ, नवा नाम देब। ओकर नाउँ सारा होइ। 16मई ओका असीस देब। मई ओका पूत देब अउ तू बाप होइ। उ बहोत स नए रास्ट्रन क महतारी होब्या। ओहसे रास्ट्रन क राजा लोग पइदा होइहीं।”

17इब्राहीम आपन मूँड़ी परमेस्सर क भगति देखावइ बरे जमीन कईंती निहुराएस। मुला उ हँसा अउ आपन स बोला, “मई सौ बरिस क होइ ग अहउँ। मई पूत नाहीं पइदा कइ सकत हउँ अउ सारा नब्बे बरिस क बुढ़िया बाटइ। उ लरिकन क जन्म नाहीं दइ सकत।”

18तउ इब्राहीम परमेस्सर स कहेस, “मोका उमीद अहइ कि इस्माएल जिइहीं अउ तोहार सेवा करइहीं?”

19परमेस्सर कहेस, “नाहीं, मई कहेउँ कि तोहार मेहरारु सारा पूत क जन्म देइ। तू ओकर नाउँ इसहाक रखब्या। मई ओकरे संग करार करब। इ करार अइसा होइ जउन ओकरे सबहिं संतानन क संग सदा बनी रही।

20“तू इस्माएल क नाउँ लिहस अउर मई तोहार बात सुनेउँ। मई ओका असीसब। ओकरे बहोत स सन्तानन होइहीं। उ बारह बड़का राजा क बाप होइ। ओकर परिवार एक बहोत बड़ा रास्ट्र बनी। 21मुला मई आपन करार इसहाक क संग करब। इसहाक ही उ पूत होइ जेका सारा पइदा करी। इ पूत अगला बरिस में इहइ टेम में, पइदा होइ।”

22परमेस्सर जब इब्राहीम स बात करब बन्द किहस, इब्राहीम अकेल्ला रहि गवा। परमेस्सर इब्राहीम क लगे स आकास कईंती उठि गवा। 23परमेस्सर कहे रहा कि तू अपने परिवार क सबहिं लरिकन अउ मनइयन क खतना करया। ऐह बरे इब्राहीम इस्माएल अउ आपन घरे में पइदा भए सबइ नउकर लोगन क एक संग बोलाएस। इब्राहीम ओन नउकर लोगन क एक संग बोलाएस जउन धने स बेसहा ग रहेन।

इब्राहीम क घर क सबहिं मनसेधू अउ लरिकन बटुरेन अउ ओन सबहिं क खतना उहइ दिन ओनकइ बाहरी चाम काटिके कइ दीन्ह गवा। इब्राहीम ओन लोगन क खतना ठीक उहइ तरह स किहेस जे तरह परमेस्सर कहे रहेन। 24जब इब्राहीम क खतना भवा उ नन्यानबे बरिस क रहा। 25अउर ओकर पूत इस्माएल आपन खतना होइके टेम तेरह बरिस क रहा। 26इब्राहीम अउ ओकरे पूत क खतना उहइ दिन भवा। 27उहइ दिन इब्राहीम क सबहिं मनइयन क खतना भवा। इब्राहीम क घरे में पइदा भए सबहिं मनइयन क अउ बेसहा गए सबहिं दासन क खतना उहइ दिन भवा।

तीन ठु मेहमान

18 पाछे यहोवा फुन इब्राहीम क समन्वा परगट भवा। इब्राहीम मग्रे क बलूत क बृच्छन क लगे रहत रहा। एक दिन, इब्राहीम दिन क सब स गर्म पहर में तम्बू क दुआरे बइठा रहा। 2इब्राहीम आँखि उठाइके लखेस अउ आपन समन्वा तीन मनइयन क खड़ा निहारेस। जबहिं इब्राहीम मनइयन क लखेस, उ ओनके लगे गवा अउ ओनका पैलगी किहेस। 3इब्राहीम कहेस, “साहेब लोगो! आप आपन इ सेवक क संग तनिक देर रुकि जाईं। 4मई आप लोगन बरे गोड़वा पखारइ खातिर पानी लइ आवत अहउँ। आप बृच्छन क खाले सुहताइ लेईं। 5मई आप पचन क कछू खइया के लिआवत अहउँ अउ आप लोग जेतना चाहईं खाइ लेईं। ऐंकरे पाछे आप सबइ आपन जात्रा प जाब सुरु कइ सकत हीं।”

तीनउँ कहेन, “इ बहोतइ बड़िया बा। तू जइसा कहत बाट्या, करा।”

6इब्राहीम हाली स तम्बू में घुसा। इब्राहीम सारा स कहेस, “हाली हाली तीन ठु रोटी बरे आटा साना।” 7तब इब्राहीम आपन गोरुअन कईंती भागा। इब्राहीम सबन त नीक एक ठु जवान बछवा लिहस। इब्राहीम बछवा नउकर क दिहस। इब्राहीम नउकर स कहेस कि तू हाली हाली करा, इ बछवा क मारा अउ खइया खातिर तइयार करा। 8इब्राहीम तीनहुँ क खाइ बरे गोस दिहस। उ दूध अउ माखन भी दिहस। जब तलक तीनहुँ मनई खात रहेन तब तलक इब्राहीम बृच्छ क खाले ठाड़ रहा।

9उ मनइयन इब्राहीम स कहेस, “तोहार मेहरारु सारा काहें बा?”

इब्राहीम कहेस, “उ तम्बू में बा।”

10तब यहोवा कहेस, “मई बसन्त में फुन आउब। उ टेम तोहार मेहरिया सारा एक ठु पूत क जन्मी।”

सारा तम्बू में अनकत रही अउर उ इ बातन क सुनेस। 11इब्राहीम अउ सारा बहोत बुढ़ाइ ग रहेन। सारा लड़कोर होइ क उमिर क पार कइ चुकी रही।

12सारा आपन आप प हँसी। उ आपन स कहेस, “मई अउ मोर भतार दुइनउँ बुढ़ान बाटेन। मई लरिका जन्मइ बरे ढेर बुढ़ाइ गइ अहउँ।”

13तब यहोवा इब्राहीम स कहेस, “इ सोचत भवा सारा काहे हँसेन कि, ‘मई ऐतना बूढ़ी हउँ कि लरिका नाहीं पइदा कइ सकत हउँ?’ 14का यहोवा बरे कछू भी असंभव बाटइ?”

नाहीं, मई फुन बसन्त में आपन बताए भए टेम प आउब अउ तोहार मेहरारु सारा पूत क जन्म देइ।”

15मुला सारा कहेस, “मई हसेउं नाहीं।” उ अइसा कहेस, काहेकि उ डेगन रही।

मुला यहोवा कहेस, “नाही, मई जानत हउं कि तोहार कहब सही नाहीं अहइ। तू जरुर हँसिउ हा।”

16तब उ मनइयन जाइ बरे उठेन। उ पचे सदोम कइँती लखेन अउ उहइ कइँती चल पड़ेन। इब्राहीम ओनका बिदा करइ बरे कछू दूर तलक ओनके संग गवा।

परमेस्सर क संग इब्राहीम क सौव

17यहोवा मन में कहेस, “का मई इब्राहीम स कहि देउं जउन मई अबहुँ करब? 18इब्राहीम एक बड़का सक्तीवाला रास्ट्र बन जाइ। इ कारण स धरती क सारे मनइयन आसीबादि पइहीं। 19मई इब्राहीम क संग खास करार किहेउं ह। मई इ ऐह बरे किहेउं ह कि उ आपन लरिकन अउ आपन संतानन क तरह जिन्नगी बितावइ बरे हुकुम देइ जउने तरह जिन्नगी बिताउब यहोवा चाहत ह। मई इ ऐह बरे किहेउं ह कि उ पचे सच्चाई स रइहीं अउर इन्साफ पसन्द बनिहीं। तब मई यहोवा प्रण कीन्ह गइ चीजन क देब।”

20तब यहोवा कहेस, “सदोम अउर गमोरा का चीख-पुकार बहोत जबरदस्त अहइ। ओनका पाप बहोत गम्भीर अहइ। 21एह बरे मई हुँवा जाब अउर देखब कि जउन कूछ मई सुन्या ह, यदि उ सही बा तब मई जानब कि उ सही बाटइ या गलत।”

22तब उ मनइयन घूमेन अउ सदोम कइँती चल पड़ेन। मुला इब्राहीम यहोवा क समन्वा खड़ा रहा। 23तब इब्राहीम यहोवा स बोला, “हे यहोवा, का तू खोट मनइयन क नास करइ क संग भले मनइयन क नास करइ क बात सोचत अहा? 24जदि उ सहर में पचास भला मनई होइँ तउ का होइ? का तब भी तू सहर क नास कइ देब्या? फुरइ ही तू हुँआ क बसइया पचास भले मनइयन बरे उ सहर क बचाइ लेब्या। 25फुरइ ही तू उ सहर क नास न करब्या। खोट मनइयन क मारइ बरे तू पचास भले मनइयन क नास न करब्या। अगर अइसा भवा तउ भला अउ खोटा लोग एक ही होइ जइहीं। दुइनउँ क ही सजा मिली। तू समूचइ भुइँया क निआव देइवाला अहा। मई जानत अहउँ कि तू निआव करब्या।”

26फुन यहोवा कहेस, “जदि मोका सदोम सहर में पचास भला लोग मिलइँ तउ मई समूचइ सहर क बचाइ लेब।”

27तब इब्राहीम कहेस, “हे यहोवा, तोहरे अगवा, मई सिरिफ धूर अउ राख अहउँ। मुला तू मोका फुन तनिक कस्ट देइ क मौका द्या अउ मोका इ प्रस्न पूछइ द्या कि: 28जदि पाँच नीक लोग कमती होइँ तउ का होइ? जदि सहर में पैतालीस ही नीक लोग होइँ तउ का होइ? का तू सिरिफ पाँच लोगन बरे समूचइ सहर क नास करिब्या?” तब यहोवा कहेस, “जदि मोका हुओँ पैतालीस नीक लोग मिलइँ तउ मई सहर क नास न करब।”

29इब्राहीम फुन यहोवा स कहेस, “जदि तोहका हुओँ सिरिफ चालीस नीक लोग मिलइँ तउ का तू सहर क नास

कइ देब्या?” यहोवा कहेस, “अगर मोका चालीस बड़िया लोग हुओँ मिलइँ तउ मई सहर क बर्बाद न करब।”

30तब इब्राहीम कहेस, “हे यहोवा कृपा कइके मोहे प किरोध जिन करा। मोका इ पूछइ द्या कि अगर सहर में सिरिफ तीस नीक लोग होइँ तउ का तू सहर क नास कइ देब्या?”

यहोवा कहेस, “जदि मोका तीस नीक लोग मिलइँ तउ मई सहर क बर्बाद न करब।”

31तब इब्राहीम कहेस, “हे यहोवा, का मई तोहका फुन कष्ट देउँ अउ पूछ लेउँ कि जदि बीस ही सहर में नीक लोग हुओँ होइँ तउ?”

यहोवा जवाब दिहस, “अगर मोका बीस बड़िया लोग मिलइँ तउ भी मई सहर क नास न करब।”

32तब इब्राहीम कहेस, “हे यहोवा तू मोहे प गुस्सा जिन करा। मोका आखिरी दाई कस्ट देइ क मौका द्या। जदि तोहका हुओँ दस बड़िया लोग मिलइँ तउ तू का करिब्या?”

यहोवा कहेस, “जदि मोका सहर में दस नीक लोग मिलइँ तउ भी मई सहर क नास न करब।”

33यहोवा इब्राहीम स बोलब बंद कइ दिहस, ऐह बरे यहोवा चला गवा अउ इब्राहीम आपन घर लउटि आवा।

लूत क अतिथि

19 ओनमों स दुइ सरगदूत संझा क सदोम सहर में आएन। लूत सहर क दुआर प बइठा रहा अउ उ सरगदूतन क लखेस। लूत विचारेस कि उ पचे सहर क बीचउ बीच स जात्रा करत अहइँ। लूत उठा अउ सरगदूतन क लगे गवा अउ भुइँया तलक निहुरा। 2लूत कहेस, “महोदय, कृपा कइके मोरे घर चलइँ अउर मई आप लोगन क सेवा करब। हुओँ आप लोग आपन गोइ धोइ सकत हीं अउर रात में रुकि सकत हीं। तब भियान आप लोग आपन जात्रा सुरु कइ सकत हीं।”

सरगदूतन जवाब दिहन, “नाहीं, हम पचे सहर क चौराहे में रुकब।”

3मुला लूत आपन घर चलइ बरे बार बार कहत रहा। इ तरह सरगदूत लूत क घर जाइ बरे तइयार होइ गएन। जब उ पचे घरे पहोँचेन तउ लूत ओनका कछू पिअइ बरे लइ आवा। लूत ओनके बरे रोटी बनाएस। लूत क बनावा भवा भोजन सरगदूत खाएन।

4उ संझा क सोवइ क टेम स पहिले ही उ सबइ मँ स सदोम क जवान अउर बूढ़े दुइनउँ मनइयन लूत क घरे आएन। सदोम क मनइयन लूत क घर घेरि लिहन अउ पूछेन। 5उ पचे कहेन, “आज राति क जउन लोग तोहरे लगे आएन, उ सब दुइनउँ मनई कहीं बाटेन? उ मनइयन क बाहेर हमका दइ द्या। हम ओनके संग संभोग करइ चाहत हा।”

6लूत बाहेर निकरा अउ आपन पाछे स दरवाजा बंद कइ दिहस। 7लूत मनइयन स कहेस, “नाहीं मोर भाई लोगो, मई बिनती करत हउँ कि आप इ बुरा कर्म न करइँ। 8लखा, मोरे दुइ बिटिया अहइँ, उ सबइ एँकरे पहिले कउनो मनई क संग नाहीं सोई अहइँ। मई आपन बिटियन क तू मनइयन क दइ देत अहउँ। तू लोग ओनके संग जउन चाहा कइ सकत

ह। मुला इ मनइयन क संग कछू न करा। इ सब लोग हमरे घरे आवा अहइँ अउर मईँ ऐनकइ रच्छा जरुर करबा।”

9घरे क चारिहुँ कइँती क मनइयन जवाब दिहिन, “राहे स हटि जा।” तब मनइयन आपन मने में बिचार किहिन, “इ मनई लूत हमरे सहर में मेहमान क रुप में आवा अहइ। अब इ सिखावइ चाहत ह कि हम पचे कैसे जिन्नगी गुजारइ चाही।” तब उ पचे लूत स कहेन, “हम पचे ओनसे भी जियादा बुरा तोरे संग करबा।” एँह बरे उ मनइयन लूत क घेरि क ओकरे निअरे आउब सुरु किहिन। उ सबइ दरवाजा क तोड़िके खोलइ चाहत रहेन।

10मुला लूत क संग क ठहरे भए मनइयन दरवाजा खोलेन अउ लूत क घरे क भीतर हींच लिहेन। तब उ पचे दरवाजा बंद कइ दिहिन। 11दुइनउँ मनइयन दरवाजे क बाहेर क मनइयन क आँधर कइ दिहिन। इ तरह घरे में घुसरइ क जतन करइ वालन जवान अउ बुढ़वा सबइ आँधर होइ गएन अउर दरवाजा न पाइ सकेन।

सदोम स बच निकरब

12दुइनउँ मनइयन लूत स कहेन, “का इ सहर में अइसा कउनो मनई अहइ जउन तोहरे परिवारे क बाटइ? का तोहार दामाद, तोहार बिटिया या दूसर कउनो तोहरे परिवारे क मनई अहइ? जदि कउनो दूसर इ सहर में तोहरे परिवार क बाटइ तउ तू अबहिँ सहर तजि देइ बरे कहि द्या। 13हम पचे इ सहर क बर्बाद करब। यहोवा ओन सबहिँ बुराइयन क सुनि लिहे अहइ जउन इ सहर में अहइ। एँह बरे यहोवा हम मनइयन क ऐँका नास करइ बरे पठए अहइ।”

14एँह बरे लूत बाहेर गवा अउ आपन दूसर बिटियन स बियाह करइ वालन दामादन स बात किहेस। लूत कहेस, “हाली करा अउ इ सहर क तजि द्या।” यहोवा ऐँका फउरन बर्बाद कइ देइ। मुला उ मनइयन समझेन कि लूत मजाक करत बाटइ। 15दूसर दिन भिन्सारे भोर क टेम ही सरगदूत लूत स हाली करइ क कोसिस किहस। उ पचे कहेन, “लखा इ सहर क सजा मिली। एँह बरे तू आपन मेहरारु अउ तोहरे संग जउन दुइ बिटियन जउन अबहिँ तलक अहइँ, ओनका लइके इ जगह तजि द्या। तबहिँ तू सहर क संग बर्बाद न होब्या।”

16मुला लूत देर करइ लगा अउ सहर तजि देइ क उ हाली नाहीं किहेस। एँह बरे सरगदूतन लूत, ओकर मेहरारु अउ ओकर दुइनउँ बिटियन क हाथ धइ लिहिन, काहेकि ओन पइ यहोवा क द्या रहा। उ दुइनउँ लूत अउ ओकरे परिवार क सहर क बाहेर पहुँचाएन। लूत अउ ओकरे परिवार प यहोवा क कृपा रही। 17एँह बरे दुइनउँ लूत अउ ओकरे परिवार क सहर क बाहेर पहुँचाइ दिहिन। जब उ पचे बाहेर होइ गएन तउ ओनमें स एक कहेस, “आपन जिन्नगी बचावइ बरे पराइ जा। सहर कइँती घूमिके जिन लखा। इ घाटी में कउनो जगह जिन रुका। तब तलक परत रहा जब तलक पहाड़े में न जाइके पहुँचा। अगर तू अइसा नाहीं करत्या, तउ तू सहर क संग नस्ट होइ जाब्या।”

18तब लूत दुइनउँ स कहेस, “श्रीमान लोगो, कृपा कइके ऐँतना दूर दौड़इ बरे बेबस जिन करा। 19आप लोग मो सेवक

प ऐँतनी कृपा किहा ह। आप लोग मोका बचावइ क कृपा किहा ह। मुला मईँ पहाड़ी ताईँ नाहीं दौड़ि सकत हउँ। अगर मईँ जरुरत स जियादा धीमे धीमे दौड़उँ तउ कछू बुरा होइ अउ मईँ मारा जाब। 20मुला लखइँ हिआँ निअरे एक बहोत छोटा सहर बाटइ। हम पचन क उ सहर तलक दौड़इ द्या। तब हमार जिन्नगी बचि जाइ।”

21सरगदूत लूत स कहेस, “ठीक बाटइ, मईँ तोहका अइसा ही करइ देब। मईँ उ सहर क नास नाहीं करब जेहमें तू जात अहा। 22मुला हुआँ तलक तेज दउड़ा। मईँ तब तलक सदोम क बर्बाद नाहीं करब जब तलक तू उ सहर में सुरच्छित नाहीं पहुँच जात्या।” (इ सहर क नाउँ सोअर अहइ काहेकी इ छोट अहइ।)

सदोम अउ अमोरा बर्बाद कीन्ह गएन

23जब लूत सोअर में घुसत रहा, भिन्सारे क सूज चमकइ लाग 24अउर यहोवा सदोम अउ अमोरा क बर्बाद करब सुरु कइ दिहस। यहोवा आगी अउ बरत भवा गन्धक क अकासे स खाले बरसाएस। 25इ तरह यहोवा उ सहरन क अउर समूची घाटी क बर्बाद कइ दिहस अउ सबहिँ जिअत मनइयन अउ सबहिँ पेड़-पौधन क बर्बाद कइ दिहस। 26जब उ पचे परत रहेन, तउ लूत क मेहरारु घूमिके सहर क निहारेस। जब उ घूमिके लखेस तब उ एक नोन क भीटा होइ गइ।

27उहइ दिना बहोत तड़के इब्राहीम उठा अउ उ ठउरे प गवा जहाँ उ यहोवा क समन्वा ठाड़ होत रहा। 28इब्राहीम सदोम अउ अमोरा सहरन कइँती निगाह दौड़ाएस। इब्राहीम उ घाटी क समूची भुइँया कइँती लखेस। इब्राहीम उ पहुँटा स उठत भए घना धुआँ क लखेस। बड़ी खौफनाक आगी स उठत धुआँ क तरह उ देखाइ पड़ा।

29परमेस्सर घाटी क सहरन क नास कइ दिहस। परमेस्सर इब्राहीम क याद किहस अउर लूत क नास नाहीं किहेस। जब उ ओन सहरन क नास किहेस जेहमा लूत रहत रहेन।

लूत अउ ओकर बिटियन

30लूत सोअर में लगातार रहइ स डेरान। एँह बरे उ अउ ओकर दुइनउँ बिटियन पहाड़न में गएन अउर उ हुवँइ रहइ लगेन। उ पचे हुवाँ एक गुफा में रहत रहेन। 31एक दिना बड़की बिटिया छोटकी बिटिया स कहेस, “भुइँया प चारिहुँ कइँती मनसेधू अउ मेहरारु बियाह करत हीं। मुला हिआँ आसपास कउनो मनसेधू नाहीं जेहसे हम बियाह करी। हम पचन क पिता बुढ़ाइ ग बाटेन। 32एँह बरे हम पचे आपन पिता का प्रयोग लरिकन क जन्म देइ बरे करी जेसे हम लोगन क बंस चलि सकइ। हम लोग आपन पिता क लगे चलब अउ अंगरे क दाखरस पिआउब अउ ओका नसा में बुत्त कइ देब। तब हम ओकरे संग सोइ सकित ह।”

33उहइ राति दुइनउँ बिटियन आपन पिता क लगे गइन अउ ओका उ पचे दाखरस पिआइके नसा में बुत्त कइ दिहिन। तब बड़की बिटिया पिता क बिछउना में गइ अउ ओकरे संग सोइ गइ। लूत जियादा नसा में बुत्त रहा। एँह बरे इ न जानि सका कि ओकरे संग कउन सोएस।

34दूसर दिन बड़की बिटिया छोटकी बिटिया स कहेस, “पिछली राति मई आपन पिता क संग सोएउँ। आवा इ रात फुन हम ओका दाखरस पिआइके नसा मँ बुत्त कइ देइ। तब तू ओकरे बिछउना मँ जाइ सकत ह अउर ओकरे संग सोइ सकत ह। इ तरह हम पचन क आपन पिता क प्रयोग लरिकन क जन्म दइके आपन बंस चलावइ बरे करइ चाही।” 35एँह बरे उ दुइनउँ बिटियन आपन पिता क दाखरस पिआइके नसा मँ बुत्त कइ दिहन। तब छोटकी बिटिया ओकरे बिछउना मँ ओलरी अउ ओकरे संग सोएस। लूत इ दाई भी न जानि सका कि ओकर बिटिया ओकरे संग सोएस।

36इ तरह लूत क दुइनउँ बिटिया गर्भ धारण किहेन। ओनका पिता ही ओनके लरिकन क पिता रहा। 37बड़की बिटिया एक पूत क जन्म दिहस। उ बेटवा क नाउँ मोआब धरेस। मोआब ओन सबहिँ मोआबी लोगन क पिता रहा, जउन अब तलक रहत अहइँ। 38छोटकी बिटिया भी एक पूत जन्मेस। इ आपन पूत क नाउँ बेनम्मी धरेस। बेनम्मी ओन सबहिँ अम्मोनी लोगन क पिता अहइ जउन अब तलक रहत बाटेन।

इब्राहीम गारर जात ह

20 इब्राहीम उ ठउरे क तजि दिहस और नेगेव क जात्रा किहेस। इब्राहीम कादेस अउ सूर क बीच गारर मँ बस गवा। 2गारर मँ इब्राहीम मनइयन स कहेस कि सारा मोर बहिन अहइ। गारर क राजा अबीमेलक इ बात सुनेस। अबीमेलक क सारा चाहत रहा एँह बरे उ कछू नउकर ओका लावइ बरे पठाएस। 3मुला एक रात परमेस्सर अबीमेलक स सपन मँ बात किहस। परमेस्सर कहेस, “देखा, तू मरि जाब्या। जउने मेहरारु क तू लिहा ह उ सोहागिन अहइ।”

4मुला अबीमेलक अबहिँ सारा क संग नाहीं सोवा रहा। एँह बरे अबीमेलक कहेस, “हे यहोवा, मई दोखी नाहीं अहउँ। का तू बेदोखी मनई क मरब्या? 5इब्राहीम मोसे खुद कहेस, ‘इ मेहरारु मोर बहिन अहइ’ अउ मेहरारु भी कहेस, ‘इ मनई मोर भाई अहइ।’ मई बेदोखी अहउँ। मई नाहीं जानत रहेउँ कि मई का करत हउँ?”

6तब परमेस्सर अबीमेलक स सपन मँ कहेस, “हाँ, मई जानत हउँ कि तू निर्दोख अहा अउर मई इ भी जानत हउँ कि तू इ नाहीं जानत रह्या कि तू का करत रह्या? मई तोहका बचाएँउ। मई तोहका आपन खिलाफ पाप नाहीं करइ दिहेउँ। इ मई ही रहेउँ जउन तोहका ओकरे संग सोवइ नाहीं दिहेउँ। 7एँह बरे इब्राहीम क ओकर मेहरारु लौटाइ द्या। इब्राहीम एक ठु नबी बाटइ। उ तोहरे बरे पराथना करी अउर तू जिअत रहब्या मुला जदि तू सारा क नाहीं लौटउब्या तउ मई सरापत हउँ कि तू मरि जाब्या। तोहार सारा परिवार तोहरे संग मरि जाइ।”

8एँह बरे दूसर दिन बहोत भिंसारे अबीमेलक आपन सबइ नउकरन क बोलाएस। अबीसेलेक सपने मँ भइ सारी बातन क ओनका बताएस। नउकर बहोतइ डेराइ गवा। 9तब अबीमेलक इब्राहीम क बोलाएस अउ ओसे कहेस, “तू हम

पचन क संग अइसा काहे किहा? मई तोहार का बिगाड़ेउँ ह? तू इ झूठ काहे बोल्या कि उ तोहार बहिन अहइ। तू हमरे राज प बहोत बड़ी बिपत्ति लइ आवा ह। इ बात तोहका मोरे संग नाहीं करइ चाही। 10तू कउने बात स डेरात अहा? तू इ सबइ बातन मोरे संग काहे किहा ह?”

11तब इब्राहीम कहेस, “मई ससान रहेउँ। काहेकि मई सोचेउँ कि हिआँ कउनो भी परमेस्सर क आदर नाहीं करत। मई बिचारेउँ कि सारा क पावइ बरे कउनो मोका मारि डाइ। 12उ मोर मेहरारु अहइ, मुला उ मोर बहिन भी अहइ। उ मोरे पिता क बिटिया तउ अहइ मुला मोरी महतारी क बिटिया नाहीं अहइ। 13परमेस्सर मोका मोरे पिता क घरे स दूर पहाँचाए अहइ। परमेस्सर कइयऊ अलग अलग पहुँटा मँ मोका भटकाएस। जब अइसा भवा तउ मई सारा स कहेउँ, ‘मोरे बरे कछू करा। जहाँ कहुँ भी हम जाइ तू मनइयन स कहा कि तू मोर बहिन अहा।”

14अब अबीमेलक जान लिहेस कि का होइ चुका बाटइ। एँह बरे अबीमेलक इब्राहीम क सारा लौटाइ दिहस। अबीमेलक इब्राहीम क कछू भेड़िन, जनावर अउ दास भी दिहस। 15अबीमेलक कहेस, “तू चारिहुँ कइँती लखि ल्या। इ मोर देस अहइ। तू जउने ठउर चाहा, रहि सकत ह।”

16अबीमेलक सारा स कहेस, “लखा, मई तोहरे भाई क एक हजार चँदी क टूक दिहेउँ ह। मई इ एँह बरे किहेउँ ह कि जउन कछू भवा ओहसे मई दुःखी अहउँ। मई चाहत हउँ कि हर एक मनई इ लखइ कि मई नीक काम किहेउँ ह।”

17-18परमेस्सर अबीमेलक क ओकर पत्नी क अउर ओकर मेहरारु नउकरन क लरिका जन्मइ क अयोगग बनाएस। परमेस्सर उ एँह बरे किहस कि उ इब्राहीम क मेहरारु सारा क बइठाइ लिहे रहा। मुला इब्राहीम परमेस्सर स पराथना किहस अउ परमेस्सर अबीमेलक, ओकर मेहरारुअन अउ दास-कन्या क चंगा कइ दिहस।

आखिर मँ सारा क एक लरिका

21 अब यहोवा सारा लगे आपन काहेकि उ कहेस रहा, अउर उ सारा बरे उहइ किहेस जउन उ करइ क वादा किहे रहा। 2सारा गरभ धरेस अउर इब्राहीम बरे ओकर बुढ़ापे मँ एक लरिका क जन्मेस। सही टेम प जइसा परमेस्सर वचन दिहे रहा वइसा ही भवा। 3सारा पूत जन्मेस अउ इब्राहीम ओकर नाउँ इसहाक राखेस। 4परमेस्सर क हुकुम क मुताबिक इब्राहीम आठ दिन होए प इसहाक क खतना किहस।

5इब्राहीम सौ बरिस क रहा जब ओकर पूत इसहाक पइदा भवा 6अउ सारा कहेस, “परमेस्सर मोका सुखी बनाइ दिहस ह। हर एक मनई जउन इ बारे मँ सुनी उ मोहसे खुस होइ। 7कउनो भी इ नाहीं सोचत कि मई सारा इब्राहीम बरे पूत देबउँ। मुला मई इब्राहीम क ओकरे बुढ़ापे क उमर मँ एक ठु पूत दिहेउँ ह।”

घरे मँ परेसानी

8अब बचवा ऐतना बाढ़ गवा कि महतारी क दूध तजिके ठोस भोजन सुरु करइ। जउने दिन ओकर दूध छोड़वावा गवा

उ दिन इब्राहीम एक बहोत बड़का भोज दिहस। 9बीते भए टेम में मिस्त्र क दासी एक ठु पूत क जन्मेस। इब्राहीम उ पूत क बाप रहा। सारा लखेस कि हाजिरा क पूत इसहाक क तंग करत ह। 10एँह बरे सारा इब्राहीम स कहेस, “उ दासी मेहरारु अउ ओकरे पूत क हिआँ पठइ द्या। जब हम पचे मरब हम पचन क सबहिं चिजियन इसहाक क मिलिहीं। मई नहीं चाहत कि ओकर पूत इसहाक क संग ओन चिजियन में हीसा लेइ।”

11इस्माएल क बरे इ कीन्ह जाना एका सोच इब्राहीम क बहोत ज्यादा दुःखी कइ दिहन। 12मुला परमेस्सर इब्राहीम स कहेस, “उ लइका क बारे में दुःखी जिन हवा। उ दासी क बारे में दुःखी जिन हवा। जउन सारा चाहत ह तू उहइ करा। तोहार बंस इसहाक क बंस स चली। 13मुला मई तोहरे दासन क पूतन क असीसब। उ तोहार पूत अहइ एँह बरे मई ओकरे परिवार क भी एक बड़ा रास्ट्र बनाउबा।”

14दूसर दिन बहोत भिन्सारे इब्राहीम कछू भोजन अउ पानी लिहस। इब्राहीम इ चीजन हाजिरा क दइ दिहस। हाजिरा उ सबहि चीजन क लिहस अउ बच्चा क संग दूर चली गइ। हाजिरा उ ठउर तजि दिहस अउर उ बेसीबा क रेगिस्तान में भटकइ लाग।

15कछू टेम पाछे हाजिरा क सारा पानी खतम होइ गवा। पिअइ बरे कछू पानी भी नहीं बचा। एँह बरे हाजिरा आपन लरिका क एक झाड़ी तरे राखेस। 16हाजिरा हुआँ स कछू दूर गइ। तब उ रुकी अउ बइठि गइ। हाजिरा सोचेस कि ओकर पूत मरि जाइ काहेकि हुआँ पानी नहीं रहा। उ ओका मरता भवा नहीं देखइ चाहत रही। उ हुआँ बइठि गइ अउ रोवइ लाग।

17यहोवा लरिका क रोउब सुनेस। सरग स एक दूत हाजिरा क लगे आवा। उ पूछेस, “हाजिरा, तोहका का तकलीफ अहइ। डेराउ नहीं काहेकि परमेस्सर हुवाँ लरिका क रोउब सुन लिहस। 18जा, अउर आपन पूत क सँभारा। ओकर हाथ धइ ल्या अउ ओका संग लइ चला। मई ओका बहोत बड़का रास्ट्र क पिता बनाउबा।”

19परमेस्सर हाजिरा क आँखी इ तरह खोलेस कि उ एक पानी क कुआँ निहारि सकी। एँह बरे हाजिरा कुआँ प गइ अउ उ थैला क पानी स भरि लिहस। तब उ बच्चा क पानी पिअइ बरे दिहस। 20बच्चा जब तक बाढ़ा नहीं तब तलक परमेस्सर ओकरे संग रहा। इस्माएल रेगिस्तान में रहा अउ एक सिकारी बन गवा। उ बहोत बढ़िया तीर चलाउब सीख लिहस। 21ओकर महतारी मिस्त्र स ओकरे बरे दुल्हन लइ आइ। उ पचे सबइ पारान रेगिस्तान में रहइ लागेन।

इब्राहीम अबीमेलेक स सौदा करत ह

22तब अबीमेलेक अउ पीकोल इब्राहीम स बात किहन। पीकोल अबीमेलेक क फउज क सेनापति रहा। उ पचे इब्राहीम स कहेन, “तू जउन कछू करत अहा, परमेस्सर तोहार साथ देत ह। 23एँह बरे तू परमेस्सर क समन्वा इ बचन द्या कि तू मोरे अउ मोरे बच्चन बरे भला रहब्या। तू इ बचन द्या कि तू मोरे बरे अउ जहाँ तू रह्या ह उ देस बरे दयालु रहब्या। तू इ भी बचन द्या कि मई तोहरे बरे

जेतना दयालु रहा ओतना तू मोहे प दयालु रहब्या।” 24इब्राहीम कहेस, “मई बचन देत हउँ कि तोहसे मई वइसा ही बिउहार करब जइसा तू मोरे संग बिउहार किया ह।” 25तब इब्राहीम अबीमेलेक क ओराहना दिहस। इब्राहीम एँह बरे ओराहना दिहस कि अबीमेलेक क नउकरन पानी क कुआँ प कब्जा कइ लिहन।

26अबीमेलेक कहेस, “एँकरे बारे में मई इ पहिली बार सुनेउँ ह। मोका पता नहीं बाटइ, कि इ के किहसे ह अउर तू भी एँकर चर्चा मोहसे एँहसे पहिले कबहुँ नहीं किह्या।”

27एँह बरे इब्राहीम अउ अबीमेलेक एक समझौता किहन। इब्राहीम समझौता क सबूत क रुप में अबीमेलेक क कछू भेड़िन अउ गोरु दिहस। 28इब्राहीम सात ठु मादा भेड़ी क बच्चा भी अबीमेलेक क समन्वा लावा। 29अबीमेलेक इब्राहीम स पूछेस, “तू इ सबइ सात ठु भेड़ी क मादा बच्चन क काहे अलगाइ कइ दिह्या?”

30इब्राहीम कहेस, “जब तू इ सातहु* भेड़ी क बच्चन स मोहसे लेब्या तउ इ सबूत रही कि इनारा मइ खनेउँ ह।”

31एँह बरे एँकरे पाछे उ इनारा बेसीबा कहवावा गवा। उ पचे इनारा क इ नाउँ दिहन काहेकि इ उ ठउर रहा जहाँ उ पचे एक दूसर क बचन दिहे रहेन।

32इ तरह इब्राहीम अउ अबीमेलेक बेसीबा में एक समझौता किहन। तब अबीमेलेक अउ सेनापति दुइनउँ पलिस्तियन क पहुँटा में लौटि गएन।

33इब्राहीम बेसीबा में झाऊ क एक बृच्छ लगाएस। उ ठउरे प इब्राहीम परमेस्सर, जउन हमेसा रहत ह स पराथना किहस। 34अउर इब्राहीम पलिस्तियन क देस में बहोत समइ तलक रहा।

इसहाक क बलि क रूप में देन

22 इ बातन क पाछे परमेस्सर इब्राहीम क पतियाइ क परीच्छा लेब तय किहस। परमेस्सर ओसे कहेस, “इब्राहीम!” अउ इब्राहीम कहेस, “हाँ!”

2परमेस्सर कहेस, “आपन पूत ल्या, आप इकलौता पूत, इसहाक जेका तू पिरिम करत ह मोरिय्याह प जा। तू उ पहाड़े प जा जेका मई तोहका देखौउब। तू हुआँ आपन पूत क बलिदान देब्या अउ ओका होम बलि क सरुप में मोका अर्पण करिब्या।”

3भिन्सारे इब्राहीम उठा अउ उ गदहा क तइयार किहस। इब्राहीम इसहाक अउ दुइ नउकरन क संग लिहस। इब्राहीम बलि बरे काठ काटिके तइयार किहस। तब उ पचे उ ठउरे प गएन जहाँ जाइ बरे परमेस्सर कहेस। 4उ पचे तीन दिना तलक जात्रा किहेन। ओकरे पाछे इब्राहीम ऊपर लखेस अउ दूरी प उ ठउरे क निहारेस जहाँ उ पचे जात रहेन। 5तब इब्राहीम आपन नउकरन स कहेस, “हिआँ गदहा क संग ठहरि जा। मई आपन पूत क उ ठउरे लइ जाब अउ आरधना करब। तब हम पाछे लौटि आउबा।”

6इब्राहीम बलि बरे लकड़ी क आपन पूत क काँधे प धरेस। इब्राहीम एक खास छुरी अउ आगी लिहस। तब

सात बरे हिब्रू सब्द या बचन दे जइसा अहइ। यह बरे सात गोरु ओका बचन देइ क सबूत रहेन।

इब्राहीम अउ ओकर पूत दुइनउँ आराधना बरे उ ठउरे प एक संग गएन।

7इसहाक आपन बाप इब्राहीम स कहेस, “पिताजी!”

इब्राहीम जवाब दिहस, “हैं, बेटवा।” इसहाक कहेस, “मई ईधन अउ आगी तउ लखत हउँ, मुला उ भेड़ा कहीं बाटइ जेका हम बलि क रुप में बारब?” 8इब्राहीम जवाब दिहस, “बेटवा, परमेस्सर बलि बरे भेड़ा अपने आप जुटावत बाटइ।”

इसहाक बचावा गवा

इ तरह इब्राहीम अउ ओकर पूत उ ठउर संग संग गएन। 9उ पचे उ ठउरे प पहोंचेन जहीं परमेस्सर पहोंचइ क कहे रहा। हुआँ इब्राहीम बलि क एक वेदी बनाएस। इब्राहीम वेदी प काठ धरेस। तब इब्राहीम आपन पूत क बाँधेस। इब्राहीम इसहाक क वेदी क काठे प धरेस। 10तब इब्राहीम आपन छुरी निकारेस अउ आपन पूत क मारइ क तइयारी किहस।

11तब यहोवा क सरगदूत इब्राहीम क रोक दिहस। दूत सरग स गोहराएस अउ कहेस, “इब्राहीम, इब्राहीम।” इब्राहीम जवाब दिहेस, “हैं।”

12सरगदूत कहेस, “तू आपन पूत क जिन मारा या ओका कउनो तरह क चोट जिन पहोंचावा। मई अब लखि लिहउँ कि तू परमेस्सर क सम्मान करत ह अउ ओकर हुकुम मानत ह। मई लखत हउँ कि तू आपन इकलौता पूत क मोरे बरे मारइ क तइयार बाटया।”

13इब्राहीम ऊपर निगाह किहेस अउ एक भेड़ा क लखेस। भेड़ा क सींग झाड़ी में अरझ गइ रहिन। एँह बरे इब्राहीम हुआँ गवा अउर भेड़ा क धइ लिहस अउ ओका मारि डाएस। इब्राहीम भेड़ा क आपन पूत क जगह प बलि दिहस। 14एँह बरे इब्राहीम उ जगह क नाउँ “यहोवा यिरे” राखेस। आज भी लोग कहत हैं, “इ पहाड़े क चोटी प यहोवा क लखा जाइ सकत ह।”

15यहोवा क सरगदूत सरग स इब्राहीम क दूसरी दाई गोहराएस। 16सरगदूत कहेस, “तू मोरे बरे आपन पूत क मारइ बरे तइयार रह्या। इ तोहार इकलौता पूत रहा। तू मोरे बरे अइसा किहा ह एँह बरे मई, यहोवा तोहका वचन देत अहउँ कि 17मई तोहका सचमुच ही असीसब। मई तोहका ओतना ही संतानन देब जेतना अकासे में तारा बाटइँ। इ सबइ एँतना जियादा लोग होइहीं जेतना समुदर क किनारे बालू क कण अउ तोहार लोग आपन सबहिं दुस्मनन क हरइहीं। 18संसार क सबहिं रास्ट्र तोहरे परिवार क जरिये आसीबादि पइहीं। मई इ एँह बरे करब काहेकि तू मोर हुकुम क मान्या ह।”

19तब इब्राहीम आपन नउकरन क लगे लउटा। उ पचे बेसीबा तलक वापसी जात्रा किहन अउ इब्राहीम हुआँ रहइ लाग।

20एकरे पाछे, इब्राहीम क इ समाचार मिला। समाचार इ रहा, “तोहार भाई नाहोर अउ ओकर मेहरारु मिल्का क अब गदेलन अहइँ। 21पहिला पूत ऊस अहइ। दूसर पूत क नाउँ बूज अहइ। तीसर पूत अराम क बाप कमूल अहइ। 22एकरे अलावा केसेद, हजो, पिल्दास, यिदलाप अउ बतूल

बाटइ।” 23बतूल रिबका क बाप रहा। मिल्का इ सबइ आठहु पूतन क महतारी रही अउ नाहोर पिता रहा। नाहोर इब्राहीम क भाई रहा। 24नाहोर क दूसर चारि लरिकन ओकरी मेहरारु नउकर स रहेन। इ सबइ पूत तेबह, गहम, तहस अउर माका रहेन।

सारा मरत ह

23 सारा एक सौ सत्ताईस बरिस ज़िअत रही। 2कनान पहुँटा क किर्यतर्बा (हेब्रोन) सहर में मरी। इब्राहीम बहोत दुःखी भवा अउ ओकरे बरे हुआँ रोएस। 3तब इब्राहीम मरी भइ मेहरारु क तजेस अउ हिल्ली लोगन स बात करइ गवा। उ कहेस, 4“मई इ पहुँटा में नाहीं रहत। मई हिआँ सिरिफ एक रही अहउँ। एँह बरे मोरे लगे आपन मेहरारु क गाइइ क कउनो जगह नाहीं बाटइ। मई कछू भुइँया चाहत हउँ जेहमँ आपन मेहरारु क दफनाइ सकूँ।”

5हिल्ली लोगन इब्राहीम क जवाब दिहेन, 6“साहेब, आप हम पचन क बीच परमेस्सर क सक्तीसाली राजकुमार अहइँ। आप आपन मरे भए क दफनावइ बरे सबन त नीक ठउरे प, जउन हम पचन क पास अहइ, लइ सकत हैं। आप हम पचन क कब्रिसतानन में स कउनो भी जगह, जउन आप चाहत हैं, लइ सकत हैं। हम लोगन में स कउनो भी आपक आपन मेहरारु दफनावइ स नाहीं रोकी।”

7इब्राहीम उठा अउ मनइयन कइँती मूँड़ि निहुराएस। 8इब्राहीम ओनसे कहेस, “जदि आप लोग सचमुच मोर मरी भइ मेहरारु क दफनावइ मैं मोर मदद करइ चाहत हैं तउ सोहर क पूत एप्रोन स मोरे बरे बात करइँ। 9मई मकपेला क गुफा क बसेहब पसन्द करब। एप्रोन एकर मालिक अहइ। इ ओकरे खेत क सिरहने प बाटइ। मई एकरे दाम क मुताबिक ओका पूरी कीमत देब। मई चाहत अहउँ कि आप लोग इ बात क साच्छी रहइँ कि मई इ भुइँया क कब्रिस्तान क रुप में खरीदत अहउँ।”

10एप्रोन हुआँइ मनइयन बीच बइठा रहा। एप्रोन इब्राहीम क जवाब दिहस, 11“नाहीं, साहेब। मई आपन सबइ लोगन क समन्वा इ भुइँया तोहका देब। मई आपक उ गुफा देब। मई इ आप क एँह बरे देब कि आप एहमँ आपन मेहरारु क दफनाइ सकइँ।”

12तब इब्राहीम हिल्ली मनइयन क समन्वा आपन मूँड़ि निहुराएस। 13इब्राहीम सबहिं लोगन क समन्वा एप्रोन स कहेस, “मुला मई तो खेते क पूरा दाम देइ चाहत अहउँ। मोर धन अंगीकार करइँ। मई आपन मरे भए क एहमँ गाइब।”

14एप्रोन इब्राहीम क जवाब दिहेस, 15“साहेब, मोरहु सुनइँ। चार सौ चाँदी क सेकेल। हमरे अउ आप क बीच में इ धन कछू भी नाहीं। भुइँया ल्या अउ आपन मरी भइ मेहरारु क गाइ द्या।”

16इब्राहीम समझेस कि एप्रोन ओका भुइँया क दाम बतावत अहइ। एँह बरे हिल्ली लोगन क गवाह मानिके, इब्राहीम चाँदी क चार सौ सेकेल एप्रोन बरे तौलेस। इब्राहीम पइसा उ बइपारी क दइ दिहेस जउन इ भुइँया क बेचइ क धन्धा करत रहा।

17-18इ तरह एप्रोन क खेत क मालिक बदल गएन। इ खेत मग्रे क पूरब मकपेला में रहा। इब्राहीम उ खेत क, गुफा क अउर उ खेत क बृच्छन क मालिक होइ गवा। सहर क सबहि लोग एप्रोन अउ इब्राहीम क बीच भए समझौता क लखेन। 19एकरे पाछे उ आपन मेहरारु सारा क कनान देस क मग्रे क निअरे जउन कि हेब्रोन में अहइ मकफेला क क निअरे उ खेते क गुफा में गाड़ेस। 20इब्राहीम खेत अउ ओकरे गुफा क हिल्ली लोगन स खरीदेस। इ ओकर संपत्ति होइ गइ, अउ उ एँकर बड़परब कब्रिस्तान क रुप में किहस।

इसहाक बरे मेहरारु

24 इब्राहीम बहोत बूढ़ा होइके भी जिअत रहा। यहोवा इब्राहीम क आसीबाद दिहेस अउ ओकरे हर एक काम क सफल होइ दिहेस। 2इब्राहीम क एक सवन त पुरान नउकर रहा जउन इब्राहीम क जउन कछू रहा ओकर प्रबंधक रहा। इब्राहीम उ नउकर क बोलाएस अउ कहेस, “आपन हाथ मोरे जाँघे क नीचे धरा। 3अब मई चाहत हउँ कि तू मोका एक बचन द्या। धरती अउ आकास क परमेस्सर यहोवा क समन्वा तू बचन द्या कि तू कनान क कउनो बिटिया स मोरे पूत क बियाह नाहीं होइ देब्या। हम पचे उ कनानियन क मध्य में रहित ह, मुला कनानी लड़की स ओकर बियाह न करइ द्या। 4तू मोरे देस अउ मोरे आपन मनइयन में लउटिके जा। हुआँ मोर पूत इसहाक बरे एक दुलहिन हेरा।”

5नउकर ओसे कहेस, “इ तउ होइ सकत ह कि उ दुलहिन मोरे संग इ देस में लौटब न चाहइ। तब, का मई तोहरे पूत क तोहरी जन्म भूमि में लइ जाऊँ?”

6इब्राहीम ओसे कहेस, “नाहीं! तू हमरे पूत क उ देस में न लइ जा। 7यहोवा, सरग क परमेस्सर मोका मोरी जन्म भूमि स हिआँ लिआवा। उ देस मोर बाप अउ परिवार क घर रहा। मुला यहोवा इ बचन दिहस कि इ नवा प्रदेस मोरे परिवार वालन क होइ। यहोवा आपन एक सरगदूत तोहरे समन्वा पठएस जेहसे तू मोरे पूत बरे दुलहिन चुनि सका। 8मुला अगर बिटिया तोहरे संग आउब मना करइ तउ तू आपन बचन स छुटकारा पाइ जाब्या। मुला तू मोरे पूत क उ देस में वापिस जिन लइ जा।”

9इ तरह नउकर आपन मालिक क जाँघे तरे आपन हाथ धइके बचन दिहेस।

खोज सुरु होत ह

10नउकर इब्राहीम क दस ठु ऊँट लिहेस अउ उ जगह स उ चला गवा। नउकर कइउ तरह क सुन्नर भेंट आपन संग लइ गवा। उ नाहोर क सहर मेसोपोटामिया गवा।

11उ सहर क बाहर क कुआँ प गवा। इ बात साँझ क भइ जब मेहररुअन पानी भरइ बाहेर आवति हीं। नउकर हुवँइ ऊँटन क गोड़े क घुटना क बल बइठाएस।

12नउकर कहेस, “हे यहोवा, तू मोर सुआमी इब्राहीम क परमेस्सर अहा। आज तू ओकरे पूत बरे मोका एक दुलहिन दिआवा। कृपा कइके मोर मालिक इब्राहीम प दया करा।

13मई हिआँ इ पानी क कुआँ क लगे ठाइ अहउँ अउर पानी भरइ बरे सहर स बिटियन आवति अहइँ। 14मई एक ठु खास चीन्हा क बाट जोहत अहउँ जेहसे मई जान सकउँ कि इसहाक बरे कउन सी बिटिया नीक होइ। इ विसेख चीन्हा अहइ। मई बिटिया स कहेब कि ‘मेहरबानी कइके आपन गगरी क खाले धरइँ जेहसे मई पानी पी सकउँ।’ मई तब समझब कि इ नीक लड़की अहइ जब उ कही, ‘पिआ, अउर मई तोहरे ऊँटन बरे भी पानी देब।’ जदि अइसा होइ तउ तू साबित कइ देब्या कि इसहाक बरे इ बिटियन नीक बाटइ। मई बूझब कि तू मोरे सुआमी प कृपा किह्या हा।”

एक दुलहिन मिली

15तब नउकर क पराथना पूरी होइ स पहिले ही रिबका नाउँ क एक लड़की इनारा प आइ। रिबका बतूएल क बिटिया रही। बतूएल इब्राहीम क भाई नाहोर अउ मिल्का क पूत रहा। रिबका आपन काँधे प पानी क गगरी लइके इनारा प आइ रही। 16लड़की बहोत सुन्नर रही। उ कुआँरी रही। उ कउनो मनई क संग कबहुँ नाहीं सोइ रही। उ आपन कूँड़ा भरइ बरे इनारा प आइ। 17तब नउकर ओकरे नगिचे तलक दौड़िके आवा अउ बोला, “मेहरबानी कइके आपन कूँड़ा स पिअइ बरे तनिक पानी द्या।”

18रिबका हाली हाली काँधे स कूँड़ा क खाले उतारेस अउ ओका पानी पिआएस। रिबका कहेस, “महासय, इ पिअइँ।” 19जइसेन ही उ पिअइ बरे कछू पानी देब खतम किहेस। रिबका कहेस, “मई आप क ऊँटयन क भी पानी पिअइ बरे दइ सकत हउँ।” 20एँह बरे रिबका फउसन कूँड़ा क सब पानी ऊँटयन बरे बना भवा हउदा में उडैरेस। तब उ अउर पानी लइ आवइ बरे इनारा क दौड़ गइ अउ उ सब ऊँटियन क पानी पिआएस।

21नउकर ओका चुपचाप धियान स लखेस। उ इ तय करइ चाहत रहा कि यहोवा साइद इ बात क मान लिहेस ह अउ ओकरी जात्रा क सुफल बनाइ दिहस ह। 22जब ऊँटियन पानी पी लिहन तब उ रिबका क आधा सेकेल जोखिके एक ठु सोना क मुनरी दिहेस। उ ओका दुइ बाजूबंद भी दिहेस जउन जोखे में हर एक दस सेकेल रहेन। 23नउकर पूछेस, “तोहार बाप कउन अहइ? का तोहरे बाप क घरे में एँतनी जगह बाटइ कि हम पचन क रहइ अउ सोवइ क संजाम होइ सकइ?”

24रिबका जवाब दिहेस, “मोर बाप बतूएल अहइँ जउन मिल्का अउ नाहोर क पूत अहइँ।” 25तब उ कहेस, “अउर हौँ हम पचन क लगे तोहरे ऊँट बरे चारा बाटइ अउ तोहरे सोवइ बरे जगह अहइ।”

26नउकर मूँड़ि निहुराएस अउ यहोवा क आराधना किहेस। 27नउकर कहेस, “मोरे सुआमी इब्राहीम क परमेस्सर यहोवा क धन्न हो। यहोवा हमरे सुआमी प दयालु अहइ। यहोवा मोका आपन सुआमी क पूत बरे सही लड़की दिहे अहइ।”

28तब रिबका दौड़ी अउ जउन कछू भवा रहा आपन परिवार क बताएस। 29-30रिबका क एक भाई रहा। ओकर नाउँ लाबान रहा। रिबका ओका उ बातन क बताएस जउन ओसे उ मनई किहे रहा। लाबान ओकर बातन अनकत रहा।

जब लाबान मुनरी अउ बहिनी क बाँह प बाजूबन्द निहारेस तउ उ धाड़के इनारा प पहाँचा अउर हुआँ उ मनई इनारा क लगे, ऊँटियन क बगल में ठाइ रहा।

31लाबान कहेस, “साहेब, आप पधारइँ आप क सुआगत अहइ। आप क हिआँ बाहेर खड़ा नाही रहब बाटइ। मई आपक ऊँटियन बरे एक जगह बनइ दीन्ह ह अउ आप सोवइ बरे एक तु कमरा ठीक कइ दीन्ह ह।”

32एँह बरे इब्राहीम क नउकर लाबान क घर गवा। लाबान ऊँटन पइ स बोझ उतारइ में ओकर मदद किहस अउ ऊँटन क खाइ बरे चारा दिहस। तब लाबान पानी दिहस जेहसे उ मनई अउ ओकरे संग आए भएन दूसर नउकरन आपन गोड़ पखारि सकइँ। 33तब लाबान ओका खाइ बरे दिहस। मुला नउकर खइया क खाइ स मना कइ दिहस। उ कहेस, “मई तब तलक भोजन न करब जब तलक मई इ नाही बताइ देउँ कि मई हिआँ काहे बरे आवा अहउँ।”

एँह बरे लाबान कहेस, “तब हम पचन क बतावा।”

रिबका इसहाक क मेहरारु बनी

34नउकर कहेस, “मई इब्राहीम क नउकर अहउँ। 35यहोवा हमरे सुआमी प हर एक जगह कृपा किहस ह। मोर मालिक महान मनई होइ ग अहइँ। यहोवा इब्राहीम क कइउ भेड़िन क झुण्ड अउ गोरुअन क झुण्ड दिहे अहइ। इब्राहीम क लगे ढेरि क सोना, चाँदी अउ नउकर अहइँ। इब्राहीम क लगे बहोत स ऊँट अउ गदहा अहइँ। 36सारा, मोर सुआमी क पत्नी अहइ। जब उ बहोतइ बुढ़ाइ गइ उ एक पूत क जन्म दिहस अउ हमार सुआमी आपन सब कछू उ पूत क दइ दिहस ह। 37मोर सुआमी मोका एक बचन देइ बरे बेबस किहस। मोर सुआमी मोसे कहेस, ‘तू मोरे पूत क कनान क लरिकी स कउनो भी तरह बियाह नाही करइ देब्या। हम पचे ओनके बीच रहित ह, मुला मई नाही चाहित कि उ कउनो कनानी लरिकी स बियाह करइ। 38एँह बरे तोहका बचन देइ क होइ कि तू मोरे बाप क देस जाब्या। मोरे परिवार में जा अउ मोरे पूत बरे एक तु दुलहिन चुना।’ 39मई आपन सुआमी स कहेउँ, ‘इ होइ सकत ह कि उ दुलहिन मोरे संग इ देस में आवइ स इन्कार करेस।’ 40मुला मोर मालिक कहेस, ‘मई यहोवा क सेवा करत हउँ अउ यहोवा तोहरे संग आपन सरगदूत पठई अउ तोहार मदद करी। तोहका हुआँ मोरे आपन लोगन में स मोरे पूत बरे एक दुलहिन मिली। 41मुला जदि तू मोरे पिता क देस जात ह अउर उ पचे मोरे पूत बरे एक तु दुलहिन देब मना करत हीं तउ तोहका इ बचन स छुटकारा मिलि जाइ।’

42“आजु मई इ इनारा प आवा हउँ अउर मई कहेउँ ह, ‘हे यहोवा मोर सुआमी क परमेस्सर कृपा कइके मोर जात्रा सुफल बनावा। 43मई हिआँ इनारा क लगे रुकब अउ पानी भरइ बरे आवइ वाली नवखिल मेहरारु क जोहब। तब मई कहब, “कृपा कइके आप आपन कूँड़ा स पिअइ बरे पानी द्या।” 44नीक बिटिया ही खास तरह स जवाब देइ। उ कही, “इ पानी पिआ अउ मई तोहरे ऊँटियन बरे पानी लावत अहउँ।” इ तरह मई जानब कि इ उहइ मेहरारु अहइ जेका यहोवा मोर सुआमी क पूत बरे चुने अहइ।’

45“मोर पराथना पूरी होइ क पहिले ही रिबका इनारा प पानी भरइ आइ। पानी क कूँड़ा उ आपन काँधे प लइके धरे रही। उ इनारा तलक गइ अउ उ पानी भरेस। मई एहसे कहेउँ, “कृपा कइके मोका तनिक पानी द्या। 46उ फउरन काँधे स कूँड़ा क निहुराएस अउ मोरे बरे पानी उड़ेरेस अउ कहेस, ‘इ पिअइँ अउ मई आप क ऊँटियन बरे पानी लिआउब।’ एँह बरे मई पानी पिएउँ अउ आपन ऊँटन क भी पानी पियाएउँ। 47तब मई एहसे पूछेउँ, ‘तोहार पिता कउन अहइँ?’ इ जवाब दिहस, ‘मोर पिता बतूल अहइ। मोरे पिता क महतारी-बाप मिल्का अउ नाहोर अहइँ।’ तबइ मई एँका मुनरी अउ बाँहे बरे बाजूबन्द दिहेउँ ह। 48उ टेम मई आपन मूँड़ी निहुराएउँ अउ यहोवा क धन्न कहेउँ। मई आपन सुआमी इब्राहीम क परमेस्सर यहोवा क प्रसंसा किहा। मई ओका धन्न कहेउँ काहेकि उ सोझेइ मोरे सुआमी क भाई क नतिनी तलक मोका पहाँचाएस। 49अब बतावा कि तू का करब्या? का तू मोरे सुआमी प दयालु अउ स्वामिभक्त होब्या अउ आपन बिटिया ओका देब्या? या तू आपन बिटिया देब मना करब्या? मोका बतावा, जेहसे, मई इ समुझ सकउँ कि मोका का करइ क बाटइ।”

50तब लाबान अउ बतूल जवाब दिहन, “हम पचे इ लखत अही कि इ यहोवा कइँती स बाटइ। एँका हम सबइ टारि नाही सकित। 51रिबका तोहार अहइ। ओका ल्या अउ जा। आपन सुआमी क पूत स एका बियाह करइ द्या। इहइ अहइ जेका यहोवा चाहत ह।”

52इब्राहीम क नउकर सुनेस अउ उ यहोवा क समन्वा भुइँया प निहुरा। 53तब उ रिबका क उ सबइ भेंट दिहस जउन उ संग लिआवा रहा। उ रिबका क सोना अउ चाँदी क गहना अउ बहोत स सुन्नर ओढ़ना दिहस। उ, ओकरे भाई अउ महतारी क कीमती भेंट दिहस। 54नउकर अउ ओकरे संग क मनई हुआँ ठहरेन अउ खाएन अउर पिएन। उ पचे हुआँ राति भइ ठहरेन। उ पचे दूसर दिन भिन्सारे उठेन अउ बोलें “अब हम आपन मालिक क लगे जाब।”

55रिबका क महतारी अउ भाई कहेन, “रिबका क हम लोगन क लगे कछू दिन अउ ठहरइ द्या। ओका दस दिन तलक हमरे संग ठहरइ द्या। एँकरे पाछे उ जाइ सकत ह।”

56मुला नउकर ओनसे कहेस, “यहोवा मोर जात्रा सफल किहस ह। अब मोसे जिन जोहावा। मोका आपन मालिक क लगे लौटि जाइ द्या।”

57रिबका क भाई अउ महतारी कहेन, “हम पचे रिबका क बोलाउब अ ओसे पूछब कि उ का चाहत ह?” 58उ पचे रिबका क बोलाएन अउ ओसे कहेन, “का तू इ मनई क संग अबहिं जाइ चाहत अहा?” रिबका कहेस, “हाँ, मई जाब।”

59एँह बरे उ पचे रिबका क इब्राहीम क नउकर अउ ओकरे संगी लोगन क साथे जाइ दिहन। रिबका क धाई भी ओनके संग गइ। 60जब उ जाइ लाग अउ उ पचे रिबका स बोलें,

“हमार बहिनी, तू लाखन मनइयन क महतारी बना अउ तोहार संतान आपन दुम्पनन क हरावई अउ ओनके सहस्रन क हड़प लेई।”

61तब रिबका अउ धाई ऊँट प सवार भइन अउ नउकर अउ ओकरे संगी लोगन क पाछे चलइ लागिन। इ तरह नउकर रिबका क संग लिहस अउ घरे लउटइ बरे जात्रा सुरु किहस।

62इ टेम इसहाक बेर लहैरोई क तजि दिहे रहा अउ नेगेव में रहइ लाग। 63एक संझा क इसहाक मइदान में टहरत रहा। इसहाक नजर दउड़ाएस अउ बहोत दूर स ऊँटन क आवत लखेस।

64रिबका लखेस अउ इसहाक क निहारेस। तब उ ऊँट स कूदि पड़ी। 65उ नउकर स पूछेस, “हम मनइयन स मिलइ बरे खेतन में टहरत उ मनई कौन अहइ?”

नउकर कहेस, “इ मोरे सुआमी क पूत अहइ।” एँह बरे रिबका आपन मुँह क पर्दा में छिपाइ लिहस।

66नउकर इसहाक क उ सबइ बातन क बताएस जउन घटि गइ रहिन। 67तब इसहाक बिटिया क आपन महतारी क तम्बू में लिआवा। उहइ दिन रिबका इसहाक क मेहरारु होइ गइ। इसहाक ओसे बहोत पियार करत रहा। एँह बरे इसहाक क आपन महतारी क मउत क पाछे भी धीरज अउ दिलासा मिली।

इब्राहीम क परिवार

25 इब्राहीम फुन बियाह किहस। ओकर नई मेहरारु क नाउँ कतूरा रहा। 2कतूरा जिम्नान, योच्छान, मिधान, मिदान यिसबाक अउ सूह क जन्म दिहेस। 3योच्छान, सबा अउ ददान क बाप रहा। ददान क संतानन अस्सूर, लुम्मी अउ लतूसी लोग रहेन। 4मिद्यान क पूत एपा, एपेर, हनोक, अबीदा अउ एल्दा रहेन। इ सबहिँ पूत इब्राहीम अउ कतूरा स पइदा भएन। 5-6इब्राहीम मरइ स पहिले आपन मेहरारु नउकरन क पूतन क कछू भेंट दिहस। इब्राहीम पूतन क पूरब पठएस। उ एँनका इसहाक स दूर पठएस। एँकरे पाछे इब्राहीम आपन सबहिँ चीजन इसहाक क दइ दिहस।

7इब्राहीम एक सौ पचहत्तर बरिस क उमर तलक जिअत रहा। 8इब्राहीम धीमे धीमे दुबराइ गवा अउ संतुट्ट जीवन बिताइ क पाछे चल बसा। उ लम्बी भरपूर जिन्गी बिताएस अउर ओका दफना दीन्ह गवा रहा। 9ओकर पूत इसहाक अउ इस्माएल ओका मकपेला क गुफा में दफनाएन। इ गुफा सोहर क पूतन एप्रोन क खेते में अहइ। इ मग्रे क पूरब में रही। 10इ उहइ गुफा अहइ जेका इब्राहीम हिल्ली लोगन स बेसहे रहा। इब्राहीम क ओकर मेहरारु सारा क संग गाड़ा गवा। 11इब्राहीम क मरइ क पाछे परमेस्सर इसहाक प कृपा किहेस अउ इसहाक बेर लहैरोई में रहत रहा।

12इस्माएल क परिवार क इ सूची अहइ। इस्माएल इब्राहीम अउ हाजिरा क पूत रहा। (हाजिरा सारा क मिस्त्र देस क दासी रही।) 13इस्माएल क पूतन क इ सबइ नाउँ अहइँ पहिला पूत नबायोत रहा, तब केदार पइदा भवा, तब अदबेल, मिबसाम, 14मिस्मा, दूमा, मस्सा, 15हदद, तेमा, यतूर, नापीस अउ केदमा भएन। 16इ सबइ इस्माएल क पूतन क नाउँ रहेन। हर एक पूत क आपन गाँव या सिबिर रहेन। आपन कबील क उपचे बारह राजकुमार रहेन। 17इस्माएल एक सौ

सैंतीस बरिस जिअत रहा। तबहीं उ मर गवा अउ दफना दीन्ह गवा रहा। 18इस्माएल क संतानन हवीला स लइके सूर क लगे मिस्त्र क चौहद्दी अउ ओसे भी आगे अस्सूर क किनारे तलक, बसे रहेन अउ आपन रस्तेदारन पइ हमला करत रहेन।

इसहाक क परिवार

19इ इसहाक क कहानी बाटइ। इब्राहीम क एक पूत इसहाक रहा। 20जब इसहाक चालीस बरिस क रहा तब उ रिबका स बियाह किहस। रिबका पददनराम क रहइवाली रही। उ अरामी बतूएल क बिटिया रही अउ लाबान क बहिन रही। 21इसहाक क बसही बच्चा नाहीं पइदा कइ सकी। एँह बरे इसहाक यहोवा स आपन मेहरारु बरे पराथना किहस। यहोवा इसहाक क बिनती सुनेस अउ यहोवा रिबका क गरभ धारण करइ दिहस।

22जब रिबका गरभ धारण किहे रही तब ओकरे गर्भ में बच्चे एक दूसर क संग धक्का धक्की करत रहेन। रिबका यहोवा स पराथना किहेस अउ बोली, “मोरे संग अइसा काहे होत अहइ।” 23यहोवा कहेस “तोहरे गर्भ में दुइ रास्ट्र अहइँ। दुइ परिवारन क राजा तोहसे पइदा होइहीं अउ उ पचे अलगाइ जइहीं। एक पूत दूसर स बलवान होइ। बड़का पूत छोटके पूत क सेवा करी” 24अउर जब टेम पूरा भवा तउ रिबका जुड़ैधा लरिकन क जन्मेस। 25पहिला लरिका लाल भवा। ओकर खाल रोवँदार ओढ़ना क नाई रही। एँह बरे ओकर नाउँ एसाव पड़ा। 26जब दूसर लरिका पइदा भवा, उ एसाव क एँडी क मजबूती स धरे रहा। एँह बरे उ लरिका क नाउँ याकूब पड़ा। इसहाक क उमिर उ टेम साठ बरिस क रही। जब याकूब अउ एसाव पइदा भएन।

27लरिकन बड़ा भएन। एसाव एक होसियार सिकारी भवा। उ मइवानन में रहब पसन्द करइ लाग। मुला याकूब सान्त रहा। उ आपन तम्बू में रहत रहा। 28इसहाक एसाव क पियार करत रहा। उ ओन जनावरन क खाब पसन्द करत रहा जेका एसाव मारि क लइ आवत रहा। मुला रिबका याकूब क पियार करत रही।

29एक दाई एसाव सिकार स लउटा। उ भूख स थका अउ कमजोर होइ गवा रहा। याकूब कछू दाल पकावत रहा। 30इ कारण एसाव याकूब स कहेस, “मई भूख स कमजोर होत अहउँ। तू उ लाल दाल में स कछू मोका द्या।” (इहइ कारण अहइ कि लोग ओका एदोम कहत हीं।)

31मुला याकूब कहेस, “तोहका पहिलौठी होइ क अधिकार मोका आज बेचइ करइ क होइ।”

32एसाव कहेस, “मई भूख स मरा जात अहउँ। अगर मई मरि जात अहउँ तउ मोरे बाप क सब धन मोर मदद नाहीं कर पाइ। एँह बरे तोहका मई आपन हींसा देब।”

33मुला याकूब कहेस, “पहिले बचन द्या कि तू इ मोका देव्या।” एँह बरे एसाव याकूब क बचन दिहस। एसाव आपन पिता क धन क आपन हींसा याकूब क बेच दिहस। 34तब याकूब एसाव क रोटी अउ भोजन दिहस। एसाव खाएस, पिएस अउ तब चला गवा। इ तरह एसाव इ देखोएस कि उ पहिलौटा होइ क आपन अधिकार क परवाह नाहीं किहेस।

इसहाक अबीमेलिक स झूठ बोलत ह

26 एक दौड़ अकाल पड़ा। इ अकाल वइसा ही रहा जइसा इब्राहीम क टेम में पड़ा। एह बरे इसहाक गगर सहर में पलिस्तियन क राजा अबीमेलिक क लगे गवा। 2यहोवा इसहाक स बात किहस। यहोवा इसहाक स इ कहेस, “मिस्र क जिन जा। उहइ देस में रहा जेहमाँ रहइ क हुकुम मई तोहका दिहेउँ ह। 3उहइ देस में रहा अउर मई तोहरे संग रहब। मई तोहका आसीर्बाद देब। मई तोहका अउ तोहरे परिवार क इ सब पहुँटा देब। मई उहइ करब जउन मई तोहरे बाप इब्राहीम क बचन दिहेउँ ह। 4मई तोहरे परिवार क आकास क तारा समूह क तरह बहोत स बनाउब अउर मई सारा पहुँटा तोहरे परिवारे क देब। धरती क सब रास्ट्र तोहरे सन्तानन क कारण मोर आसीर्बाद पाइ जइहीं। 5मई इ एह बरे करब कि तोहार बाप मोर हुकुम क मानेस अउ मई जउन कछू कहेउँ, उ किहस। इब्राहीम मोरे हुकुमन, मोर कानून अउ मोरे नेमन क पालन किहस।”

6इसहाक रुका अउ गगर में रहा। 7इसहाक क मेहरारु रिबका बहोत सुन्नर रही। उ जगह क मनइयन इसहाक स रिबका क बारे में पूछेन। इसहाक कहेस, “इ मोर बहिन अहइ।” इसहाक इ कहइ स डेरान कि रिबका मोर मेहरारु अहइ। इसहाक डेरत रहा कि मनई ओकर मेहरारु क पावइ क ओका मारि डइहीं।

8जब इसहाक हुआँ बहोत टेम तलक रहि चुका, तउ एक दिन अबीमेलिक आपन खिड़की स बाहेर झाँकिस अउ लखेस कि इसहाक, रिबका क संग हँसी अउर खेल करत अहइ। 9अबीमेलिक इसहाक क बोलाएस अउ कहेस, “इ मेहरारु तोहार पत्नी अहइ। तू हम पचन स इ काहे कह्या कि इ मोर बहिन अहइ।”

इसहाक ओसे कहेस, “मई डेरत रहेउँ कि तू ओका पावइ बरे मोका मारि डउब्बा।”

10अबीमेलिक कहेस, “तू हम पचन क बुरा किह्या ह। हम पचन क कउनो भी मनई तोहरे पत्नी क संग सोइ सकत रहा। तब उ बड़के पाप क देखी होत।”

11एह बरे अबीमेलिक सबहिँ मनइयन क चिताउनी दिहस। उ कहेस, “इ मनसेधू अउ इ मेहरारु क कउनो चोट नाहीं पहोंचाई। अगर कउनो ऐनका चोटपहोंचाइ तउ उ मनई जान स मारि दीन्ह जाइ।”

इसहाक धनी बना

12इसहाक उ भुइँया प खेती किहस अउ उ बरिस ओकरे बहोतइ फसिल भइ। यहोवा ओह प बहोतइ कृपा किहस। 13इसहाक धनी होइ गवा। उ जियादा स जियादा धन तब तलक बटोरत रहा जब तलक बहोत धनी नाहीं होइ गवा। 14ओकरे लगे बहोत स झुण्ड अउ गोरुअन क झुण्ड रहेन। ओकरे लगे ढेर दास भी रहेन। सबहिँ पलिस्ती ओसे डह राखत रहेन। 15एह बरे पलिस्तियन ओन सबहिँ इनारन क बर्बाद कइ दिहन जेनका इसहाक क बाप इब्राहीम अउ ओकर साथी लोगन कइउ साल पहिले खने रहेन। पलिस्तियन ओनका माटी स पाट दिहन 16अउर अबीमेलिक इसहाक स

कहेस, “हमार देस तजि द्या। तू हम पचन स बहोत जियादा सक्तीवाला होइ गवा अहा।”

17एह बरे इसहाक उ जगह तजि दिहस अउ गगर क छोटी नदी क लगे पड़ाव डालेस। इसहाक हुँवइ ठहरा अउ हुँवइ रहा। 18ओकरे बहोत पहिले इब्राहीम कइउ इनारा खने रहा। जब इब्राहीम मरा तउ पलिस्तियन माटी से इनारा पाटि दिहन। एह बरे हुँवइ इसहाक लौटा अउ ओन इनारन क फुन खनेस। उ इनार क उहइ नाउँ दिहस जउन नाउँ ओकर पिता दिहे रहा। 19इसहाक क नउकरन छोटी नदी क लगे एक इनारा खनेन। उ कुआँ स पानी क एक सोता फूट पड़ा। 20तब गगर क गड़रिया लोग उ इनारा क कारण इसहाक क नउकरन स झगड़इ लागेन। उ पचे कहेन, “इ पानी हमार अहइ।” एह बरे इसहाक ओकर नाउँ एसेक राखेस। उ इ नाउँ एह बरे दिहस कि उहइ जगह प उ मनइयन ओसे झगड़ा किहे रहेन।

21तब इसहाक क नउकरन दूसर इनारा खनेन। हुआँ क मनइयन उ इनारा बरे भी झगड़ेन। एह बरे इसहाक उ इनारा क नाउँ सिन्ना राखेस।

22इसहाक हुआँ स हटा अउ दूसर इनारा खनेस। उ इनारा बरे झगड़ा करइ कउनो नाहीं आवा। एह बरे इसहाक उ इनारा क नाउँ रहोबोत राखेस। इसहाक कहेस, “यहोवा हिआँ हमरे बरे जगह दियाएस ह। हम पचे प्रगति करब अउर बढ़ब अउ इहइ भुइँया पइ पूरी तरह सफल होइ जाब।”

23उ जगह स इसहाक बेसेबा क गवा। 24यहोवा उ रात इसहाक स बोला, “मई तोहरे पिता इब्राहीम क परमेस्सर अहउँ। जिन डेरअ। मई तोहरे संग अहउँ अउ मई तोहका आसीर्बाद देब। मई तोहरे परिवार क महान बनाउब। मई आपन सेवक इब्राहीम क कारण इ करब।” 25एह बरे इसहाक उ जगह यहोवा क आराधना बरे एक वेदी बनाएस। इसहाक हुआँ पड़ाव डालेस अउ ओकर नउकर लोग एक इनारा खनेन।

26अबीमेलिक गगर स इसहाक क लखइ आवा। अबीमेलिक आपन संग सलाहकार अहुज्जत अउ सेनापति पीकोल क लइ आवा। 27इसहाक पूछेस, “तू मोका लखइ काहे आया ह? तू एकरे पहिले मोरे संग दोस्ती नाहीं राखत रह्या। तू मोका आपन देस तजि देइ क बेबस किहा।”

28उ पचे जवाब दिहन, “अब हम पचे जानित ह कि यहोवा तोहार संग अहइ। इ बरे हम चाहित ह कि हम पचे तोहरे संग एक समझौता करी। हम चाहित ह कि तू हमका एक बचन द्या। 29हम पचे तोहका चोट नाहीं पहोंचावा, अब तू पचन क इ बचन देइ चाही कि तू हम लोगन क चोट नाहीं पहोंचउब्बा। हम पचे तोहका पठवा ह। मुला हम पचे तोहका सान्ति स पठवा ह। अब इ बात साफ अहइ कि यहोवा तोहका आसीर्बाद दिहस ह।”

30एह बरे इसहाक ओनका दावत दिहस। सबहिँ खाएन अउ पिएन। 31दूसर दिन भिन्सारे हर एक मनई बचन दिहस अउ किरिया खाएस। तब इसहाक ओनका सान्ति स बिदा किहस अउ उ पचे कुसल स ओकरे निचके स चला आएन।

32उ दिना इसहाक क नउकर आएन अउ उ पचे आपन खना इनारा क बारे में बताएन। नउकरन कहेन, “हम पचे उ

इनारा स पानी पिआ ह।” 33एँह बरे इसहाक ओकर नाउँ सिबा खबेस अउ उ सहर अबहिँ भी बेसेँबा कहवावत ह।

एसाव क मेहररुअन

34जब एसाव चालीस बरिस क भवा उ हित्ती मेहररुअन स बियाह किहस। एक बेरी क बिटिया यहूदीत रही। दूसर एलोन क बिटिया बासमत रही। 35इ सबइ बियाहे स इसहाक अउ रिबका क मन दुःखी भवा।

उत्तराधिकार क झगड़ा

27 जब इसहाक बुढ़ाइ वा तउ ओकर अँखियन नीक नाहीं रहिन। इसहाक साफ-साफ नाहीं लिखि सकत रहा। एक दिन उ आपन बड़का पूत एसाव क बोलाएस। इसहाक कहेस, “बेटवा!”

एसाव जवाब दिहस, “हाँ, पिताजी!”

2इसहाक कहेस, “लखा, मई बुढ़ाइ गवा अहउँ। होइ सकत ह कि मई हाली ही मरि जाउँ। 3अब तू आपन तीरन अउ धनुख लइके, मोरे खातिर सिकार प जा। मोरे खाइ बरे एक ठु जनावर मारि लिआवा। 4मोरे मनचाहा खइया क बनावा। ओका मोरे लगे लिआवा, अउर मई एका खाब। तब मई मरइ स पहिले असीसबा।” 5एँह बरे एसाव सिकार करइ गवा।

याकूब इसहाक स छल-कपट किहस

रिबका उ सबइ बात सुनि लिहे रही, जउन इसहाक आपन पूत एसाव स कहेस। 6रिबका आपन पूत याकूब स कहेस, “सुना, मई तोहरे बाप क, तोहरे भाई स बतियात सुनेउँ ह। 7तोहार पिता कहेस, ‘मोरे खाइ बरे एक जनावर मारा। मोरे बरे भोजन बनावा, अउ मई ओका खाब। तब मई मरइ क पहिले तोहका आसीबादि देबा’ 8एँह बरे पूत सुना। मई जउन कहति अहउँ, करा। 9आपन बोकरियन क बीच जा अउ दुइ नई बोकरी लिआवा। मई ओनका वइसा बनाउब जइसा तोहरे पिता क सोहाइ। 10तबइ तू उ भोजन आपन पिता क लगे लइ जाब्या अउ उ मरइ क पहिले तोहका ही आसीबादि देइ।”

11मुला याकूब आपन महतारी रिबका स कहेस, “मुला मोर भाई रेंवादार अहइ अउ मई ओकरी जगह रोवादार नाहीं अहउँ। 12जदि मोर बाप मोका छुअत हीँ, तउ जान लेइहीं कि मई एसाव नाहीं अहउँ। तब उ पचे मोका आसीबादि नाहीं देइहीं। उ पचे मोका सरापिहीं काहेकि मई ओनके संग छल-कपट करइ क जतन किहेउँ ह।”

13यह पइ रिबका ओसे कहेस, “जदि कउनो परेसानी होइ तउ मई आपन दोख मान लेब। जउन मई कहति हउँ करा। जा, मोरे बरे बोकरियन लिआवा।”

14याकूब एँह बरे बाहेर गवा अउ उ दुइ बोकरियन क धरेस अउ आपन महतारी क लगे लइ आवा। ओकर महतारी इसहाक क पसंद क अनुसार विसेख तरीका स पकाएस। 15तब रिबका उ पोसाक क उठाएस जउन ओकर बड़का पूत एसाव पहिरब पसंद करत रहा। रिबका आपन छोटका पूत याकूब क ओढ़ना पहिराइ दिहस। 16रिबका

बोकरियन क चाम क लिहस अउ याकूब क हाथे अउर गला प बाँध दिहस। 17तब रिबका आपन पकावा भोजन उठाएस अउ ओका याकूब क दिहस।

18याकूब पिता क लगे गवा अउ बोला, “पिता जी।”

अउर ओकर पिता पूछेस, “हाँ पूत, तू कउन अहा?”

19याकूब आपन पिता स कहेस, “मई आप क बड़का बेटवा एसाव अहउँ। आप जउन कहेन ह, मई कर दिहेउँ ह। अब आप बइठईँ अउ ओन जनावरन क खाईँ जेनकइ सिकार मई आप क बरे किहेउँ ह। तब आप मोका आसीबादि दइ सकत हीँ।”

20मुला इसहाक आपन पूत स कहेस, “तू एँतनी हाली सिकार कइके जनावरन क कइसे मार्या ह?”

याकूब जवाब दिहस, “काहेकि आप क परमेस्सर यहोवा मोका हाली ही जनावरन क दियाइ दिहस।”

21तब इसहाक याकूब स कहेस, “मोर पूत मोरे लगे आवा जेहसे मई तोहका छुइ सकउँ। जदि मई तोहका छुइ सकउँ तउ मई इ जान जाब कि तू असलियत में मोर पूत एसाव अहा।”

22याकूब आपन बाप इसहाक क लगे गवा। इसहाक ओका छुएस अउ कहेस, “तोहार आवाज याकूब जइसी अहइ। मुला तोहार बाँहन एसाव क रेंवादार बाहन क नाई अहइ।” 23इसहाक इ नाहीं जान पावा कि इ याकूब अहइ काहेकि ओकर बाँह एसाव क बाँह क नाई रेंवादार रहिन। एँह बरे इसहाक याकूब क असीसेस।

24इसहाक कहेस, “का सचमुच तू मोर पूत एसाव अहा?”

याकूब जवाब दिहस, “हाँ, मई अहउँ।”

याकूब बरे आसीबादि

25तब इसहाक कहेस, “भोजन लिआवा। मई एका खाब अउ तोहका असीबादि देब।” एँह बरे याकूब ओका भोजन दिहस अउ उ खाएस। याकूब ओका दाखरस दिहस, अउर उ ओका पिएस।

26तब इसहाक ओसे कहेस, “पूत, मोरे निचके आवा अउ मोका चूमा।” 27एँह बरे याकूब आपन बाप क लगे गवा अउ ओका चूमेस। इसहाक एसाव क ओढ़ना क गन्ध पाएस अउ ओका असीसेस।

इसहाक कहेस, “अहा, मोर पूत क सुगन्ध यहोवा स बरदान पाइ गए खेतन क सुगन्धि क नाई बाटइ।

28यहोवा तोहका बहोत बर्खा देइ। जेसे तोहका बहोत फसिल अउ दाखरस मिलइ।

29सब लोग तोहार सेवा करईँ। राष्ट्र तोहरे समन्वा निहुरइ। तू आपन भाई लोगन क ऊपर रज्ज करब्या। तोहरी महतारी क पूत तोहरे समन्वा निहुरिहीं अउ तोहार हुकुम मनिहीं।

हर एक मनई जउन तोहका सरापी, सराप पाइ

अउ हर एक मनई जउन तोहका आसीबादि देइ, आसीबादि पाइ।”

एसाव क “आसीबादि”

30इसहाक याकूब क आसीबादि देब पूरा किहेस। तब जइसेन ही याकूब आपन बाप इसहाक क निचके स गवा,

वइसेन ही एसाव सिकार कइके भीतर आवा। 31 एसाव आपन पिता क मनचाहा भोजन बनाएस। एसाव एका आपन पिता क निचके लिआवा। उ आपन पिता स कहेस, “पिता जी, उठई अउ उ भोजने क खाई जउन आपका पूत आप क बरे मोरेस ह। तब आप मोका आसीर्बाद दइ सकत हीं।”

32 मुला इसहाक ओसे कहेस, “तू कउन अहा?”

उ जवाब दिहस, “मई आप क पहिलौठी पूत एसाव अहई।”

33 तब इसहाक बहोतइ परेसान होइ गवा अउ बोला, “तब तोहरे आवइ स पहिले उ कउन रहा? जउन भोजन बनाएस अउ मोरे संग लावा। मई उ सब खाएउँ अउ ओका आसीर्बाद दिहेउँ। अब आपन आसीर्बाद क लउटावइ क टेम निकरि गवा अहइ।”

34 एसाव आपन पिता क बात सुनेस। उ बहोतइ गुस्साइ गवा अउ करुआइ गवा। उ चिचियान। उ आपन बाप स कहेस, “पिताजी, तब मोका भी आसीर्बाद देई।”

35 इसहाक कहेस, “तोहार भाई मोका धोखा दिहेस। उ आवा अउ तोहार आसीर्बाद लइके गवा।”

36 एसाव कहेस, “ओकर नाउँ ही याकूब अहइ। इ नाउँ ओकरे बरे ठीक ही अहइ। ओकर इ नाउँ बिल्कुल ठीक ही रखा गवा अहइ। उ फुरइ चालबाज अहइ। उ मोका दुइ दाई धोखा दिहेस। उ पहिलउठी होइ क मोरे अधिकार क लइ ही चुका बाटइ अउर अब उ मोरे हींसा क आसीर्बाद क भी लइ लिहस।” तब एसाव कहेस, “का आप मोरे बरे कउनो आसीर्बाद बचाइके रख्या ह?”

37 इसहाक जवाब दिहस, “नाहीं, अब बहोत देर होइ गइ। मई याकूब क तोहरे ऊपर राज्ज करइ क अधिकार दइ दिहेउँ ह। मई इ भी कहि दिहेउँ ह कि सब भाई ओकर सेवक होइहीं। मई ओका बहोत जियादा अन्न अउ दाखरस क आसीर्बाद दिहेउँ ह। पूत तोहका देइ क कछू नाहीं बचा अहइ।”

38 मुला एसाव आपन पिता स मँगत रहा। “पिता जी, का आप क लगे एक भी आसीर्बाद नाहीं बाटइ? पिताजी, मोका भी असीसा।” अइसेन एसाव रोवइ लाग।

39 तब इसहाक ओसे कहेस,

“तू अच्छी भुईया प नाहीं रहब्या। तोहरे लगे बहोत जियादा अन्न नाहीं होइ।

40 तोहका जिअइ बरे संघर्स करइ क होइ अउर तू आपन भाई क दास होब्या। मुला तू अजादी बरे लइब्या, अउ ओकरे राज्ज स अजाद होइ जाब्या।”

41 ओकरे पाछे इ आसीर्बाद क कारण जउन ओकर पिता दिए रहे एसाव याकूब स घिना करत रहा। एसाव मन ही मन सोचेस, “मोर बाप हाली ही मरि जाइ अउ मई ओकर दुःख मनाउब। मुला ओकरे पाछे मई याकूब क मारि डाउब।”

42 जब रिबका याकूब क मारइ बरे एसाव क योजना क सुनेस। तउ उ याकूब क बोलाएस अउर कहेस, “सुना, तोहार भाई एसाव तोहका मारि डावइ बरे योजना बनावत ह। 43 एह बरे पूत जउन मई कहति हउँ, करा। मोर भाई लाबान हारान में रहत ह। ओकरे पास जा अउ लुकान रहा। 44 ओकरे लगे तनिक टेम तलक रहा जब तलक तोहरे भाई

क किरोध नाहीं उतरत। 45 तनिक समइ पाछे तोहार भाई भूलि जाइ कि तू ओनके संग का किहा? तब मई तोहका लउटावइ बरे एक ठु नउकर क पठउब। एक ही दिन दुइनउँ पूतन क मई खोइ देइ नाहीं चाहित।”

46 तब रिबका इसहाक स कहेस, “तोहरा पूत एसाव हित्ती मेहरारुअन स बियाह कइ लिहस ह। मई इ मेहररुअन स तंग भए गवा अहउँ काहेकि इ सबइ हमरे परिवार क लोगन में स नाहीं अहई। अगर याकूब भी इ मेहररुअन में स कउनो क संग बियाह करत ह तउ मई मरि जाइ चाहबिउँ।”

याकूब मेहरारु क खोज करत ह

28 इसहाक याकूब क बोलाएस अउ ओका आसीर्बाद दिहस। तब इसहाक ओका हुकुम दिहस। इसहाक कहेस, “तू कनानी मेहरारु स बियाह नाहीं कइ सकत्या। 2 एह बरे इ ठउर क तजा अउ पददन-अराम क जा। आपन नाना बतूल क घराना में जा। हुओं तोहार मामा लाबान रहत ह। ओकरी कउनो एक बिटिया स बियाह करा। 3 मई पराथना करत हउँ कि सब स सर्वसक्तीमान परमेस्सर तोहका आसीर्बाद देइ अउ तोहका बहोत स पूत देइ। मइ पराथना करत हउँ कि तू एक बड़का रास्ट्र क पिता बना। 4 मई पराथना करत हउँ कि जउने तरह परमेस्सर इब्राहीम क बरदान दिहे रहा उहइ तरह उ तोहका भी आसीर्बाद देइ। मई पराथना करत हउँ कि परमेस्सर तोहका इब्राहीम क आसीर्बाद देइ, मई पराथना करत हउँ कि तू जहाँ भी रहा उ धरती तोहार कब्जा में होइ। इ उहइ धरती अहइ जउन परमेस्सर इब्राहीम क दिहे रहा।”

5 इ तरह इसहाक याकूब क पददन-अराम क पहुँटा क पठएस। याकूब आपन मामा लाबान क लगे गवा। अरामी बतूल लाबान अउ रिबका क पिता रहा अउ रिबका याकूब अउ एसाव क महतारी रही।

6 एसाव क पता चला कि ओकर बाप इसहाक याकूब क आसीर्बाद दिहेस ह अउ याकूब क पददन-अराम में एक ठु मेहरारु क खोज बरे पठएस ह। एसाव क इ भी पता लाग कि इसहाक याकूब क आदेस दिहेस ह कि उ कनानी मेहरारु स बियाह न करइ। 7 एसाव इ समझेस कि याकूब आपन महतारी बाप क हुकुम मानेस अउ उ पददन-अराम क चला गवा। 8 एसाव एहसे इ समझेस कि ओकर बाप इ नाहीं चाहत कि ओकर पूत लोग कनानी मेहररुअन स बियाह करई। 9 एसाव क दुइ मेहररुअन पहिले स ही रहिन। मुला उ इस्माएल क बिटिया महलत स बियाह किहस। इस्माएल इब्राहीम क पूत रहा। महलत नबायोत क बहिन रही।

बेतेल - परमेस्सर क घर

10 याकूब बेसेबा क तजि दिहस अउ उ हारान क चला गवा। 11 याकूब क जात्रा करत समइ में सूरज बूड़ गवा रहा। एह बरे याकूब रात बितावइ बरे एक जगह ठहर जाइ बरे गवा। याकूब उ जगह एक ठु चट्टान लखेस सोवइ बरे आपन मूँड धरेस। 12 याकूब सपन देखेस। उ लखेस कि एक सिद्धी भुईया स सरगे तलक पहोंची अहइ। 13 याकूब

सरगदूतन क सिड्डी प चढ़त उतरत लखेस अउ यहोवा क सिड्डी क लगे खड़ा निहारेस। यहोवा कहेस, “मई तोहरे पितामह इब्राहीम क परमेस्सर यहोवा अहउँ। मई इसहाक क परमेस्सर अहउँ। मई तोहका उ भुईया देब जेह प तू अब सोवत अहा। मई इ भुईया तोहका अउ तोहरे संतानन क देब। 14तोहार संतानन ओतना ही होइहीं जेतना भुईया प माटी क कण बाटेन। उ पचे पूरब, पच्छिम, उत्तर अउ दक्खिन चारिहूँ कइँती फइलिहीं। धरती क सबहिँ परिवार तोहरे संतानन क कारण बरदान पइहीं।

15“मई तोहरे संग अहउँ अउर मई तोहार रच्छा करब। जहाँ भी जाब्या अउ मई इ भुईया प तोहका लउटाइ लिआउब। मई तोहका तब तलक नाहीं तजि देब जब तलक मई उ नाहीं कइ लेब जउन मई करइ क बचन दिहेउँ ह।”

16तब याकूब आपन नीदं स उठा अउ बोला, “मई जानत हउँ कि यहोवा इ जगह प अहइ। मुला हिआँ जब तलक मई सोएउँ नाहीं रहे उ मई नाहीं जानत रहेउँ कि उ हिआँ अहइ।”

17याकूब डेरान। उ कहेस, “इ बहोत महिमा क जगह अहइ। इ तउ परमेस्सर क भवन अहइ। इ तउ सरग क दुआर अहइ।”

18याकूब दूसर दिन बहोत भिन्सारे उठा। याकूब उ सिला क उठाएस अउ ओका किनारे स ठाड़ कइ दिहस। तब उ यह पइ तेल चढ़ाएस। इ तरह उ एँका परमेस्सर बरे एक स्मृति पाथर बनाएस। 19उ जगह क नाउँ लूज रहा मुला याकूब ओका बेतेल नाम दिहस।

20तब याकूब एक बचन दिहस। उ कहेस, “जदि परमेस्सर मोरे संग रही अउ अगर परमेस्सर, जहाँ भी मई जात अहउँ, हुआँ मोर रच्छा करी। अगर परमेस्सर मोका खाइ क भोजन अउ पहिरइ क ओढ़ना देइ। 21अगर मई आपन पिता क लगे सान्ति स लउटब, जदि परमेस्सर इ सबहिँ चिजियन करी, तउ यहोवा मोर परमेस्सर होइ। 22इ जगह, जहाँ मई इ पाथर स्मृति पाथर क रुप में खड़ा किहेउँ ह, परमेस्सर क पवित्र ठउर होइ, अउ परमेस्सर जउन कछू मोका देइ ओकर दसवाँ हीसां मई तोहका देब।”

याकूब राहेल स मिलत ह

29 तब याकूब आपन जात्रा जारी रखेस। उ पूरब क देस में गवा। 2याकूब निगाह किहेस, उ मइदान में एक इनारा लखेस। हुआँ इनारा क नगिचे भेड़ी क तीन झुण्ड पड़ी रहिन। इहइ एक इनारा रहा जहाँ इ सबइ भेड़िन पानी पिअत रहिन। हुआँ एक बड़ी सिला स इनारा क मुँह मूँद रहा। 3जब सबहिँ भेड़िन हुआँ बटुर जात रहिन तउ गड़रिया चट्टान क इनारा क मुँह प स हटावत रहेन। तब सबहिँ भेड़िन ओकर जल पी सकत रहिन। जब भेड़िन पी चुकत रहिन तब गड़रिया सिला क फुन अपनी जगह प रख देत रहेन।

4याकूब हुआँ गड़रिया स कहेन, “भाईयन, आप लोग कहाँ क अहइँ?”

उ पचे जवाब दिहिन, “हम पचे हारान क अही।”

5तब याकूब कहेस, “का आप लोग नाहोर क पूत लाबान

क जानत हीँ?” गड़रियन जवाब दिहेन, “हम पचे ओका जानित ह।”

6तब याकूब पूछेस, “उ कुसल स तउ अहइ?”

उ पचे कहेन, “उ सबइ ठीक अहइँ। सब कछू बहोत नीक अहइ। लखा, उ ओकर बिटिया राहेल आपन भेड़िन क संग आवति अहइ।”

7याकूब कहेस, “लखा, अबहिँ दिन अहइ अउ सूरज बूड़इ में अबहिँ, काफी देर बाटइ। रात बरे जनावरन क बटोरइ क अबहिँ टेम नाहीं बा। एँह बरे ओनका पानी द्या अउ ओनका मइदान में लौटि जाइ द्या।”

8मुला उ गड़रियन कहेन, “हम पचे इ सबइ तब तलक नाहीं कइ सकित जब तलक सबहिँ झुण्ड नाहीं बटुरि जातिन। तब हम पचे सिला क इनारा स हटाउब अउ सब भेड़िन पानी पीइहीं।”

9याकूब जब गड़रिया लोगन स बात करत रहा तब राहेल आपन बाप क भेड़िन क संग आइ। (राहेल क काम भेड़िन क देख रेख करब रहा।) 10राहेल लाबान क बिटिया रही। लाबान, रिबका क भाई रहा, जउन याकूब क महतारी रही। जब याकूब राहेल क लखेस तउ जाइके सिला क हटाएस अउ भेड़िन क पानी पियाएस। 11तब याकूब राहेल क चूमेस अउ भोंकारा मारिके रोएस। 12याकूब बताएस कि मई तोहरे बाप क खानदान स अहउँ। उ राहेल क बताएस कि मई रिबका क पूत अहउँ। एँह बरे राहेल घर क पराइ गइ अउ आपन बाप स कहेस।

13लाबान आपन बहिन क पूत याकूब क बारे में खबरिया सुनेस। एँह बरे लाबान ओसे भेटंड परान। लाबान ओसे गले मिला, ओका चूमेस अउ ओका आपन घरे लइ आवा। याकूब जउन कछू भवा रहा, ओका लाबान क बताएस।

14तब लाबान कहेस, “बहोत अच्छी बात अहइ तू हमरे खानदाने स अहा।” एँह बरे याकूब लाबान क संग एक महीना तलक रहा।

लाबान याकूब क धोखा देत ह

15एक दिन लाबान याकूब स कहेस, “इ ठीक नाहीं अहइ कि तू हमरे हिआँ बे पगारि क काम करतइ रहा। तू नातेदार अहा, नउकर नाहीं। मई तोहका का पगार देउँ?”

16लाबान क दुइ बिटिया रहिन। बड़की लिआ रही अउ लहुरी राहेल।

17राहेल सुन्नर रही अउ लिआ क आँखियन कमजोर अउ धुँधरी रहिन। 18याकूब राहेल स पिरेम करत रहा। याकूब लाबान स कहेस, “जदि तू मोका आपन बिटिया राहेल क संग बियाह करइ द्या तउ मई तोहरे हिआँ सात बरिस तलक काम कइ सकत हउँ।”

19लाबान कहेस, “इ ओकरे बरे नीक होइ कि कउनो दूसर क बजाय उ तोहसे बियाह करइ। एँह बरे मोरे संग ठहरा।”

20एँह बरे याकूब ठहरा अउ सात बरिस तलक लाबान बरे काम करत रहा। लेकिन इ समइ ओका बहोत कम लगा काहेकि उ राहेल स पिरेम करत रहा। 21सात बरिस क पाछे उ लाबान स कहेस, “मोका राखेल क द्या जेहसे मई

बियाह करउँ। तोहरे हिआँ मोरे काम करइ क टेम पूर होइ गवा।”

22एँह बरे लाबान उ जगह क सब लोगन क एक भोज दिहस। 23उहइ राति लाबान आपन बिटिया लिआ क याकूब क लगे लावा। याकूब अउ लिआ अपुस मँ तन क संबंध जोड़ें। 24(लाबान अपन बिटिया बरे, दासी क रुप मँ आपन नउकरानी जिल्पा क दिहस।) 25भिन्सारे याकूब जानेस कि उ लिआ क संग सोवा रहा। याकूब लाबान स कहेस, “तू मोका धोखा दिहा ह। मई तोहरे बरे कठिन मेहनत एँह बरे किहेउँ कि मई राहेल स बियाह कइ सकउँ। तू मोका धोखा काहे दिहा ह?”

26लाबान कहेस, “हम पचे आपन देस मँ लहुरी बिटिया क जेठ बिटिया स पहिले बियाह नाहीं करइ देइत। 27मुला बियाह क रस्म क पूरा हफता तलक मनावत रहा अउ मई राहेल क भी तोहका बियाह बरे देब। मुला तोहका सात बरिस तलक मोर सेवा करइ क पड़ी।”

28एँह बरे याकूब इहइ किहस अउ हफता क बिताएस। तब लाबान आपन बिटिया राहेल क भी ओका आपन मेहरारू क रुप मँ दिहस। 29(लाबान आपन बिटिया राहेल क दासिनी क रुप मँ आपन नउकरानी बिल्हा क दिहस।) 30एँह बरे याकूब राहेल क संग भी तने क सम्बंध किहस अउ याकूब राहेल क लिआ स जियादा पियार किहस। याकूब लाबान बरे अउर सात बरिस तलक काम किहस।

याकूब क परिवार बाढ़त ह

31यहोवा लखेस कि याकूब लिआ स जियादा राहेल क पिआर करत ह। एँह बरे यहोवा लिआ क इ जोगग बनाएस कि उ बच्चन क जन्म दइ सकइ। मुला राहेल क कउनो लरिका नाहीं भवा।

32लिआ एक पूत क जन्म दिहस। उ ओकर नाउँ रूबेन रखेस। लिआ ओकर नाउँ एँह बरे रखेस काहेकि उ कहेस, “यहोवा मोरे कष्टन क लखत ह। मोर पति मोका पिआर नाहीं करत, एँह बरे होइ सकत ह कि मोर भतार अब मोसे पिआर करइ।”

33लिआ फिन गरभधारण किहस अउ उ दूसर पूत क जन्म दिहस। उ इ पूत क नाउँ सिमोन रखेस। लिआ कहेस, “यहोवा सुनेस कि मोका पिआर नाहीं मिलत, एँह बरे उ मोका इ पूत दिहस।”

34लिआ फुन गरभधारण किहस अउ एक तु अउर पूत क जन्मेस। उ पूत क नाउँ लेवी धरेस। लिआ कहेस, “अब फुरइ मोर भतार मोका पिआर करी। मई ओका तीन पूत दिएउँ ह।” 35तब लिआ एक अउर पूत क जन्मेस। उ इ लरिका क नाउँ यहूदा धरेस। लिआ ओका इ नाउँ दिहस काहेकि उ कहेस, “अब मई यहोवा क स्तुति करब।” तब लिआ क बच्चा होब बन्द होइ गवा।

30 राहेल लखेस कि उ याकूब बरे कउनो बच्चा क जन्म नाहीं देति अहइ। राहेल आपन बहिनी लिआ स जलन करइ लाग। एँह बरे राहेल याकूब स कहेस, “मोका बच्चा द्या, वरना मई मरि जाब।”

2याकूब राहेल प किरोध किहस। उ कहेस, “मई परमेस्सर नाहीं अहउँ। उ परमेस्सर ही बाटइ जउन तोहका बच्चन क जन्मइ स रोक दिहस ह।” 3तब राहेल कहेस, “तू मोर दासी बिल्हा क लइ सकत ह। ओकरे संग सोआ अउ उ मोरे बरे बच्चा क जन्मी। तब मई ओकरे जरिये महतारी बनब।”

4इ तरह राहेल आपन भतार याकूब बरे बिल्हा क दिहस। याकूब बिल्हा क संग तने क संबंध किहस। 5बिल्हा गरभ धारण किहस अउ याकूब बरे एक पूत क जन्मेस।

6राहेल कहेस, “परमेस्सर मोर पराथना सुनि लिहेस ह। उ मोका एक पूत देइ क ठान लिहस ह।” एँह बरे राहेल इ पूत क नाउँ दान रखेस।

7बिल्हा दुसरी दाई गरभ धारण किहस अउ उ याकूब क दूसर पूत दिहस। 8राहेल कहेस, “मई आपन बहिनी क संग कठोर संघर्ष किहेउँ अउर मई जीत गएउँ ह।” एँह बरे उ इ पूत क नाउँ नप्ताली धरेउँ ह।

9लिआ सोचेस कि उ अउर जियादा बच्चन क जन्म नाहीं दइ सकित। एँह बरे उ आपन दासी जिल्पा क याकूब बरे दिहस। 10तब जिल्पा एक पूत क जन्म दिहस। 11लिआ कहेस, “मोर भाग्य बाटइ। अब मेहररूअन मोका भाग्यवती कइहीं।” एँह बरे उ पूत क नाउँ गाद रखेस। 12जिल्पा दूसर पूत क जन्मेस। 13लिआ कहेस, “मई बहोतइ खुस अहउँ। मेहरारू मोका “खुस” नाउँ स पुकारब्या।” एँह बरे उ लरिका क नाउँ आसेर धरेस।

14गोहूँ कटनी क समइ रूबेन खेतन मँ गवा अउ कछू दूदाफल* न क लखेस। रूबेन इ दूदाफलन क आपन महतारी लिआ क लगे लिआवा। मुला राहेल लिआ स कहेस, “कृपा कइके आपन पूत क दूदाफलन मँ स कछू मोका दइ द्या।”

15लिआ जवाब दिहस, “तू तउ मोरे भतार क पहिले ही लइ लिहे ह। अब तू मोरे पूत क दूदाफलन क भी लइ लेइ चाहत अहा।”

मुला राहेल जवाब दिहस, “अगर तू आपन पूत क दूदाफलन मोका देब्या तू आज रात याकूब क संग सोइ सकित ह।”

16उ रात याकूब खेते स लउटा। लिआ ओका लखेस अउ उ ओसे मिलइ गइ। उ कहेस, “आज राति तू मोरे संग सोउब्या। मई आपन पूत क दूदाफलन क तोहरे दाम क रुप मँ दिहेउँ ह।” एँह बरे याकूब उ रात लिआ क संग सोवा।

17तब परमेस्सर लिआ क फुन गरभधारण करइ दिहस। उ पाँचवें पूत क जन्म दिहस। 18लिआ कहेस, “परमेस्सर मोका इ बात क ईनाम दिहस ह कि मई आपन दासी क आपन भतार क दिहेउँ ह।” एँह बरे लिआ आपन पूत क नाउँ इस्साकार धरेस। 19लिआ फुन गरभधारण किहस अउ उ छठवें पूत क जन्म दिहस। 20लिआ कहेस, “परमेस्सर मोका एक तु सुन्नर भेंट दिहस ह। अब सचमुच ही याकूब

दूदाफल (मैनडरेक्स) इ इब्रानी सब्ब क अरथ अहइ पिरैम क पोथा। उ समइ मँ लोगन क धारना रही कि मेहररूअन क गर्भ होवइ मँ इ सहायता करत ह।

मोका अपनाई, काहेकि मई ओका छः लरिका दिहेउँ ह।”
 19एँह बरे लिआ पूत क नाउँ जबूलून धरेस।

21एकरे पाछे लिआ एक बिटिया क जन्म दिहस। उ बिटिया क नाउँ दीना रखेस।

22तब परमेस्सर राहेल क पराथना सुनेस। परमेस्सर राहेल बरे बच्चा पइदा करब संभव बनाएस। 23राहेल गरभ धारण किहेस अउ एक पूत क जन्म दिहस। 24राहेल कहेस, “परमेस्सर मोर लाज खतम कइ दिहस ह अउ मोका एक पूत दिहस ह।” एँह बरे राहेल आपन पूत क नाउ यूसुफ राखेस। अउर उ कहेस, “परमेस्सर मोका एक अउर पूत देइ।”

याकूब क धन दोलत बढ़त ह

25यूसुफ क जन्म क पाछे याकूब लाबान स कहेस, “अब मोका आपन घर लौटइ द्या। 26मोका मोर मेहररुअन अउ बच्चा द्या। मई चौदह बरिस तलक तोहरे बरे काम कइके ओनका कमावा ह। तू जानत ह कि मई तोहार नीक सेवा किहेउँ ह।”

27लाबान ओसे कहेस, “मोका कछू कहइ द्या। मई महसूस करत हउँ कि यहोवा तोहरे कारण मोहे प कृपा किहेस ह। 28बतावा कि तोहका मई का देउँ अउर मई उहइ तोहका देब।”

29याकूब जवाब दिहस, “तू जानत अहा कि मई तोहरे बरे कठिन मेहनत किहेउँ ह। तोहर भेड़िन क झुण्ड बाँडिन ह अउर जब तलक मई ओनकइ देख भाल किहेउँ ह, ठीक रहिन ह। 30जब मई आवा रहेउँ, तोहरे लगे तनिक रहिन। अब तोहरे लगे बहोत जियादा अहइँ। हर दाई जब मई तोहरे बरे कछू किहेउँ ह यहोवा तोहे प कृपा किहस ह। अब मोरे बरे समइ आइ ग अहइ कि मई आपन बरे काम करउँ, इ मोरे बरे आपन घर बनावइ क टेम अहइ।”

31लाबान पूछेस, “तब मई तोहका का देउँ?”

याकूब जवाब दिहस, “मई नाहीं चाहत कि तू मोका कछू द्या। मई सिरिफ चाहत हउँ कि तू जउन मई काम किहेउँ ह ओकर दाम चुकाइ द्या। सिरिफ इहइ एक काम करा। मइ लउटाउब अउर तोहरी भेड़िन क देखरेख करब। 32मोका आपन सबहिं भेड़िन क झुण्ड क बीच स जाइ द्या अउ दागवाली या धारीदार हर एक भेड़ी क बच्चा अउ करिया बोकरी क बच्चा क मोका लइ लेइ द्या। मोका हर एक दागवाली या धारीवाली मादा बोकरी क लइ लेइ द्या। इहइ मोर पगार होइ। 33भविस्स मँ तू असानी स लखि लेब्या कि मई ईमानदार अहउँ। तू मोर भेड़ी क झुण्ड लखइ आइ सकत ह। जदि कउनो बोकरी दागदार नाहीं होइ या कउनो भेड़ी करिया नाहीं होइ तउ तू जान लेब्या कि मई ओका चोराएउँ ह।”

34लाबान जवाब दिहस, “मई एँका अंगीकार करत अहउँ। हम तोहका जउन कछू तू मँगब्या देब।”

35मुला उ दिन लाबान दागीदार बोकसन क छुपाइ दिहस अउ लाबान सबहिं दागीदार या धारीदार बोकरियन क छुपाइ दिहस। लाबान सब करिया भेड़िन क छुपाइ दिहस। लाबान

आपन बेटहनन क इ सबइ भेड़िन क देखरेख करइ कहेस। 36एँह बरे पूत लोग सबहिं दागीदार जनावरन क लिहन अउ उ पचे दुसरे ठउर प चला गएन। उ पचे तीन दिन तलक जात्रा किहन। याकूब रुक गवा अउ बचे भए जनावरन क देखरेख करइ लगेन। मुला ओहमँ कउनो जनावर दागदार या करिया नाहीं रहा।

37एँह बरे याकूब चिनार, बादाम अउ अर्मोन बिरवन क हरियर डारिन क काटेस। उ ओकर छाल इ तरह उतारेस कि सबइ डार उज्जर धारीदार बनि गइन। 38याकूब पानी पिआवइ क जगह प डारिन क भेड़िन क झुण्ड क समन्वा धइ दिहस। जब गोरु पानी पिअइ आएन तउ उ जगह प गाभिन होइ बरे मिलेन। 39तब बोकरियन जब डारिन क समन्वा गाभिन होइ बरे मिलिन तउ जउन बच्चन पइदा भएन उ सबइ दागीदार, धारीदार या करिया भएन।

40याकूब दागीदार अउ करिया गोरुअन क भेड़ी क झुण्ड क गोरुअन स अलगाइ दिहस। तउ इ तरह, याकूब आपन गोरुअन क लाबान क जनावरन स अलग किहस। उ आपन भेड़िन क लाबान क भेड़िन क लगे नाहीं भटकइ दिहस। 41जब कबहुँ गोरुअन क खरका मँ हिटठ पुटठ जनावर गाभिन होइ बरे मिलत रहेन तब याकूब ओकरी अँखिन क समन्वा डारिन क रख देत रहा, ओन डारिन क निचके ही इ सबइ जनावरन धनाइ बरे मिलत रहेन। 42मुला जब कमजोर जनावर धनाइ बरे मिलत रहेन, तउ याकूब हुआ डार नाहीं धरत रहा। इ तरह मरदुट जनावरन स पइदा भएन बच्चन लाबान क रहेन। हिटठ पुटठ गोरुअन स पइदा भए बच्चन याकूब क रहेन। 43इ तरह याकूब बहोत धनी होइ गवा। ओकरे लगे बहोत स रेवइ, बहोत स नउकर लोग, ऊँट अउ गदहन रहेन।

बिब होइ के टेम याकूब परत ह

31 एक दिन याकूब लाबान क पूतन क बतियात सुनेस। उ पचे कहेन, “हम पचन क बाप क सब कछू याकूब लइ लिहे अहइ। याकूब धनी होइ गवा अहइ, अउर इ सारा धन उ हमरे पिता स लिहेस ह।” 2याकूब इ देखेस कि लाबान पहिले क तरह पिरिम भाव नाहीं रखत ह। 3यहोवा याकूब स कहेस, “तू आपन पुरखन क देस क लउटि जा जहाँ तू पइदा भए रह्या। मई तोहरे संग रहब।”

4एँह बरे याकूब राहेल अउ लिआ स उ मइदान मँ मिलइ बरे कहेस जहाँ उ बोकरियन अउ भेड़िन क खरका रखत रहा। 5उ ओन स कहेस, “मई लखेउँ ह कि तोहार बाप मोसे गुस्सान अहइँ। ओन क मोरे बरे उ पहिले जइसा पिरिम-भाव अब नाहीं रहा। मुला मोर बाप क परमेस्सर मोर संग रहब। 6तू दुइनउँ जानत ह कि मई तू लोगन क पिता बरे ओतनी करी मेहनत किहेउँ, जेतना कइ सकत रहेउँ। 7मुला तू लोगन क बाप मोका धोखा दिहस। तोहार बाप मोर पगार दस दाई बदलि दिहस। मुला इ पूरे टेम मँ परमेस्सर लाबान क सब धोखा स मोका बचाएस ह।

8“एक दाई लाबान कहेस, ‘तू दागवाली सबहिं बोकरियन क रख सकत ह। इ तोहार पगार होइ।’ जब स उ इ कहे

रहा तब स सबहिनै जनावरन दागवाली बच्चन क जन्मेन। इ तरह उ सबइ मोर रहेन। मुला लाबान तब कहेस, 'मई दागवाली बोकरियन क रखब। तू सारी दागवाली बोकरियन क लइ सकत ह। इहइ तोहार पगार होइ।' ओकरे इ तरह कहइ क पाछे सबहिनै गोरुअन धारीदार जनावरन क जन्म दिहेन। 9इ तरह परमेस्सर जनावरन क तू पचन क पिता स लइ लिहस ह अउ मोका दइ दिहस ह।

10"जउन समइ जनावर गभिन् होइ क बरे मिलत रहेन मई एक सपन देखेउँ। मई देखेउँ कि सिरिफ नर जनावरन जउन गाभिन् करइ बरे मिलत रहेन धारीदार अउ चितकबरा रहेन। 11सपन मँ परमेस्सर क सरगदूत मोसे बातन किहस। सरगदूत कहेस, 'याकूब।' "मई जवाब दिहेउँ 'हाँ!'

12"सरगदूत कहेस, 'लखा, सिरिफ दागदार अउ धरिदार बोकरियन भी गाभिन् होइ बरे मिलत रहिन। मई अइसा करत अहउँ। मई उ सब बुरा लखेउँ ह जउन लाबान तोहरे बरे करत ह। मई इ ऐह बरे करत हउँ कि बोकरियन क सबहिनै नई बच्चन तोहार होइ जइहीं। 13मई उहइ परमेस्सर अहउँ जउन तोहार लगे बेतेल मँ आइ रहा। उ जगह तू एक वेदी बनाए रह्या अउर जइतून क तेल स ओका नहवाए रह्या अउ उ जगह तू मोसे एक प्रण किहे रहा। अब, उठा अउ उ जगहिया तजि द्या अउ वापिस आपन जन्म भूमि क लौटि जा।"

14-15राहेल अउ लिआ याकूब क जवाब दिहेन, "हम पचन क पिता क लगे मरइ प हम सबन क देइ क कछू नाहीं अहइ। उ हम पचन क संग अजनबी जइसा बेउहार किहस ह। उ हम पचन क तोहार लगे बेच दिहस अउ उ सारा धन खरच कइ दिहस जउन हम पचन क होतेन। 16परमेस्सर इ सब धन हमरे पिता स लइ लिहस ह अउ इ हमार अउ हमार सनतानन क अहइ। ऐह बरे तू उहइ करा जउन परमेस्सर करइ बरे कहेस ह।"

17ऐह बरे याकूब जात्रा क तइयारी किहस। उ आपन मेहररुअन अउ पूतन क ऊँट प बइठाएस। 18तब उ पचे कनान कइँती लउटइ लागेन जहाँ ओकर बाप रहत रहा। जनावरन क भी सब झुण्ड, जउन याकूब क रहेन, ओनके अगवा चलत रहेन। उ उ सबइ चिजियन क संग लइ जात रहा जउन उ पदुन अराम मँ रहत भए पाए रहा।

19इ टेम लाबान आपन भेड़िन क ऊन काटइ गवा रहा। जब उ बाहेर गवा तब राहेल ओकरे घरे मँ घुसी अउ आपन बाप क घरे क देवतन क चोरइ लइ गइ।

20याकूब अरामी लाबान क धोखा दिहस। उ लाबान क इ नाहीं बताएस कि उ हुआँ स जात अहइ। 21याकूब आपन परिवार अउ आपन सबहिनै चीजन क लिहस अउ हाली स चला गवा। उ पचे फरात नदी क पार किहन अउ गिलाद क पहाड़ी देस क ओर जात्रा किहन।

22तीन दिना पाछे लाबान क पता लाग कि याकूब पराइ गवा। 23ऐह बरे लाबान आपन मनइयन क बटोरेस अउ याकूब क पाछा सुरु किहस। सात दिन पाछे याकूब क गिलाद पहाड़े क लगे पाएस। 24उ रात परमेस्सर लाबान क समन्वा सपन मँ परगट भवा। परमेस्सर कहेस, "होसियार रहा कि तू याकूब क कछू भी अच्छा या बुरा जिन कहा।"

चोराए भए देवतन क खोज

25दूसर दिन भिन्सारे लाबान याकूब क जाइ धरेस। याकूब आपन तम्बू पहाड़े प लगाए रहा। ऐह बरे लाबान अउ ओकर मनइयन आपन तम्बू गिलाद पहाड़े प लगाएन।

26लाबान याकूब स कहेस, "तू मोका धोखा काहे दिहा? तू मोर बिटियन क अइसे काहे लइ जात अहा माना कि उ सबइ जुद्ध मँ धरी गइ होइ? 27मोसे बगैर कहे तू काहे परान्या? जदि तू कहे होत्या तउ मई तोहका भोज देतेउँ। ओहमँ बाजा क संग नाचब अउ गाउब होत। 28तू मोका आपन नातियन क चूमइ तलक नाहीं दिहा अउ न ही बिटियन क बिदा कहइ दिहा। तू इ कइके भारी बेवकूफी किहा। 29तोहका फुरइ चोट पहोंचावइ क सकती मोहमँ बाटइ। मुला पाछे क राति मँ तोहरे बाप क परमेस्सर मोरे सपन मँ आवा। उ मोका चिताउनी दिहस कि मई कउनो तरह तोहका चोट न पहोंचावउँ। 30मइ जानत अहउँ कि तू आपन घरे लउटइ चाहत बाट्या। इहइ कारण अहइ कि तू हुआँ स चल पइया ह। मुला तू मोरे घरे स देवतन क काहे चोरोंया ह?"

31याकूब जवाब दिहस, "मई तोहसे बिना कहे भए चल पइया, काहेकि मई ससान रहेउँ। मई सोचेउँ कि तू आपन बिटियन क मोसे लइ लेब्या। 32मुला मई तोहरे देवतन क नाहीं चोराएउँ। जदि तू हिआँ मोरे लगे कउनो मनई क, जउन तोहरे देवतन क चोरोंए अहइ, पावा, तउ उ मारि दीन्ह जाइ। तोहरे लोग ही मोर गवाह होइहीं। तू आपन कउनो भी चीज क हेर सकत ह। जउन कछू भी तोहार होइ, लइ ल्या।" (याकूब क इ पता नाहीं रहा कि राहेल लाबान क घरे क देवतन क चोराएस ह।)

33ऐह बरे लाबान याकूब क सिबिर मँ गवा अउ ओहमँ हेरेस। उ याकूब क तम्बू मँ हेरेस अउ लिआ क तम्बू मँ भी हेरेस। तब उ तम्बू मँ हेरेस जेहमँ दुइनउँ दासिन ठहरी रहिन। मुला उ ओकरे घरे मँ देवतन क नाहीं पाएस। तब लाबान राहेल क तम्बू मँ गवा। 34राहेल ऊँट क काठी मँ देवतन क छुपाइ राखे रही अउ उ ओनही प बइठी रही। लाबान पूरा तम्बू मँ हेरेस उ देवतन क न हेरि सका।

35अउ राहेल आपन पिता स कहेस, "पिता जी, मोह पइ जिन कोहाआ। मई आपक समन्वा ठाइ होइ मँ समर्थ नाहीं अहउँ। इ टेम मोर मासिक धरम चलत बाटइ।" ऐह बरे लाबान पूरा सिबिर मँ हेरेस, मुला ओका हुआँ स देवतन क नाहीं पाइ सका।

36तब याकूब बहोतइ कोहान। याकूब कहेस, "मई का बुरा किहेउँ ह? मई कउन सा नेम तोड़ेउँ ह? मोर पाछा करइ अउ मोका रोक देइ क अधिकार तोहका कइसे अहइ? 37मोर जउन कछू अहइ ओहमँ तू हेरि लिहा ह। तू अइसी कउनो चीज पाया जउन तोहार अहइ। जदि तू कउनो चीज पाया ह तउ मोका देखोंवा। ओका हिअँइ धरा जेसे हमार संगी लखि सकई। हमरे संगियन क तय करइ द्या कि हम दुइनउँ मँ कउन ठीक अहइ। 38मई तोहरे बरे बीस बरिस तलक काम किहेउँ ह। इ पूरा समइ मँ बच्चा जनमत समइ कउनो भी नान्ह भेड़ी अउ बोकरी क नाहीं मरी अउर न ही मई कउनो मेमना तोहरे झुण्ड मँ स खाएउँ। 39जदि कबहुँ

जंगली जनावरन कउनो भेड़ी क मारेन मई फउरन ओकर दाम खुद दइ दिहेउँ। मई कबहुँ मुर्दा जनावर क तोहरे लगे लइके इ नाहीं कहेउँ कि एहमाँ मोर दोख नाहीं। मुला रात-दिन मोका लूटा गवा। 40दिन मँ सूरज मोर सक्ती छोरत रहा अउ रात क जाड़ा मोरी अँखियन क नीद चोराइ लेत रहा। 41मई बीस बरिस तलक तोहरे बरे एक दास क तरह काम किहेउँ। पहिले क चौदह बरिस मई तोहरी दुइ बिटियन क बियाहइ बरे काम किहेउँ। तउ पाछे क छः बरिस मई तोहरे जनावरन क पावइ बरे काम किहेउँ अउ इ बीच तू मोर पगार दस दाई बदल्या। 42मुला मोरे पुरखन क परमेस्सर इब्राहीम क परमेस्सर अउ इसहाक क भय मोरे संग रहा। जदि परमेस्सर मोरे संग नाहीं होत तउ तू मोका खाली हाथ पठइ देत्या। मुला परमेस्सर मोर दुःखे क लखेस। परमेस्सर मोरे किए काम क लखेस अउ पिछली रात परमेस्सर प्रमाण दइ दिहस कि मई नीक अहउँ।”

याकूब अउ लाबान क मेल

43लाबान याकूब स कहेस, “इ सबइ लरिकियन मोर बिटिनियन अहई। ओनकइ बच्चन मोर बाटेन। इ सबइ जनावरन मोर अहई। जउन कछू भी तू हिआँ लखत अहा, मोर अहइ। मुला मई आपन बिटियन अउ ओनके बच्चन क रखइ बरे कछू नाहीं कइ सकत। 44एह बरे मई तोहसे एक करार करइ चाहत अहउँ। हम पचे पाथर क ढेर लगाउब जउन इ बताइ कि हम पचे सन्धि कइ चुका अहइ।”

45एह बरे याकूब एक बड़की चट्टान हेरेस अउ ओका इ पता देइ बरे हुआँ राखेस कि उ सन्धि किहेस ह। 46उ आपन मनइयन क अउर जियादा चट्टानन क हेरइ अउ चट्टानेँ क ढेर लगावइ क कहेस। तब उ पचे चट्टानन क लगे भोजन किहन। 47लाबान उ जगह क नाउँ यज्ञ सहादूथ राखेस। मुला याकूब उ जगह क नाउँ जिलियाद धरेस।

48लाबान याकूब स कहेस, “इ चट्टानन क ढेर हम दुइनउँ क हमार करार क सुमिरावइ मँ मदद करी।” इ कारण अहइ कि याकूब उ जगह क नाउँ गिलयाद कहेस।

49तब लाबान कहेस, “यहोवा हम पचन क एक दूसर स अलग होइ क गवाह रहइ।” एह बरे उ जगह क नाँउ मिजपा भी होगा।

50तब लाबान कहेस, “अगर तू मोर बिटियन क चोट पहोँचउब्या तउ याद राखा, परमेस्सर तोहका दण्ड देइ। अगर तू दूसर मेहरारु स बियाह करब्या तउ याद राखा, परमेस्सर तोहका लखत बाटइ। 51हिआँ इ सबइ चट्टानन अहई, जउन हमरे बीच मँ धरी अहई अउ इ खास चट्टान अहई जउन बतइहीं कि हम सन्धि कीन्ह ह। 52चट्टानन क ढेर अउ इ खास चट्टान हमका सन्धि क सुमिरन करावइ मँ मदद करी तू मोहसे लइइ बरे इ चट्टानन स आगे मोर कइँती कबहुँ न अउब्या। 53जदि हम पचे इ सन्धि क तोड़ देइ तउ इब्राहीम क परमेस्सर, नाहोर क परमेस्सर अउ ओनके पुरखन क परमेस्सर हम पचन क निआव करी।”

याकूब क पिता इसहाक परमेस्सर क “भय” नाउँ स गोहराएस। एह बरे याकूब वाचा बरे उ नाउँ क प्रयोग किहस। 54तब याकूब एक जनावर क मारेस अउ पहाड़े पइ

बलि क रूप मँ एँका भेंट चढ़ाएस अउ उ आपन मनइयन क भोज मँ सामिल होइ बरे बोलाएस। भोजन करे क पाछे उ पचे पहाड़े प राति काटेन। 55दूसर दिन भिन्सारे लाबान आपन नातियन क चूमेस अउ बिटियन क बिदा किहस। उ ओनका असीसेस अउ घर लउटि गवा।

एसाव क संग पुन मेल

32 याकूब भी उ जगह तजेस। जब उ जात्रा करत रहा। उ परमेस्सर क सरगदूत क लखेस। 2जब याकूब ओनका लखेस तउ कहेस, “इ परमेस्सर क पड़ाव अहइ।” एह बरे याकूब उ जगह क नाउँ महनैम धरेस।

3याकूब क भाई एसाव सेईर नाउँ क पहँटा मँ रहत रहा। इ एदोम क पहाड़ी पहँटा रहा। याकूब एसाव क लगे दूत पठाएस। 4याकूब दूत स कहेस, “मोर सुआमी एसाव क इ खबर द्या, ‘तोहार नउकर याकूब कहत ह, मई इ सबइ बरिस मँ लाबान क संग रहेउँ ह। 5मोरे लगे गोरु, गदहन, झुण्ड अउ बहोत स नउकरन अउ मेहरारु नउकरन अहई। मई एनका तोहरे लगे पठवत अहउँ अउ चाहत अहउँ कि तू हमका अंगीकार करा।”

6दूत याकूब क लगे लउटा अउ बोला, “हम तोहरे भाई एसाव क लगे गए। उ तोहसे भेंटइ आवत अहइ। ओकरे संग चार सौ अउजार धारी वीर अहई।”

7उ संदेसा याकूब क डेराइ दिहस। उ आपन सबहिँ संगियन क दुइ दले मँ अलगाइ दिहस। उ आपन सबहिँ भेड़िन क खरका, गोरुअन क झुण्ड अउ ऊँटन क दुइ हींसा मँ बाँटेस। 8याकूब सोचेस, “अगर एसाव आइके एक हींसा क नास करत ह तउ दूसर हींसा पराइ सकत ह अउ बचि सकत ह।”

9याकूब कहेस, “हे मोरे पुरखा इब्राहीम क परमेस्सर। हे मोरे पिता इसहाक क परमेस्सर। यहोवा, तू मोका आपन देस मँ लउटइ अउ आपन परिवारे मँ आवइ बरे कह्या। तू कह्या कि तू मोर भलाई करिब्या। 10तू मोहे प बहोत दयालु रह्या ह। तू मोरे बरे बहोत नीक चीज किह्या ह। पहिली दाई मई जरिदन नदी क लगे जात्रा कीन्ह, मोरे लगे टहरइ क कुबरी क अलावा कछू भी नाहीं रहा। मुला मोरे लगे अब ऐतनी चीजन बाटिन कि मई ओनका पूरा दुइ दलन मँ बाँटि सकउँ। 11तोहसे पराथना करत अहउँ कि कृपा कइके मोका मोरे भाई एसाव स बचावा। मई ओसे ससान अहउँ। एह बरे कि उ आइ अउ सबहिँ क, हिआँ तलक कि बच्चन क संग महतरियन क भी जान स मारि डइ। 12हे यहोवा, तू मोसे कह्या, ‘मई तोहार भलाई करब। मई तोहरे परिवार क बढ़ाउब अउ तोहरे संताने क समुद्र क बालू क कणन क तरह बाढ़इ देब। उ सबइ ऐतना बेसी होइहीं कि गना नाहीं जाइ सकिहीं।”

13याकूब रात क उ जगह ठहरा। याकूब कछू चीजन एसाव क भेंट देइ बरे तइयार किहस। 14याकूब दुइ सौ बोकरियन, बीस तु बोकरन, दुइ सौ भेड़िन अउ बीस भेड़ा लिहस। 15याकूब तीस तु ऊँट अउ ओनकइ बच्चन, चालीस तु गइयन अउ दस तु बर्धन, बीस तु मादा गदहन अउ दस नर गदहन क लिहस। 16याकूब जनावरन क हर झुण्ड

नउकरन क दिहस। तब याकूब नउकरन स कहेस, “सब जनावरन क हर झुण्ड क अलग कइ ल्या। मोरे अगवा - अगवा चला अउ हर झुण्ड क बीच कछू दूरी राखा।” 17याकूब ओनका हुकुम दिहस। जनावरन क पहिले झुण्ड वाला नउकर स याकूब कहेस, “मोर भाई एसाव जब तोहरे लगे आवइ अउ तोहसे पूछइ, ‘इ केकर जनावर अहई? तू कहाँ जात अहा? तू केकर नउकर अहा?’ 18तब तू जवाब दिहा, ‘इ सबइ जनावरन आप क सेवक याकूब क अहई। याकूब एनका आपन सुआमी एसाव क भेंट क रुप में पठाएस ह, अउ याकूब भी हम लोगन क पाछे आवत अहइ।”

19याकूब क दूसर नउकर, तीसरा नउकर, अउर सबहिं दूसर नउकरन क इहइ बात करइ क हुकुम दिहस। उ कहेस, “जब तू पचे एसाव स भेट्या तउ इहइ एक बात कहब्या। 20तू पचे कहब्या, ‘इ आप क भेंट अहइ, अउर आप क सेवक याकूब भी लोगन क पाछे आवत अहइ।”

याकूब सोचेस, “जदि मई भेंट क संग इ मनइयन क आगे पठवत हउँ तउ इ होइ सकत ह कि एसाव मोका छिमा कइ देइ अउ मोका अंगीकार कइ लेइ।” 21एँह बरे याकूब एसाव क भेंट पठाएस। मुला याकूब उ रात आपन पड़ाव में ही ठहरा।

22पाछे उहइ रात याकूब उठा अउ उ जगह क तजि दिहस। याकूब आपन दुइनउँ मेहररुअन, आपन दुइनउँ दासिन अउ आपन ग्यारहु पूतन क साथ लिहस। घाटे प जाइके याकूब यब्बोक नदी क पार किहस। 23याकूब आपन परिवार क नदी क उ पार पठाएस। तब याकूब आपन सबहिं चिजियन क नदी क ओह पार पठइ दिहस।

परमेस्सर स मल्ल जुद्ध

24याकूब नदी क पार करइवाला आखिर मनई रहा। मुला पार करइ स पहिले जब तक उ अकेला ही रहा, एक ठु मनई आवा अउ ओसे कुस्ती लड़इ लाग। उ मनई ओसे तब तलक कुस्ती लड़ेस जब तलक सूरज न निकरा। 25मनई लखेस कि उ याकूब क हराइ नहीं सकत। एँह बरे उ याकूब क गोड़ क ओकरे कूल्हा क जोड़ प छुएस। उ टेम याकूब क कूल्हा क जोड़ आपन जगह स हट गवा।

26तब उ मनई याकूब स कहेस, “मोका छोड़ द्या। सूरज ऊपर चढ़त बाटइ।”

मुला याकूब कहेस, “मई तोहका न छोड़ब। मोका तोहका असीबादि देइ क होइ।”

27अउर उ मनई ओसे कहेस, “तोहार का नाउँ अहइ?”

अउर याकूब कहेस, “मोर नाउँ याकूब बाटइ।”

28तब मनई कहेस, “तोहार नाउँ याकूब नहीं रही। अब तोहार नाउँ इस्त्राएल होइ। मई तोहका इ नाउँ एँह बरे देत हउँ कि तू परमेस्सर क संग अउ मनइयन क संग जुद्ध किहा ह अउ तू हरावा नहीं जाइ सक्या।”

29तब याकूब ओसे पूछेस, “कृपा कइके मोका आपन नाउँ बतावई।”

मुला उ मनई कहेस, “तू मोर नाउँ काहे पूछत अहा?” उ टेम उ मनई याकूब क असीसेस।

30एँह बरे याकूब उ जगह क नाउँ पनीएल राखेस। याकूब कहेस, “इ जगह मई परमेस्सर क साच्छात दरसन किहेउँ ह। किन्तु मोर जिन्नगी बच गइ।” 31जइसे ही उ पनीएल स गुजरा, सूरज निकरि आवा। याकूब आपन गोड़े क कारण लँगड़ाइ के चलत रहा। 32एँह बरे आजु भी इस्त्राएल क लोग पुट्टा क मांस पेसी क नहीं खातेन काहेकि इहइ मांस पेसी प याकूब क चोट लागि रही।

याकूब आपन बहादुरी देखावत ह

33 याकूब निगाह उठाएस अउ एसाव क आवत लखेस। एसाव आवत रहा अउ ओकरे संग चार सौ मनई रहेन। याकूब आपन परिवार क चार टोली में बाटेस। लिआ अउ ओकर बच्चन एक दल में रहेन, राहेल अउ यूसुफ एक दले में रहेन, दासी अउ ओकर लरिकन दुइ दले में रहेन। 2याकूब दासियन अउ ओनके बच्चन क अगवा राखेस। ओकरे पाछे ओनके पाछे लिआ अउ ओकरे बच्चन क राखेस अउर याकूब राहेल अउ यूसुफ क सब क आखिर में राखेस।

3याकूब एसाव की ओर बढ़ा। एँह बरे उ पहिला मनई रहा जेकरे संग एसाव मिलेस। अपने भाई कइँती बढ़त टेम प याकूब सात दाई भुँइया प निहुरिके पैलगी किहेस।

4जब एसाव याकूब क लखेस, उ ओसे भेटइ दौड़ गवा। एसाव याकूब क आपन बाँही में भरि लिहस अउ छाती स चिपकाएस तब एसाव ओकर गरदन स चिपकाएस अउ ओकर चुम्बन लिहस। अउ दुइनउँ आनन्द स रोइ पड़ेन। 5एसाव निगाह उठाएस अउ मेहररुअन अउ बच्चन क लखेस। उ कहेस, “तोहरे संग इ सबइ कउन लोग अहई?” याकूब जवाब दिहस, “इ सबइ उ बच्चन अहई जेका परमेस्सर मोका दिहे अहइ। परमेस्सर मोहे प दयालु रहा ह।”

6तब दुइनउँ दासियन आपन बच्चन क संग एसाव क लगे गएन। उ पचे ओका निहुरिके पैलगी किहन। 7तब लेआ आपन बच्चन क संग एसाव क समन्वा गइन अउ उ पैलगी किहस अउर तब राहेल अउ यूसुफ एसाव क समन्वा गएन अउ उ पचे भी पैलगी किहन।

8एसाव कहेस, “मई जउन सब मनइयन क हिआँ आवत समइ देखेउँ उ सबइ कउन रहेन? अउ उ सबइ गोरुअन काहे बरे रहेन?”

याकूब जवाब दिहस, “उ सबइ तोहका मोर भेंट अहई जेहसे तू मोका अंगीकार कइ सका।”

9मुला एसाव कहेस, “भाई, तोहका मोहे बरे कउनो भेंट नहीं देइ चाही काहेकि मोरे लगे सब कछू इफरात बाटइ।”

10याकूब कहेस, “नहीं! मई तोहसे बिनती करत अहउँ। जदि तू फुरे मोका अपनावत ह तउ कृपा कइके जउन भेंट देत अहउँ तू अपनावा। मई तोहका दूसरी दाई लखि के बहोत खुस अहउँ। इ तउ परमेस्सर क लखइ जइसा बाटइ। मई इ लखिके बहोत खुस अहउँ कि तू मोका अपनावत ह। 11एँह बरे मई बिनती करत हउँ कि जउन भेंट मई देत अहउँ ओका भी अंगीकार करा। परमेस्सर मोरे ऊपर बहोतइ कृपालु रहा ह। मोरे लगे आपन जरुरत स बेसी अहइ।” इ

तरह याकूब एसाव स भेट अंगीकार करइ के बिनती किहेस।
 12तब एसाव कहेस, “अब तू आपन जात्रा जारी किहे रहि
 सकत ह। मई तोहरे संग चलब।”

13मुला याकूब ओसे कहेस, “तू इ जानत ह कि मोरे
 बच्चन अबहि दुर्बल बाटेन अउर मोका आपन झुण्ड अउ
 ओनके बच्चन क खास देख-रेख करइ चाही। अगर मई
 ओनका बहोत दूर एक दिन मँ चलइ बरे मजबूर करत हउँ
 तउ सबहि गोरु मरि जइहीं। 14एँह बरे तू आगे चला अउ
 मई रसे रसे तोहरे पाछे आउब। मई गोरुअन अउ दूसर
 जनावरन क रच्छा बरे धीमे बढ़ब अउ मई बहोतइ रसे-रसे
 एँह बरे चलब कि मोर गदेलन बहोत जियादा थक न जाई।
 मई सेइर मँ तोहसे मिलब।”

15एँह बरे एसाव कहेस, “तब मई आपन कछू संगियन क
 तोहरी मदद बरे छोड़ देब।”

मुला याकूब कहेस, “इ तोहार बिसेस दाया बाटइ।” मुला
 अइसा करइ क कउनो जरुरत नाही बा।”

16एँह बरे उ दिन एसाव सेइर क वापसी जात्रा प चल
 पड़। 17मुला याकूब सुक्कोत क गवा। हुआँ उ आपन बरे
 एक ठु घर बनाएस अउर आपन गोरुअन बरे एक नान्ह
 नान्ह गोसालन क बनाएस। इहइ कारण इ जगह क नाउँ
 सुक्कोत रखेस।

18याकूब सुरच्छा क साथ आपना जात्रा पढ़न-अराम स
 सुरू कई क कनान पहुँटा मँ सकेम सहर तलक समाप्त
 किहेस। याकूब सहर क निचके मइदान मँ डेरा डाएस।
 19याकूब उ भुईया क सकेम क बाप हमोर क परिवारे स
 बेसहेस। याकूब चाँदी क एक सौ सिक्का दिहस। 20याकूब
 परिवार क आराधना बरे हुआँ एक ठु वेदी बनाएस। याकूब
 जगह क नाउँ “एले, इस्त्राएल क परमेस्सर” रखेस।

दीना क संग कुकर्म

34 दीना लिआ अउ याकूब क बिटिया रही। एक दिन
 दीना उ पहुँटा क मेहररुअन क लखइ बाहेर गइ।
 2उ पहुँटा क राजा हमोर क पूत सकेम दीना क निहारेस। उ
 ओका धइ लिहस अउ आपन संग तने क सम्बंध रखइ बरे
 ओका बेबस किहस। 3उ सकेम याकूब क बेटी दीना स
 पियेस करइ लाग। एँह बरे उ ओकर दिल जीतइ क कोसिस
 किहेस। 4सकेम आपन बाप स कहेस, “कृपा कइके इ
 लउँडिया क मोका दिआवा जेहसे मई एकरे संग बियाह कइ
 सकउँ।”

5याकूब इ जान लिहेस कि सकेम ओकरी बिटिया दीना
 क संग बहोत बुरा कर्म किहस ह। मुला याकूब क सबहि
 पूत आपन गोरुअन क संग मइदान मँ गएन। एँह बरे उ
 सबइ जब तलक नाही आएन, याकूब कछू नाही किहस। 6उ
 टेम सकेम क बाप हमोर याकूब क संग बात करइ गवा।
 7खेतन मँ याकूब क पूतन जउन कछू भवा रहा, ओकर
 खबर सुनेन। जब उ पचे इ सुनेन तउ उ पचे बहोत कोहाइ
 गएन। उ पचे पगलाइ स गएन काहेकि सकेम याकूब क
 बिटिया क बलात्कार कइ के इस्त्राएल क बदनाम किहस।

सकेम बहोतइ धिनौनी बात किहे रहा। एँह बरे सबहि भाई
 लोग खेतन स घर लउटेन।

8मुला हमोर भाइयन स बात किहेस। उ कहेस, “मोर पूत
 सकेम दीना स बहोत पियेस करत ह। मेहरबानी कइके ओका
 एकरे संग बियाह करइ द्या। 9इ बियाह इ बात क प्रमाण
 होइ कि हम पचे खास सन्धि कीन्ह ह। तब हमार लोग तू
 पचन क मेहररुअन स अउ तोहार लोग हम पचन क
 मेहररुअन क संग बियाह कइ सकत हीं। 10तू लोग हमारे
 संग एक पहुँटा मँ रहि सकित ह। तू भुईया क सुआमी
 बनब्या अउर हिआँ बइपार करइ बरे अजाद होब्या।”

11सकेम याकूब अउ दीना क भाइयन स भी बात किहस।
 सकेम कहेस, “कृपा कइके मोका अंगीकार करा अउ मई
 जउन किहेउँ ओकरे बरे छिमा करा। 12मई तोहका जउन
 कछू उपहार तू चाहत ह देब, अगर तू मोका सिरिफ दीना
 क संग बियाह करइ द्या।” मोका जउन कछू आप लोग
 करइ क कइहीं करब, मुला दीना क बियाह मोर संग होइ
 द्या।”

13याकूब क बेटहनन सकेम अउ ओकरे बाप स झूठ
 बोलइ क ठान लिहना। भाइयन अबहुँ भी पागल होत रहेन
 काहेकि सकेम ओनकइ बहिन दीना क संग अइसा धिनौना
 बेउहार किहे रहेन। 14एँह बरे भाइयन ओसे कहेन, “हम
 लोग तोहका आपन बहिन क संग बियाह नाही करइ देब
 काहेकि तोहार खतना अबहि नाही भवा अहइ। हमरी बहिनी
 क तोहसे बियाह करब ठीक न होइ। 15मुला हम पचे
 तोहका ओकरे संग बियाह करइ देब अगर तू इहइ एक
 काम करा कि तोहरे सहर क हर मनई क खतना हम पचन
 क तरह होइ जाइ। 16तब तोहरे मनई हमरी अउरतन स
 बियाह कइ सकत हीं अउर हमार मनई तोहरी अउरतन स
 बियाह कइ सकत हीं। तब हम पचे एक ही लोग बन जाब।
 17जदि तू खतना कराउब नाही कबूल करब्या तउ हम लोग
 दीना क लइ जाब।”

18इ सन्धि हमोर अउ सकेम क बहोत खुस किहस।
 19दीना क भाइयन जउन कछू कहेन ओका करइ मँ सकेम
 बहोत खुस भवा।

बदला

सकेम परिवार क सबसे जियादा मर्जादी मनई रहा।
 20हमोर अउ सकेम अपने सहर क सभाघर क गएन। उ
 पचे सहर क लोगन स बातन किहन अउ कहेन 21“इस्त्राएल
 क इ सबइ लोग हमार मीत होवा चाहत हीं। हम लोगन क
 पास हम सबहि लोगन बरे संतुट्ट भुईया अहइ। एह बरे उ
 लोगन क हम लोगन क भुईया रहइ द्या अउर एहमाँ
 बइपार करइ द्या। हम पचे एँकी मेहररुअन क संग बियाह
 करइ क अजाद अही अउ हम लोग आपन मेहररुअन
 ओनका बियाहे बरे देइ मँ खुस अही। 22मुला एक बात
 अहइ जेका करइ बरे सबहि क सन्धि करइ क होइ। ताकि
 उ पचे हम लोगन क बीच रही सका अउर हम पचे एक
 ही लोगन होइ सकब। हमार सबइ लोग भी उपचन्क क
 नाई खतना करावइ बरे राजी हो जाब। 23जदि हम अइसा
 करब तउ ओनके गोरुअन अउ जनावरन स हम धनी होइ

जाब। एँह बरे हम लोग ओनके संग इ सन्धि करी अउर उ पचे हिआँ हम लोगन क संग रइहीं।” 24सभाघरे प जउन लोगन इ बात सुनेन उ पचे हमोर अउ सकेम क संग राजी होइ गएन अउ उ टेम हर एक मनई क खतना कइ दीन्ह गवा।

25तीन दिना पाछे, खतना कइ दीन्ह गए मनइयन क अबहिं जखम रहेन। याकूब क दुइ पूत सिमोन अउ लेवी जानत रहेन कि टेम लोग कमजोर होइहीं, एँह बरे उ नगर क गएन अउर उ पचे सबहिं मनइयन क मारि डाएन। 26दीना क भाई सिमोन अउ लेवी हमोर अउ ओकरे पूत सकेम क मारि डाएन। उ पचे दीना क सकेम क घरे स बहियाइ दिहेन अउ उ पचे चला गएन। 27याकूब क दूसर पूतन सहर में गएन अउ उ पचे हुआँ जउन कछू रहा, लूटि लिहिन। सकेम जउन कछू ओनकइ बहिनी क संग किहे रहा, ओसे उ सबइ तब तलक कोहान रहेन। 28एँह बरे भाइयन ओनकइ सबहिं जनावरन लइ लिहेन। उ पचे ओनकइ गदहन अउ सहर अउ खेतन में दूसर जउन कछू रहा, सब स लइ लिहिन। 29भाइयन ओन सबन क सब कछू लइ लिहिन। भाइयन ओनकइ मेहररुअन अउ बच्चन तलक क लइ लिहिन।

30मुला याकूब सिमोन अउ लेवी स कहेस, “तू पच मोर बरे मुसीबत खड़ी कइ दिहा ह। अउ इ प्रदेश क बसइयन क मन में घिना पइदा कराया ह। सबहिं कनानी अउ परिज्जी लोग हमरे खिलाफ होइ जइहीं। हिआँ हम बहोत तनिक अही। अगर इ पहुँटा क लोग हम पचन क खिलाफ लइइ खातिर बटुरि जइहीं तउ हम पचन बर्बाद होइ जाब। अउ हमरे संग हमार सबहिं लोग नस्त होइ जाइहीं। अउर मई अउ मोरे घरे क सबहिं लोगन बर्बाद होइ जाइहीं।”

31मुला भाइयन जवाब दिहिन, “कम हम पचे ओन मनइयन क आपन बहिनी क संग पतुरिया जइसा बेउहार करइ देइ? नाहीं हमरी बहिनी क संग वइसा बेउहार करइ वाला लोग बुरा रहेन।”

याकूब बेतेल में

35 परमेस्सर याकूब स कहेस, “बेतेल सहर क जा, हुआँ बस जा अउ हुवँइ “एल,” परमेस्सर बरे जउन तोहरे समन्वा परगट भवा रहा जब तू आपन भाई एसाव स बचि के परात रह्या एक वेदी बनावा।”

2एँह बरे याकूब आपन परिवार अउ आपन सबहिं नउकरन स कहेस, “काठ अउ धातु क बना जउन बिदेसी देवतन तू पचन क लगे अहइँ ओनका नस्त कइ द्या। अपने क पवित्र करा। ओढ़ना साफ पहिरा। 3हम पचे इ जगह क तजि देब अउ बेतेल क जाब। उ जगह में आपन परमेस्सर बरे एक वेदी बनाउब। इ उहइ परमेस्सर अहइ जउन मोरे कस्त क समइ मोर मदद किहस अउ जहाँ कहुँ मई गवा उ मोरे संग रहा।”

4एँह बरे मनइयन क लगे जउन बिदेसी देवता रहेन, ओन सबहिं क उ पचे याकूब क दइ दिहिन। उ पचे आपन काने में पहिरी भइ सब बालियन क भी याकूब क दइ दिहिन।

याकूब सकेम नाउँ क सहर क नगिचे एक बलूत क बृच्छ क तरे इ सबहिं चिजियन क गाइ दिहस।

5तउ उ पचे तजि गएन अउर परमेस्सर ओनका चरीहू कइँती क सभी सहरन पइ भयंकर डर डाल दिएन। एँह ठू बरे उ पचे याकूब क पूतन पाछा नाहीं किहस। 6एँह बरे याकूब अउ ओकर लोग लूज पहोचैन। अब लूज क बेतेल कहत हीं। इ कनान प्रदेश में बाटइ। 7याकूब हुआँ एक तु वेदी बनाएस। याकूब उ जगह क नाउँ “एल बेतेल” राखेस। याकूब इ नाउँ क एँह बरे चुनेस कि जब उ आपन भाई क हिआँ स परात रहत रहा, तब पहिली दाई परमेस्सर हिआँई परगट भवा।

8रिबका क धाई दबोरा हिआँई मरी रही, उ पचे बेतेल में सिन्दूर क बृच्छ क खाले ओका गाइ दिहिन। उ पचे उ ठउर क नाउँ अल्लोनबक्कूत रखेन।

याकूब क नवा नाँउ

9जब याकूब फद्दान आराम स लउटा तब परमेस्सर फुन ओकरे समन्वा परगट भवा। परमेस्सर याकूब क असीसेस। 10परमेस्सर याकूब स कहेस, “तोहार नाँउ याकूब अहइ। मुला मई उ नाउँ क बदलब। अब तू याकूब नाहीं कहवउब्या। तोहार नवा नाउँ इस्त्राएल होइ।” एँह बरे एकरे पाछे याकूब क नाँउ इस्त्राएल भवा।

11परमेस्सर ओसे कहेस, “मई सर्वोच्च परमेस्सर अहउँ अउ तोहका मई इ आसीबादि देत हउँ तोहरे बहोत संतान होइँ अउर तू एक महान रास्ट्र बनी जाब्या। बहोत सारे रास्ट्र तोहसे अइहीं अउर राजा लोग तोहसे आइहीं। 12मई इब्राहीम अउ इसहाक क इ भुइँया दिहे रहेउँ। अब मई इ भुइँया तोहका अउर तोहार सन्तानन क देत अहउँ।” 13तब परमेस्सर उ जगह तजि दिहस। 14-15याकूब इ ठउरे प एक स्मृति चट्टान खड़ी किहस। याकूब ओह चट्टान पइ दाखरस अउर तेल क भेंट उडैरेस। इ एक खास ठउर रहा काहेकि परमेस्सर हुआँ याकूब स बात किहस अउर याकूब उ ठउर क नाउँ बेतेल राखेस।

राहेल जन्म देत समइ मरी

16याकूब अउ ओकर दल बेतेल क तजि दिहिन। एप्राता आवइ स ठीक पहिले राहेल आपन बच्चन क जन्म देइ लाग। 17मुला राहेल क इ जन्म स बहोत तकलीफ होइ लाग। ओका बहोत दर्द होत रहा। राहेल क धाई ओका लखेस अउ कहेस, “राहेल, डेराअ जिन। तू एक अउर पूत क जन्म देति अहा।”

18पूत क जन्म देत समइ राहेल मरि गइ। मरइ क पहिले राहेल बच्चा क नाउँ बेनोनी राखेस। मुला याकूब ओकर नाँउ बिन्यामीन राखेस।

19एप्राता क आवइवाली सड़क प राहेल क दफनावा गवा। (एप्राता बेतेलेहेम अहइ।) 20अउर याकूब राहेल क सम्मान में ओकरी कब्रे प एक तु चट्टान धरेस। उ खास चट्टान हुआँ आजु तलक बाटइ। 21तब इस्त्राएल आपन जात्रा जारी राखेस। उ एदेर बुर्ज खम्भा क ठीक दक्खिन में आपन सिबिर डाएस।

22इस्त्राएल हुआँ तनिक समइ ठहरा। जब उ हुआँ रहा तब रूबेन इस्त्राएल क मेहरारु नउकरन बिल्हा क संग सोएस। इस्त्राएल इ बारे में सुनेस अउ बहोत कोहाइ गवा।

इस्त्राएल क परिवार

याकूब क बारह पूत रहेन।

23ओकरी मेहरारु लिआ स ओकरे छः पूत रहेनः रूबेन, सिमोन, लेवी, यहूदा, इस्साकार, जबूलून।

24ओकरी मेहरारु राहेल स ओकरे दुइ पूत रहेनः यूसुफ अउ बिन्यामीन।

25राहेल क दासी बिल्हा स ओकरे दुइ पूत रहेनः दान अउ नप्ताली।

26अउर लिआ क दासी जिल्पा स ओकरे दुइ पूत रहेनः गाद अउ आसेर। इ सबइ क पूत अहईँ जउन पददनराम में पइदा भए रहेन।

27मझे क किर्यत-अर्बा अर्थात् हेब्रोन में याकूब आपन पिता इसहाक क लगे गवा। इ उहइ जगह अहइ जहाँ इब्राहीम अउ इसहाक रहि चुका रहेन। 28इसहाक एक सौ अस्सी बरिस क रहा। 29इसहाक बहोत बरिस तलक जिअत रहा। जब उ मरा, उ बहोत बुढ़वा रहा। ओकरे पूत एसाव अउ याकूब ओका हुआँइ दफनाएन जहाँ ओकरे पिता क दफनावा गवा रहा।

एसाव क परिवार

36 एसाव अर्थात् एदोम क परिवार क इतिहास अहइ। 1एसाव कनान देस क मेहररुअन स बियाह किहस। एसाव क मेहररुअन रहिनः आदा, हिती एलोन क बिटिया। ओहोलीबामा हिच्वी सिबोन क नतिनी अउ अना क बिटिया। 3बासमत इस्त्राएल क बिटिया अउ नबायोत क बहिन। 4आदा एसाव क एक पूत एलीपज दिहस। बासमत क रूएल नाउँ क पूत भवा। 5ओहोलीबामा एसाव क तीन पूत दिएस यूस, यालाम अउ कोरह इ सबइ एसाव क पूत रहेन। इ सबइ कनान पहुँटा में पइदा भए रहेन।

6-8याकूब अउ एसाव क परिवार अब बहोत बाढ़ि गएन अउ अउ कनान में इ बड़ा परिवार क खाइ-पिअइ क जुटाइ पाउब कठिन होइ गवा। एँह बरे एसाव कनान तजि दिहस अउ आपन भाई याकूब स दूर दूसर पहुँटा में चला गवा। एसाव आपन सबहिँ चीजन क आपन संग लिआवा। कनान में रहत भवा उ सबहिँ इ चीजन क पाए रहा। एँह बरे एसाव आपन संग आपन मेहररुअन, पूतन, बिटियन सबहिँ नउकरन, गोरु अउ दूसर सबहिँ जनावरन क लिहस। एसाव अउ याकूब क परिवार एँतना बाढ़त रहेन कि ओनका एक जगह प रहब कठिन रहा। उ भुइँया दुइनउँ परिवारे क पेट पालइ बरे जियाद नाहीं रही। ओनके लगे बहोत जियाद गोरु रहेन। एसाव पहाड़ी पहुँटा सेईर कइँती बढ़ा। (एसाव क नाउँ एदोम भी अहइ।)

9एसाव एदोम क मनइयन क आदि बाप रहा। सेईर क पहाड़ी पहुँटा में बसइयन एसाव क घराने क इ नाउँ अहईँ।

10एसाव क पूत रहेनः एलीपज, आदा अउ एसाव क पूत। रूएल बासमत अउ एसाव क पूत।

11एलीपज क पाँच पूत रहेनः तेमान, ओमार, सपो, गाताम अउ कनज। 12एलीपज क एक तिम्ना नाँउ क उपपत्नी भी रही। तिम्ना अउ एलीपज अमालेक क जन्म दिहिन।

13रूएल क चार पूत रहेनः नहत, जेरह, सम्मा, मिज्जा।

इ सबइ एसाव क मेहरारु बासपत स ओकरे पोता रहेन।

14एसाव क तीसर मेहरारु अना क बिटिया ओहोलीबामा रही। (अना सिबोन क पूत रहा।) एसाव अउ ओहोलीबामा क पूत रहेनः यूस, यालाम, कोरह।

15एसाव स चलइ वाला बंस इ सबइ ही बाटेन।

एसाव क पहिला पूत एलीपज रहा। एलीपज स तेमान, ओमार, सपो, कनज, 16कोरह, गाताम, अमालेक भएन।

इ सबहिँ परिवार एसाव क मेहरारु आदा स भएन।

17एसाव क पूत रूएल इ परिवारन क आदि पिता रहाः नहत, जेरह, सम्मा, मिज्जा।

इ सबहिँ परिवार एसाव क मेहरारु बासमत स भएन।

18अना क बिटिया एसाव क मेहरारु ओहोलीबामा यूस, यालाम अउ कोरह क जन्म दिहिन। इ सबइ तीनउँ आपन-आपन घराने क बाप रहेन। 19इ सबहिँ परिवार एसाव स चलेन।

20एसाव क पहिले एदोम में सेईर नाँउ क एक ठु होरी मनई रहत रहा। सेईर क पूत इ सबइ अहईँः लोतान, सोबाल, सिबोन, अना 21दीसोन, एसेर, दिसान। इ सबइ पूतन आपन परिवार क मुखिया रहेन।

22लोतान, होरी, हेमाम क बाप रहा। (तिम्ना लोतान क बहिन रही।) 23सोबाल, अल्वान, मानहत एबल सपो, ओनाम क पिता रहा।

24सिबोन क दुइ पूत रहेनः अय्या अउर अना। (अना उ मनई अहइ जउन आपन पिता क गदहन क देखरेख करत समइ रेगिस्तान में गरम पानी क झरना हेरेस।)

25अना, दीसोन अउ ओहोलीबामा क पिता रहा।

26दीसोन क चार पूत रहेनः हेमदान, एस्बान, यित्रान, करान।

27एसेर क तीन पूत रहेनः बिल्हान, जावान, अकान।

28दीसान क दुइ पूत रहेनः ऊस अउ अरान।

29इ होरी परिवारन क मुखियन क नाउँ अहईँ। लोतान, सोबाल, सिबोन, अना। 30दीसोन, एसेर, दीसान। इ सबइ मनइयन ओन परिवारन क मुखिया रहेन जउन सेईर पहुँटा में रहत रहेन। 31उ टेम एदोम में कइउ राजा रहेन। इस्त्राएल में राजा होइ के बहोत पहिले एदोम में राजा रहेन।

32बोर क पूत बेला एदोम में राज्ज करइ वाला राजा रहा। उ दिन्हाबा सहर प राज्ज करत रहा। 33जब बेला मरा तउ योबाब राजा भवा। योबाब बोस्त्रा क जेरह क पूत रहा। 34जब योबाब मरा, हूसाम राज्ज किहस। हूसाम तेमानी लोगन क देस क रहा। 35जब हूसाम मरा, हदद उ पहुँटा प राज्ज किहस। हदद बदद क पूत रहा। (हदद उ मनई रहा जउन मिदयानी लोगन क मोआब देस में हराए रहा।) हदद अबीत सहर क रहा। 36जब हदद मरा, सम्ला उ प्रदेस प राज्ज किहस। सम्ला मस्त्रेक क रहा। 37जब सम्ला मरा, साऊल उ पहुँटा प राज्ज किहस। साऊल फरात नदी क किनारे रहोबोत क रहा। 38जब साऊल मरि गवा, बाल्हानान उ देस प हूकूमत किहस। बाल्हानान अकबोर क पूत रहा। 39जब

बालहानान मरा, हदर उ प्रदेस प राज्ज किहस। हदर पाऊ सहर क रहा। मत्रेद क बिटिया हदर क मेहरारु क नाउँ महेतबेल रहा। मत्रेद क बाप मेजाहब रहा।

40-43 एदोमी परिवारन, तिम्ना, अल्बा, यतेत, ओहोलीबामा, एला, पीपोन, कनज, तेमान, मिबसार, मगदीएल अउ ईराम आदि क बाप एसाव रहा। हर एक परिवार एक ठु अइसे प्रदेस में रहत रहा जेकर नाउँ उहइ रहा जउन ओनकइ परिवारे क नाउँ रहा।

सपन क देखइवाला यूसुफ

37 याकूब ठहरि गवा अउ कनान पहुँटा मँ रहइ लाग। इ उहइ प्रदेस अहइ जहाँ ओकर बाप आइके बसा रहा। 2 याकूब क परिवार क इहइ कथा अहइ।

यूसुफ एक सत्रह बरिस क जवान रहा। ओकर पेसा भेड़ी बोकरियन क देखेख करब रहा। यूसुफ इ काम अरथ अहइ कि बिल्हा अउ जिल्पा क पूतन क संग करत रहा। (बिल्हा अउ जिल्पा ओकरे बाप क मेहररुअन रहिन।) यूसुफ आपन बाप क आपन भाइयन क बुरी बातन बतावत रहा। 3 यूसुफ उ टेम पइदा भवा जब ओकर पिता इस्त्राएल बहोत बुढ़वा रहा। ऐह बरे इस्त्राएल, यूसुफ क आपन दूसर पूतन स बेसी पियार करत रहा। याकूब आपन पूत क एक खास कोट बनवाएस। इ कोट लम्बा अउ बहोत सुन्नर रहा। 4 यूसुफ क भाइयन लखेन कि ओनकइ बाप ओनसे बेसी यूसुफ क जियादा पियार करत ह। उ पचे इहइ कारण आपन भाई स घिना करत रहेन। उ पचे यूसुफ स अच्छी तरह बात नाहीं करत रहेन।

5 एक दाई यूसुफ एक खास सपन लखेस। पाछे यूसुफ आपन इ सपना क बारे मँ आपन भाइयन क बताएस। एकरे पाछे ओकरे भाई पहिले स भी जियादा ओसे घिना करइ लागेन।

6 यूसुफ कहेस, “मई एक सपना देखेउँ ह। 7 हम पचे सबहिं खेते मँ काम करत रहे। हम पचे गोहूँ क एक साथ बोझ बाँधत रहेन। मोर बोझा खड़ा होइ गवा अउ तू पचन क बोझ मोरे बोझे क चारिहूँ कइँती घेरि लिहस। तब तोहार सबहिं बोझ मोरे बोझे क निहुरिके प्रणाम किहस।”

8 ओकर भाइयन कहेन, “का, तू सोचत ह कि ऐंकर अरथ अहइ कि तू राजा बनब्या अउर हम पचन प राज्ज करब्या?” ओकर भाइयन यूसुफ स अब अउर बेसी घिना करब सुरु किहसेस काहेकि उ ओकरे बारे मँ सपना देखत रहा।

9 तब यूसुफ दूसर सपना देखेस। यूसुफ आपन भाइयन स इ सपना क बारे मँ बताएस। यूसुफ कहेस, “मई दूसर सपना लखेउँ ह। मई सूरज, चन्द्रमा अउ गियारह नखत्रन क आपन क प्रणाम करत लखेउँ।”

10 यूसुफ आपन बाप क भी इ सपना क बारे मँ बताएस। मुला ओकर पिता ओका डॉटिस। ओकर पिता कहेस, “इ कउने तरह क सपना अहइ? का तोहका बिस्पास अहइ कि तोहार महतारी, तोहार भाई अउ हम पचे तोहका प्रणाम करिबइ?” 11 यूसुफ क भाई ओहसे बराबर जलन करत रहा। मुला यूसुफ क पिता इ सबहिं बातन क बारे मँ बहोत

गहराई स बिचार किहस अउ सोचेस कि ओनकइ अरथ का होई?

12 एक दिन यूसुफ क भाई आपन बाप क भेड़िन क देखेख बरे सकेम गएन। 13 याकूब यूसुफ स कहेस, “सकेम जा। तोहार भाई मोर भेड़िन क साथ हुआँ अहइ।”

यूसुफ जवाब दिहस, “मई जाब।”

14 यूसुफ क बाप कहेस, “जा अउ लखा कि तोहार भाई सुरच्छित बाटइ। लौटिके आवा अउ बतावा कि का मोर भेड़िन ठीक अहई?” इ तरह यूसुफ क पिता ओका हेब्रोन क घाटी स सकेम क पठाएस।

15 सकेम मँ यूसुफ हेराइ गवा। एक मनई ओका खेतन मँ भटकत भवा पाएस। उ मनई कहेस, “तू का हेरत अहा?”

16 यूसुफ उत्तर दिहस, “मई आपन भाइयन क हेरत अहउँ। का तू बताइ सकत ह कि उ सबइ आपन भेड़िन क संग कहाँ अहई?”

17 मनई जवाब दिहस, “उ पचे पहिले ही चला गवा अहई। मई ओनका कहत भवा सुनेउँ कि उ पचे दोतान क जात अहई।” ऐह बरे यूसुफ आपन भाइयन क पाछे गवा अउ उ ओनका दोतान मँ पाएस।

यूसुफ गुलामी बरे बेच गवा

18 यूसुफ क भाइयन बहोत दूर स ओका आवत लखेन। उ पचे ओका मारि डावइ क कुचाल बनावइ क ठान लिहन। 19 भाइयन एक दूसर स कहेन, “इ सपना लखइवाला यूसुफ आवत अहइ। 20 मौका मिलत ही हम पचे ओका मारि डाइ। हम ओकरे तने क झुरान भए इरनन मँ स कउनो एक मँ लोकाइ सकित ह। हम आपन पिता स कहि सकित ह कि एक ठु जंगली जनावर ओका मारि डाएस। तब हम पचे ओका देखाउब कि ओकर सपना बेकार अहई।”

21 मुला रूबेन यूसुफ क बचावइ चाहत रहा। रूबेन कहेस, “हम पचे ओका मारी नाहीं। 22 हम लोग ओका बिना चोट किहे एक ठु इनारा मँ नाइ सकित ह।” रूबेन यूसुफ क बचावइ अउर ओकरे बाप क लगे पठवइ क योजना बनाएस। 23 यूसुफ आपन भाइयन क लगे आवा। उ पचे ओह प धावा बोल दिहन अउ ओकरे लम्बे अउ सुन्नर कोट क फाड़ डान। 24 तब उ पचे ओका खाली झुरान इनारा मँ बहाइ दिहन।

25 यूसुफ इनारा मँ ओकर भाइयन क भोजन करइ बरे बइठइ तलक रहा। तब उ पचे नजर उठाएन अउ बइपारियन क एक दल क लखेन। जउन गिलाद स मिस्त्र क जात्रा प रहेन। ओनकइ ऊँटन कइउ तरह क मसाला अउ धन लइ जात रहेन। 26 ऐह बरे यहूदा आपन भाइयन स कहेस, “अगर हम लोग आपन भाई क मारि देब अउ ओकरी मउत क छुपाउब तउ ओहसे हमका का लाभ मिली? 27 हम सबन क बेसी फायदा तब होइ जब हम ओका बइपारियन क हाथ बेचि देइ।” दूसर भाई लोग मान गएन। 28 जब मिद्रयानी बइपारी लोग लगे आएन, भाई लोग यूसुफ क इनारा स बाहेर निकारेन। उ पचे बीस ठु चौँदी क टूका मँ ओका बेचि दिहन। बइपारियन ओका मिस्त्र लइ गएन।

29इ पूरा टेम रूबेन भाइयन क संग हुआँ नहीं रहा। उ नहीं जानत रहा कि उ पचे यूसुफ क बेचि दिहे रहेन। जब रूबेन इनारा प लौटिके आवा तउ उ लखेस कि यूसुफ हुआँ नहीं अहइ। रूबेन बहोत जियादा दुःखी भवा। उ आपन ओढ़ना क फाड़ेस। 30रूबेन भाइयन क लगे गवा अउ उ ओनसे कहेस, “लरिका कुआँ प नहीं अहइ। मई का करउँ?” 31भाइयन एक बोकरी क मारेन अउ ओकरे खून क यूसुफ क सुन्नर कोट प डाएस। 32तब भाइयन उ कोट क आपन पिता क देखाएन अउ कहेन, “हमका इ कोट मिला बाटइ, का इ यूसुफ क कोट अहइ?”

33बाप कोट क लखेस अउ पहिचानेस कि इ यूसुफ क अहइ। पिता कहेस, “हैं, इ उहइ क बाटइ। होइ सकत ह कि ओका कउनो जंगली जनावर मारि जाए होइ। मोरे पूत यूसुफ क कउनो जंगली जनावर खाइ गवा।” 34याकूब आपन ओढ़ना फाड़ि डाएस अउर सोक क ओढ़ना पहिर लिहस। याकूब लम्बे समइ तलक आपन बेटवा क दुःख अउ सोक में पड़ा रहा। 35याकूब क सबइ बेटवन, बिटियन ओका धीरे बँधावइ क जतन किहन। मुला याकूब कबहुँ धीरे न धरि सका। याकूब कहेस, “मई मरइ क दिन तलक आपन पूत यूसुफ क दुःख में डूबा रहब।” अउर याकूब आपन पूत क दुःख परगट करना जारी रखा।

36ओनेँ मिदयानी बड़पारियन जउन यूसुफ क बेसहे रहेन, पाछे ओका मिस्त्र में बेचि दिहन। उ पचे फिरौन क अंगरच्छकन क सेनापति पोतीपर क हाथ ओका बेचेन।

यहूदा अउ तामार

38 ओनही दिनन में यहूदा आपन भाइयन क तजि दिहस अउ हीरा नाउँ क मनई क संग रहइ चला गवा। हीरा अदुल्लाम सहर क रहा। 2यहूदा एक कनानी मेहरारु स हुआँ मिला अउ ओसे बियाह कइ लिहस। मेहरारु क बाप क नाउँ सूआ रहा। 3कनानी मेहरारु एक पूत क जन्म दिहस। उ पचे ओकर नाउँ एर धरेन। 4पाछे दूसर पूत क जन्म दिहस। उ पचे लरिका का नाउँ ओनान धरेन। 5पाछे ओका दूसर पूत सेला नाउँ क भवा। यहूदा तीसर बच्चा क जन्म क टेम कजीब में रहत रहा।

6यहूदा आपन पहिले पूत एर बरे बहू क रूप में एक तु मेहरारु क चुनेस। मेहरारु क नाउँ तामार रहा। 7मुला एर बहोत सी बुरी बातन क किहस। यहोवा ओसे खुस नहीं रहा। एँह बरे यहोवा ओका मारि डाएस। 8तब यहूदा एर क भाई ओनान स कहेस, “जा अउर मेरे भाई क मेहरारु क संग सोआ।*। तू ओकरे भतार क नाई बना। अगर लरिका होइहीं तउ उ पचे तोहरे भाई एर क होइहीं।”

9ओनान जानत रहा कि जोड़ा स पइदा भए लरिकन ओकर नहीं होइहीं। ओनान तामार क संग तने क सम्बंध किहस। मुला उ ओका आपन गरभ धारण करइ नहीं

दिहस। 10एहसे यहोवा कोहाइ गवा। एँह बरे यहोवा ओनान क भी मारि डाएस।

11तब यहूदा आपन पतोहू तामार स कहेस, “आपन बाप क घरे लौटि जा। हुआँइ रहा अउर तब तलक बियाह जिन करा जब तलक मोर लहुरा पूत सेला बाढ़ न जाइ।” यहूदा क डर रहा कि सेला भी आपन भाइयन क तरह मारि डवा जाइ। तामार आपन बाप क घर लौटि गइ।

12पाछे सुआ क बिटिया यहूदा क मेहरारु मरि गइ। यहूदा आपन दुःख क टेम क पाछे अदुल्लाम क आपन मीत हीरा क संग तिम्ना गवा। यहूदा आपन भेड़ी क ऊन कतरइ तिम्ना गवा।

13तामार क इ मालूम भवा कि ओकर ससुर यहूदा आपन भेड़िन क ऊन कतरइ तिम्ना क जात अहइ।

14तामार हमेसा अइसे ओढ़ना पहिरत रही जेहसे मालूम होइ कि इ रौंइ अहइ। एँह बरे उ कछू दूसर ओढ़ना पहिरेस अउ मुँह क पर्दा में ढाँकि लिहस। तब उ तिम्ना सहर क लगे एनैम क जाइवाली सड़क क किनारे बइठि गइ। तामार जानत रही कि यहूदा क लहुरा बेटवा अब बाढ़ि ग अहइ। मुला यहूदा ओसे ओकरे बियाहे क कउनो योजना नहीं बनावत अहइ।

15यहूदा उहइ सड़क स जात्रा किहस। उ ओका लखेस, मुला बिचारेस कि उ पतुरिया अहइ। (ओकरे मुँह पतुरिया क तरह ढका भवा रहा।) 16एँह बरे यहूदा ओकरे लगे गवा अउ बोला, “मोका आपन संग तने क सम्बंध करइ द्या।” (यहूदा नहीं जानत रहा कि उ ओकर पतोहू तामार अहइ।)

तामार बोली, “तू मोका केतना देब्या?”

17यहूदा जवाब दिहस, “मई आपन भेड़ी क झुण्ड स तोहका एक नई बोकरी पठउब।”

उ जवाब दिहस, “मई एका अंगीकार करत अहउँ मुला पहिले तू मोका कछू रखइ क द्या जब तलक तू बोकरी नहीं पठउत्या।”

18यहूदा पूछेस, “मई बोकरी पठउब एकरे सबूत बरे मोसे का लेइ चहुबिउ?”

तामार जवाब दिहस, “मोका तोहार मोहर अउर धागा द्या अउ मोका आपन टहरइ क कुबरी द्या।” यहूदा इ सबइ चीजन ओका दिहस। तब यहूदा अउ तामार तने क सम्बंध, किहन अउ तामार गोड़े स भारी होइ गइ। 19तामार घरे गइ अउ मुँह क ढाँपइ वाला पर्दा क हटाएस। तब उ फुन आपन क रौंइ बतावइ वाला खास ओढ़ना क पहिरेस।

20पाछे यहूदा आपन मीत हीरा क पतुरिया क बोकरी देइ एनैम पठएस जेका उ जबान दिहे रहा। यहूदा हीरा स खास मोहर अउ टहरइ क कुबरी भी ओसे लेइ बरे कहेस। मुला हीरा ओका न पाइ सका।

21हीरा एनैम सहर क कछू लोगन स पूछेस, “सड़क क किनारे जउन पतुरिया रही, उ कहाँ बाटइ?” मनइयन जवाब दिहन, “हिआँ कबहुँ कउनो पतुरिया नहीं रही।”

22तउ यहूदा क मीत यहूदा क लगे लौटि गवा अउ ओसे कहेस, “मई उ मेहरारु क पता नहीं लगाइ सकेउँ। जउन मनइयन उ जगह बसत अहइँ उ पचे मोका बताएन कि हुआँ कबहुँ कउनो पतुरिया नहीं रही।” 23एँह बरे यहूदा कहेस,

जा ... सोआ इस्राएल में इ रिवाज रहा कि जदि कउनो मनई बे सन्ताने क मरि जात रहा तउ उ रौंइ क भाइयन में स कउनो एक ओका बइठाइ लेत रहा। अगर कउनो लरिका पइदा होत रहा तउ उ मेरे मनई क लरिका समझा जात रहा।

“ओका उ सबइ चीजन रखइ दया। मई नार्हीं चाहत कि लोग हम पचन प हँसउआ करई। मई ओका बोकरी देइ चाहेउँ, मुला हम ओकर पता नार्हीं लगाइ सके। इहइ बहोत अहइ।”

तामार लड़कोर होइवाली अहइ

24लगाभग तीन महीना पाछे कउनो यहूदा स कहेस, “तोहार पतोहू तामार एक पतुरिया क नार्ई पाप किहे अहइ अउ अब उ गरभ धारण किहे अहइ।”

तब यहूदा कहेस, “ओका बाहेर निकारा अउ ओका जराइ के मार डवा।”

25ओकर आदमी तामार क मारइ गएन। मुला तामार आपन ससुर क लगे सँदेसा पठएस। तामार कहेस, “जउन मनई मोका गरभधारण कराएस ह उहइ क इ सबइ चीजन अहई। इ सबइ चीजन क लखा। उ सबइ केकर अहई? केकर इ खास मोहर अउ इ धागा अउर इ टहरइ क कुबरी अहइ?”

26यहूदा ओन सबहिं चीजन क पहिचानेस अउ कहेस, “इ ठीक कहत बाटइ। मई गलती किहेउँ। मई आप क बचन क अनुसार आपन बेटवा सेला क एँका नार्हीं दिहेउ” अउ यहूदा ओकरे संग फुन नार्हीं सोवा।

27तामार क लरिका जन्मइ क टेम आवा अउ उ पचे लखेन कि उ जुड़ैधा बच्चन क जन्मी। 28जउन टेम उ जन्मत रही एक लरिका बाहेर हाथ निकारेस। धाई हाथे प लाल धागा बाँधेस अउ कहेस, “इ बच्चा पहिले पइदा भवा।” 29मुला उ बच्चा आपन हाथ वापिस भितरे हींच लिहस। तब दूसर बच्चा पहिले पइदा भवा। तब दाई कहेस, “लखा तू कैसे निकरइ आएस।” एँह बरे उ पचे ओकर नाउँ पेरिस रखेन। 30एँकरे पाछे दूसर बच्चा पइदा भवा। इ उहइ बच्चा रहा जेकरे हाथे प लाल धागा रहा। उ पचे ओकर नाउँ जेरह रखेन।

यूसुफ क मिस्र क पोतीपर क बेच गवा

39 बइपारी लोग जउन यूसुफ क बेसहे रहेन उ ओका मिस्र लइ गएन। उ पचे फिरौन क अंगरच्छक क नायक पोतीपर क हाथ ओका बेच दिहन। 2मुला यहोवा यूसुफ क मदद किहस। यूसुफ एक सफल मनई बन गवा। यूसुफ आपन मिस्र क मालिक पोतीपर क घरे में रहा।

3पोतीपर लखेस कि यहोवा यूसुफ क संग अहइ। पोतीपर इ भी लखेस कि यहोवा जउन कछू करत ह, ओहमा ओका सफल बनवइ में सहायक बाटइ। 4एँह बरे पोतीपर यूसुफ क पाइके बहोत खुस रहा। पोतीपर ओका आपन बरे काम करइ अउ घर क सासन में मदद करइ बरे राखेस। पोतीपर क आपन हर एक चीज क यूसुफ अफसर रहा। 5जब यूसुफ घरे क अफसर बनइ दीन्ह गवा तब यहोवा उ घर अउ पोतीपर क हर एक चीज क असीसेस। यहोवा इ यूसुफ क कारण किहस अउ यहोवा पोतीपर क खेतन में उगइवाली हर चीज क असीसेस। 6एँह बरे पोतीपर घर क हर चीज क जिम्मेदारी यूसुफ क दिहस। पोतीपर कउनो चीज क चिन्ता

नार्हीं करत रहा। उ जउन खइया क खात रहा सिरिफ ओकर ओका फिकिर रही।

यूसुफ पोतीपर क मेहरारु क अस्वीकार करत ह

यूसुफ बहोत सुन्नर अउ रुपवान रहा। 7कुछ टेम पाछे यूसुफ क मालिक क मेहरारु यूसुफ स पिरेम करइ लाग। एक दिन उ ओसे कहेस, “मोरे संग सोआ।”

8मुला यूसुफ मना कइ दिहस। उ कहेस, “मोर मालिक घर क हर चीज बरे मोहे प बिस्वास करत ह। उ हिँओँ क हर चीज क जिम्मेदारी मोका दिहेस ह। 9मोर मालिक आपन घर में मोका लगाभग आपन क बराबर सम्मान दिहेस ह। मुला मोका ओकरी मेहरारु क संग नार्हीं सोवइ चाही। इ गलत अहइ। इ परमेस्सर क खिलाफ पाप अहइ।”

10उ मेहरारु हर दिन यूसुफ स बात करत रही मुला यूसुफ ओकरे संग सोवइ स मना कइ दिहस। 11एक दिन यूसुफ आपन काम करइ घरे में गवा। उ टेम उ घरे में अकेल्ला मनई रहा। 12ओकरे मालिक क मेहरारु ओकर कोट धइ लिहस अउ ओसे कहेस, “आवा अउ मोरे संग सोवा।” मुला यूसुफ घरे स पराइ गवा अउ उ आपन कोट ओकरे हाथे में छोड़ दिहस।

13मेहरारु लखेस कि यूसुफ आपन कोट ओकरे हाथे में छोड़ दिहे अहइ अउ उ जउन कछू भवा ओकरे बारे में झूठ बोलइ क ठान लिहस। उ बाहेर दौड़ी। 14अउर उ घरे क उ मनइयन क गोहराएस। उ कहेस, “लखा, इ हिब्रू दास हम पचन क मजाक करइ हिँओँ आवा रहा। उ भितरे आवा अउ मोरे संग सोवइ क कोसिस किहस। मुला मई जोर स नरियाइ पड़ी। 15मोर नरियाब ओका ससाइ दिहस अउ उ पराइ गवा। मुला उ आपन कोट मोरे लगे छोड़ गवा।” 16एँह बरे उ यूसुफ क मालिक आपन भतारे क घर लौटइ क समइ तलक ओकरे कोट क आपन लगे राखेस। 17अउर उ आपन भतार क कहानी सुनाएस। उ कहेस, “जउन हिब्रू दास क तू हिँओँ लिआया उ मोह प हमला करइ क कोसिस किहस। 18मुला जब उ मोरे लगे आवा तउ मई चिचियाई। उ पराइ गवा, मुला आपन कोट छोड़ गवा।”

यूसुफ कारगार में

19यूसुफ क मालिक जउन ओकरी मेहरारु स कहेस, ओका सुनेस अउ उ बहोत रिसियाइ गवा। 20हुँओँ एक जेल रही जेहमें राजा क दुस्मन रखा जात रहेन। एँह बरे पोतीपर यूसुफ क उहइ जेल में धँध दिहस अउ यूसुफ हुँओँ पड़ रहा। 21मुला यहोवा यूसुफ क संग रहा। यहोवा ओह पइ कृपा करत रहा। 22कछू टेम पाछे जेल क रच्छक क मुखिया यूसुफ स सोनेह करइ लाग। रच्छकन क मुखिया सबहिं कैदियन क अफसर यूसुफ क बनाएस। यूसुफ ओनकइ मुखिया रहा, मुला काम उहइ करत रहा जउन उ पचे करत रहेन। 23रच्छकन क मुखिया जेल क सबहिं चीजन क बरे यूसुफ प पतियात रहा। इ एँह बरे भवा कि यहोवा यूसुफ क संग रहा। यहोवा यूसुफ क, उ जउन कछू करत रहा, सुफल होइ में मदद करत रहा।

यूसुफ दुइ सपना क अरथ बतावत ह

40 पाछे फिरौन क दुइ नउकरन ओकर संग कछू गलत किहेन। इ नउकरन में स एक ठु रोटी पोवइया अउ दूसर दाखरस देइ क सेवा करत रहा। 2 फिरौन आपन रोटी पोवइया अउ सरब देइवाला नउकर पर रिसियाइ गवा। 3 एह बरे फिरौन उहइ जेल में ओनका पठाएस जेहमें यूसुफ रहा। फिरौन क अंगरच्छक लोगन क नायक पोतीपर उ जेल क अफसर रहा। 4 नायक दुइनउँ कैदियन क यूसुफ क देखरेख में राखेस। दुइनउँ कछू टेम तलक जेल में रहेन। 5 एक रात दुइनउँ कैदियन सपना देखेन। दुइनउँ कैदी मिस्र क राजा क रोटी पोवइया अउ दाखरस देइवाला नउकर रहेन। हर एक कैदी क आपन-आपन सपना रहेन अउ हर एक सपना क अलग अलग अरथ रहा। 6 यूसुफ दूसर भिन्सारे ओनकइ लगे गवा। यूसुफ लखेस कि दुइनउँ मनई परेसान रहेन। 7 यूसुफ पूछेस, “आजु तू पचे ऐतना परेसान काहे देखाइ पड़त ह?”

8 दुइनउँ मनई जवाब दिहन, “पिछली रात हम पचे सपना देखा, मुला हम लोग नाहीं बूझत कि सपना क का अरथ अहइ? कउनो मनई अइसा नाहीं अहइ कि जउन सपना क अरथ बतावइ या हम पचन क साफ साफ बतावइ।”

यूसुफ ओनसे कहेस, “सिरिफ परमेस्सर ही अइसा अहइ जउन सपना क बूझत अउ अरथ बतावत ह। एह बरे मई निवेदन करत हउँ कि आपन सपना मोका बतावा।”

दाखरस देइवाला नउकर क सपना

9 एह बरे दाखरस देइवाला नउकर यूसुफ क आपन सपना बताएस। नउकर कहेस, “मई सपना में अंगूरे क लता देखेउँ। 10 उ अंगूरे क लता क तीन ठु डारियन रहिन। मई डारियन में फूल आवत अउ ओनकइ अंगूर बनत लखेउँ। 11 मई फिरौन क पिआला लिए रहेउँ। एह बरे मई अंगूरन क लिहेउँ अउ पिआला में रस निचोड़ेउँ। तब मई पिआला फिरौन क दिहेउँ।”

12 तब यूसुफ कहेस, “मई तोहका सपन क अरथ बताउब। तीन ठु डारियन क अरथ तीन दिन अहइ। 13 तीन दिन बीतइ क पहिले फिरौन तोहका छिमा करी अउ तोहका तोहरे कामे प लौटे प देइ। तू फिरौन क बरे उहइ काम करब्या अउर जउन पहिले करत रह्या। 14 मुला जब तू अजाद होइ जाब्या तउ मोका सुमिर्या। मोर मदद किह्या। फिरौन स मोरे बारे में कह्या जेहसे मई इ जेल स बाहेर होइ सकउँ। 15 मोका हिब्रू लोगन क देस स लावा गवा रहा। मई हियाँ कउनो अपराध भी नाहीं किहेउँ ह। एह बरे मोका जेल में न होइ चाही।”

रोटी पोवइया क सपना

16 रोटी बनावइ वाला लखेस कि दूसर नउकर क सपना अच्छा रहा। एह बरे रोटी पोवइया यूसुफ स कहेस, “मई भी सपना देखेउँ। मई देखेउँ कि मोरे मूँडे प तीन ठु रोटी क टोकरी बाटइ। 17 सब त ऊपर क टोकरी में हर किसिम क पका भवा भोजन रहेन। इ भोजन राजा बरे रहा। मुला खइया क चिरइयन चुगत रहिन।”

18 यूसुफ जवाब दिहस, “मई तोहका बताउब कि सपना क का अरथ अहइ? तीन टोकरी क अरथ तीन दिन बाटइ। 19 तीन दिन बीतइ स पहिले राजा तोहका इ जेलि स बाहेर निकारी। तब राजा तोहार मूँडे काटि डइ। उ तोहरे तने क एक ठु खम्भा स लटकाइ अउ चिरइयन तोहरे तने क खइहीं।”

यूसुफ क भुलाइ दीन्ह गवा

20 तीन दिन पाछे फिरौन क जन्म दिन रहा। फिरौन आपन सबहिं नउकरन क दावत दिहस। दावत क टेम फिरौन दाखरस देइवाला अउ रोट पोवइया नउकरन क जेल स निकसइ दिहस। 21 फिरौन दाखरस देइवाला नउकर क अजाद कइ दिहस। फिरौन ओका नउकरी प लौटाइ दिहस अउ दाखरस देइवाला नउकर फिरौन क हाथे में एक ठु पिआला दिहस। 22 मुला फिरौन रोटी पोवइया क मार डाएस। सब बातन जइसे यूसुफ होइ बरे बताए रहा वइसेन ही भइन। 23 मुला दाखरस देइवाला नउकर क यूसुफ क मदद करब याद नाहीं रहा। उ यूसुफ क बारे में फिरौन स कछू नाहीं कहेस। दाखरस देइवाला नउकर यूसुफ क बारे में बिसरि गवा।

फिरौन क सपना

41 दुइ बरिस बाद फिरौन सपना लखेस। फिरौन सपने में लखेस कि उ नील नदी क किनारे खड़ा अहइ। 2 तब फिरौन सपने में नदी स सात गइयन क बाहेर आवत लखेस। गइयन मोटी अउ सुन्नर रहिन। गइयन हुआँ खड़ी रहिन अउ घासे प चरत रहिन। 3 तब सात दूसर गइयन नदी स बाहेर आइन, अउर नदी क किनारे मोटी गइयन क निचके ठाइ होइ गइन। मुला इ गइयन दूबर अउ देखन में बीमार लगत रहिन। 4 इ सातउ दूबर अउर बीमार गइयन, सुन्नर मोटी सात गइयन क खाइ गइन। तब फिरौन जाग उठा।

5 फिरौन फुन सोवा अउ दूसर दाई सपना लखेस। उ सपने में अनाज क सात बाल एक ही पउधा प लखेस। अनाजे क बालन मोटी अउ अच्छी रहिन। 6 तब उ उहइ अनाज क पाछे सात अनाजे क बालन क जमी लखेस। अनाजे क इ बालन पातर अउ गरम हवा स नस्त होइ गइ रहिन। 7 तबबइ सात पातर बालन सात ठु मोटवार अउ बढ़िया बालन क खाइ लिहन। फिरौन पुन जागि उठा अउ उ समझेस कि इ सिरिफ सपना ही बाटइ। 8 दूसर भिन्सारे फिरौन इ सपनन क बारे में परेसान रहा। एह बरे उ मिस्र क सबहिं जादूगर लोग अउ सबहिं गुनी लोगन क बोलाएस। फिरौन ओनका सपना बताएस। मुला ओन लोगन में स कउनो भी सपना क साफ या ओकर अरथ न बताइ सका।

नउकर फिरौन क यूसुफ क बारे में बतावत ह

9 तब दाखरस देइवाला नउकर क यूसुफ याद आवा। नउकर फिरौन स कहेस, “मोरे संग जउन कछू भवा रहा उ मोका याद आवत अहइ। 10 आप मोह प अउ रोटी पोवइया प कोहान रहेन अउ आप हम दुइनउँ क जेलि में धँध दिहे

रहेन। 11जेल में एक ही रात हम दुइनउँ सपना देखेन। हर एक सपना अलग अरथ रखत रहा। 12एक ठु हिलू नउजवान हम पचन क संग जेल में रहा। उ अंगरच्छकन क नायक क नउकर रहा। हम पचन आपन आपन सपना ओका बतावा, अउ उ सपना क अरथ हम लोगन क बुझाएस। उ हर सपना क अरथ हम पचन क समझाएस। 13जउन अरथ उ बताएस उ सबइ ठीक निकरेन। उ बताएस कि मई अजाद होब अउ आपन काम में वापस लउट आउब। अउर इहइ भवा उ कहेस कि रोटी पोवइया क मार कइ टॉंग दीन्हा जाइहीं। अउ उहइ भवा।”

यूसुफ सपन क अरथ बतावइ बरे बोलावा गवा

14एँह बरे फिरौन यूसुफ क जेल स बोलाएस। रच्छक हाली स यूसुफ क जेल स बाहेर लिआएन। यूसुफ हजामत बनावइके अउर कपड़े बदल के फिरौन क समन्वा खड़ा भवा। 15तब फिरौन यूसुफ स कहेस, “मई एक सपना लखेउँ ह। मुला कउनो अइसा नाहीं अहइ जउन सपना क अरथ मोका समझा सकइ। मई सुनेउँ ह कि जब कउनो सपना क बारे में तोहसे कहत ह कि तब तू सपन क अरथ अउ ओनका फरियाइ सकत ह।”

16यूसुफ जवाब दिहस, “मोर आपन बुद्धि नाहीं अहइ कि मई सपनन क बूझ सकउँ। सिरिफ परमेस्सर ही अहइ जउन अइसी सक्ती रखत ह अउर फिरौन बरे परमेस्सर ही इ करी।”

17तब फिरौन कहेस, “अपने आप क, मई नील नदी क किनारे ठाड़ लखेउँ। 18मई सात गइयन क नदी स बाहर आवत लखेउँ अउ घास चरत देखेउँ। इ गइयन मोटी अउ सुन्नर रहिन। 19तब मई दूसर सात गइयन क नदी स बाहेर आवत देखेउँ। इ सबइ गइयन पातर अउ भद्दी रहिन। मई मिस्त्र देस में जेतनी गइयन देखेउँ ह ओनमों स उ सबइ सब स जियादा बुरी रहिन। 20अउ एँ भद्दी अउर पातर गइयन पहिली सुन्नर सात गइयन क खाइ डिएन। 21मुला सातउ गइयन क खाए क पाछे भी उ पचे पातर अउ भद्दी रहिन। तू ओनका लखा तउ नाहीं जान सकृत्या कि उ पचे दूसर सात गइयन क खाया ह। उ पचे ओतनी ही भद्दी अउ पातर देखाइ पड़त रहिन जेतना सुरु में रहिन। तब मई जाग गवा।

22“तब मई आपन दूसर सपना में अनाज क सात बालन एक ही पउथा प उगी भइ देखेउँ। इ सबइ अनाज क बालन अच्छी अउ दानन स भरी भइ रहिन। 23तब ओनके पाछे सात दूसर बालन उगिन। मुला इ सबइ सात बालन पातर, भद्दी अउ गरम हवा स नस्ट भइ रहिन। 24तब सात पातर बालन सात अच्छी बालन क खाइ डिएन।

“मई इ सपना क आपन जादूगर लोगन क बताएउँ मुला कउनो सपने क अरथ मोका नाहीं समझाएस। एकर अरथ का अहइ?”

यूसुफ सपना क अरथ बतावत ह

25तब यूसुफ फिरौन स कहेस, “इ दुइनउँ सपना एक ही अरथ रखत हीं। परमेस्सर तोहका बतावत ह कि उ हाली

का करइ क जात अहइ। 26सात अच्छी गइयन अउ सात अच्छी अनाजे क बालन सात बरिस अहइ-दुइनउँ सपना एक ही अहइ। 27सात दूबर अउ भद्दी गइयन अउ सात बुरी अनाजे क बालन देस में भुखमरी क सात बरिस अहइ। इ सबइ सात बरिस, बढ़िया सात बरिस क पाछे अइहीं। 28परमेस्सर आप क इ देखाइ दिहस ह कि हाली ही का होइवाला अहइ। इ वइसा ही होइ जइसा मई कहेउँ ह। 29आप क सात बरिस मिस्त्र में अच्छी पइदावार अउ भोजन इफरात होइहीं। 30मुला इ सात बरिस क पाछे पूरे देस में भुखमरी क सात बरिस अइहीं। जउन समूचइ मिस्त्र में पइदा भ अहइ ओका लोग बिसरि जइहीं। इ अकाल देस क बर्बाद कइ देइ। 31काहेकि अकाल एँतना भयानक होइ कि लोग प्रयाप्त खइया खाइ का होत ह इ बिसरि जाइहीं।

32“हे फिरौन, आपन एक ही बारे में दुइ सपना लखे रहेन। इ इ बात क देखावइ बरे भवा कि परमेस्सर फुरइ ही अइसा होइ देइ अउर इ बताएस ह कि परमेस्सर एँका हाली ही होइ देइ। 33एँह बरे हे फिरौन आप एक अइसा मनई चुनइ जउन बहोत चुस्त अउ बुद्धिमान होइ। आप ओका मिस्त्र देस क निगराँकार बनावइ। 34तब आपन दूसर मनई क जनता स भोजन बटोरइ बरे चुनइ। लोगन क सात अच्छे बरिस में जेतना अनाज पइदा करइ, ओकर पाँचवाँ हींसा ओनका देइ चाही। 35ओनका हुकुम देइ कि जउन अच्छे बरिस आवइ ओहमों भोजन बटोरइ। उ सहरन में भोजन क जमा करइ। तब उ पचे भोजन क रच्छा उ टेम तलक करिहीं जब ओनकइ जरूरत होइ। 36उ भोजन मिस्त्र देस में आवइवाली भुखमरी क सात बरिस में मदद करी। तब मिस्त्र में सात बरिस में लोग भोजन क कमी स मरिहीं नाहीं।”

37फिरौन क इ नीक बिचार मालूम भवा। एहसे सबहिं अफसर राजी रहेन। 38फिरौन आपन अफसरन स पूछेस, “का तू लोगन में स कउनो इ काम क करइ बरे यूसुफ स अच्छा मनई हेरि सकत ह? परमेस्सर क आतिमा इ मनई क फुरइ बुद्धिमान बनाइ दिहस ह।” 39फिरौन यूसुफ स कहेस, “परमेस्सर इ सबहिं चीजन क तोहका देखोएस ह। एँह बरे तू ही सबन त जियादा बुद्धिमान अहा। 40एँह बरे मई तोहका आपन महल क निगराँ अधिकारी बनउब। जनता तोहरे हुकुम क मानी। सिरिफ मई राजा ही तोहसे बड़वार रहब।”

41एक खास जलसा अउ नुमाइस रही जेहमों फिरौन यूसुफ क नवाब बनाएस। तब फिरौन यूसुफ स कहेस, “मई अब तोहका पूरे देस क राजा बनावत अहउँ।” 42तब फिरौन आपन सरकारी मोहरवाली अंगूठी यूसुफ क दिहस अउ यूसुफ क एक सुन्नर रेशमी ओढ़ना पहिरइ क दिहस। फिरौन यूसुफ क गले में एक ठु सोना क हार डिएस। 43फिरौन दूसर रथे प यूसुफ क सवार होइ क कहेस। ओकरे रथे क अगवा खास रच्छक चलत रहेन। उ पचे लोगन स कहत रहेन, “हे मनइयो, यूसुफ क निहुरिके पैलगी करा।”

इ तरह यूसुफ पूरे मिस्त्र क राजपाल बना। 44फिरौन ओसे कहेस, “मई सम्राट फिरौन अहउँ। एँह बरे मई जउन करइ चाहब, करब। मुला मिस्त्र में कउनो दूसर मनई हाथ गोड़ नाहीं हिलाइ सकत ह जब तलक तू ओसे न कहा।”

45 फिरौन ओका दूसर नाउँ सपन तपानेह दिहस। फिरौन आसनत नाउँ क मेहरारु जउन ओन क पुजारी पोती पर क बिटिया रही, यूसुफ क मेहरारु क रुप में दिहस। इ तरह यूसुफ समूचइ मिस्त्र देस क राजपाल होइ गवा।

46 यूसुफ उ टेम तीस बरिस क रहा जब उ मिस्त्र क सम्राट क सेवा करइ लाग। यूसुफ पूरा मिस्त्र देस में जात्रा किहस। 47 अच्छे सात बरिसन में देसे में पड़वावर बहोतइ डेर क भइ 48 अउर यूसुफ मिस्त्र में सात बरिस खइया क चीजन क बचाएस। यूसुफ खइया क सहरन में बटोरेस। यूसुफ सहर क चारिहुँ कइँती क खेतन में पड़वा भवा अनाजे क हर सहर में बटोरेस। 49 यूसुफ बहोत अनाज बटोरेस। इ समुदर क बालू क नाई रहा। उ एँतना अनाज बटोरेस कि ओकर वजन क भी न कूत कीन्ह जाइ सकइ।

50 यूसुफ क मेहरारु आसनत ओन क याजक पोतीपरा क बिटिया रही। भुखमरी क पहिले बरिस क आवइ स पहिले यूसुफ अउ आसनत क दुइ पूत भएन। 51 पहिले पूत क नाउँ मनस्से धरा गवा। यूसुफ ओकर इ नाउँ रखेस काहेकि उ बताएस, “मोका जेतना सारे कस्ट भएन अउ घरे क हर बात परमेस्सर मोसे बिसराइ दिहस।” 52 यूसुफ दूसर पूत क नाउँ एप्रैम रखेस। यूसुफ ओकर नाउँ इ रखेस काहेकि उ बताएस, “मोका बहोतइ दुःख मिला, मुला परमेस्सर मोका हर एक चीज में सफलता दिहेस।”

भुखमरी क समइ सुरु होत ह

53 सात बरिस तलक लोगन क लगे खाइ बरे उ सब कछू भोजन रहा जेनकइ ओनका जरूरत रही अउर जउन चिजियन ओनका जरूरी रहिन उ सबइ सबहिं जमत रहिन। 54 मुला सात बरिस बाद भुखमरी क दिन सुरु भएन। इ ठीक वइसा ही भवा जइसा यूसुफ कहे रहा। उ पहाँटा क कउनो भी देस में अन्न पड़वा न भवा। मनइयन क लगे खाइ क कछू न रहा। मुला मिस्त्र में खाइ बरे इफरात रहा, काहेकि यूसुफ अनाज बटोरे रहा। 55 भुखमरी क टेम सुरु भवा अउ मनइयन भोजन बरे फिरौन क समन्वा रोवइ लागेन। फिरौन मिस्त्र क मनइयन स कहेस, “यूसुफ स पूछा। उहइ करा जउन उ कहइ क कहत ह।”

56 एँह बरे जब देस में सब ठउरे प भुखमरी रही, यूसुफ अनाजे क गोदाम स मनइयन क अन्न बाँटेस। यूसुफ बटोरा भवा अन्न क मिस्त्र क लोगन क बेचेस। मिस्त्र में बहोत भयंकर अकाल रहा। 57 मिस्त्र क चारिहुँ कइँती क देसन क लोग अनाज बेसहइ मिस्त्र आएन। उ पचे यूसुफ क लगे आएन काहेकि हुआँ संसार क उ हीसा में सब ठउरे प भुखमरी रही।

सपना फुरइ भवा

42 इ समइ याकूब क प्रदेस में भुखमरी रही। मुला याकूब क इ पता लाग कि मिस्त्र में अनाज अहइ। एँह बरे याकूब आपन बेटवन स कहेस, “हम लोग हिआँ हाथ प हाथ धरे काहे बइठा अहइ? 2 मइँ सुनेउँ ह कि मिस्त्र में खरीदइ क अनाज बाटइ। एँह बरे हम पचे हुआँ

चली अउ हुआँ स आपन खाइ क बरे अनाज बेसही, तब हम लोग जिअत रहव, मरब नाहीं।”

एँह बरे यूसुफ क भाइयन में स दस अन्न खरीदइ बरे मिस्त्र गएन। 4 याकूब बिन्यामीन क नाहीं पठएस। (बिन्यामीन यूसुफ क एक ही सगा भाई रहा।) याकूब एह बरे डरा भवा रहा कि बिन्यामीन पइ कउनो तरह क खतरा आवइ सकत ह।

5 कनान में भुखमरी क समइ बहोत खौफनाक रहा। एँह बरे कनान क बहोत स लोग अन्न बेसहइ मिस्त्र गएन। ओनहीं लोगन क संग में इस्त्राएल क पूतन भी रहेन।

6 इ टेम यूसुफ मिस्त्र क राजपाल रहा। सिरिफ यूसुफ ही रहा जउन मिस्त्र आवइ वालन लोगन क अन्न बेचइ क हुकुम देत रहा। यूसुफ क भाई ओकरे लगे आएन अउ उ पचे ओकर निहुरिके पैलगी किहेन। 7 यूसुफ आपन भाइयन क लखेस अउ उ ओनका पहिचान लिहेस कि उ पचे कौन अहइँ। मुला यूसुफ ओनसे इ तरह बात करत रहा जइसे उ ओनका पहिचानत नाहीं। उ ओनके संग कड़ाई स बात किहस। उ कहेस, “तू लोग कहीं स आया ह?”

भाइयन जवाब दिहन, “हम कनान देस स आए अहइँ। हम पचे अनाज बेसहइ आवा अहीं।”

8 यूसुफ ने पहिचान लिहेस कि उ पचे ओकर भाई अहइँ। मुला उ पचे नाहीं जानत रहेन कि उ कउन अहइ? 9 यूसुफ ओन सपनन क याद किहेस जेनका उ आपन भाइयन क बारे में लखे रहा।

यूसुफ आपन भाइयन क जासूस कहत ह

यूसुफ आपन भाइयन स कहेस, “तू पचे अनाज बेसहइ नाहीं आया ह। तू लोग जासूस अहा। तू लोग इ पता लगावइ आया ह कि हम कहीं कमजोर अहीं?”

10 मुला भाइयन ओसे कहेन, “नाहीं। महोदय! हम तउ आपक सेवक क रुप में आइ अहीं। हम पचे सिरिफ अनाज बेसहइ आइ अहीं। 11 हम सबहिं लोग भाई अहीं, हम पचन क एक ही पिता अहइ। हम लोग ईमानदार अहीं। हम लोग सिरिफ अनाज बेसहइ आइ अहीं।”

12 तब यूसुफ ओनसे कहेस, “नाहीं! तू लोग इ पता लगावइ आया ह कि हम पचे कहीं कमजोर अहीं?”

13 भाइयन कहेन, “नाहीं! हम सबहिं भाई भाई अहीं। हमरे परिवारे में बारह भाई अहइँ। हम सब क एक ही पिता अहइ। हम लोगन क सब स लहुरा भाई अबहुँ भी हमरे पिता क संग घरे प बाटइ अउ दूसर भाई बहोत समइ पहिले मरि गवा। हम लोग आप क समन्वा सेवक क नाई अहीं। हम लोग कनान देस क अहीं।”

14 मुला यूसुफ कहेस, “नाहीं! मोका पता अहइ कि मइँ ठीक अहउँ। तू भेदिया अहा। 15 मुला मइँ तू लोगन क इ साबित करइ क मौका देब कि तू लोग फुरइ कहत बाट्या। तू लोग इ जगह तब तलक नाहीं तजि सकत्या जब तलक तू पचन क लहुरा भाई हिआँ नाहीं आवत। 16 एँह बरे तू लोगन में स एक ठु लउटइ अउ आपन लहुरे भाई क हिआँ लइ आवइ। उ समइ तलक दूसर हिआँ कैद में रइहीं। हम देखब कि का तू लोग फुरइ बोलत अहा। मुला मोका

बिस्सास अहइ कि तू पचे जासूस अहा। 17तब यूसुफ ओन सब क तीन दिना बरे जेल में नाई दिहस।

सिमोन बन्धक क रुप में रखा गवा

18तीन दिन बाद यूसुफ ओनसे कहेस, “मई परमेस्सर क भय मानत हउँ। एह बरे मई तू लोगन क इ सिद्ध करइ क एक मौका देब कि तू लोग फुरइ बोलत अहा। तू लोग इ काम करा अउर मई तू लोगन क जिअइ देब। 19अगर तू लोग ईमानदार मनई अहा तउ आपन भाइयन में स एक क जेल में रहइ द्या। दूसर भाइयन जाइ सकत हीं अउ आपन लोगन बरे अनाज लइ जाइ सकत हीं। 20तब यदि तू आपन सब स लहुरा भाई क लइके हिआँ मोरे लगे आवा। इ तरह मई पतियाब कि तू लोग फुरइ बोलत अहा।”

भाइयन इ बात क मान लिहन। 21उ पचे आपुस में बतियानेन “हम पचन क सजा दीन्ह गइ ह। काहेकि हम पचे आपन सब स लहुरा भाई क संग बुरा किहे अही। हम पचे ओकरे मुसीबत क निहारा जेहमें उ रहा। उ आपन रच्छा बरे हम पचन स बिनती किहस। मुला हम सबइ ओकर एकहु न सुना। एह बरे हम पचे दुःखन में अही।”

22तब रूबेन ओनसे कहेस, “मई तोहसे कहेउँ रहा कि उ लरिका क कछू भी बुरा जिन करा। मुला तू पचे मोरउ एक न सुन्या। एह बरे अब हम ओकरी मउत बरे सजा पावत अही।”

23यूसुफ आपन भाइयन स बात करइ एक तु दु भासिया स काम लेत रहा। एह बरे भाइयन नहीं जान पाया कि यूसुफ ओनकइ भाखा जानत बाटइ। मुला उ पचे जउन कछू कहत रहेन ओका यूसुफ सुनत अउ समझत रहा। 24ओनकइ बातन स यूसुफ बहोत दुःखी भवा। एह बरे यूसुफ ओनसे अलग हटि गवा अउ रोइ पड़ा। तनिक देर में यूसुफ ओनके लगे लउटा। यूसुफ उ भाइयन में स सिमोन क धरेस अउ ओका बाँधिस जब कि दूसर भाई लखत रहेन। 25यूसुफ कछू सेवकन क ओनकइ बोरा में अनाज भरइ क कहेस। भाइयन इ अनाजे क दाम यूसुफ क दिहन। मुला यूसुफ उ धने क नाहीं लेइ क फइसला किहस। उ उ धने क ओनकई अनाज क बोरा में धरइ बरे सेवकन क हुकम दिहस। तब यूसुफ ओनका उ सबइ चीजन क दिहस, जेनकइ जरुरत ओनकइ घरे तलक लउटाइ वाली जात्रा में होइ सकत रही।

26एह बरे भाइयन अनाजे क आपन गदहन प लादेन अउ हुआँ स निकारि पड़ेन। 27उ सबइ सबहिं भाइयन राति क ठहरेन अउ भाइयन में स एक कछू अनाजे बरे आपन बोरा खोलेस अउ उ आपन धन बोरा में पाएस। 28उ दूसर भाइयन स कहेस, “लखा, जउन दाम मई अनाजे बरे चुकाएउँ ह, उ हिआँ अहइ। कउनो मोरे बोरा में इ धन लौटाइ दिहे अहइ।” उ सबइ सबहिं भाई बहोत जियादा डेराइ गएन। उ पचे आपुस में बतियानेन, “परमेस्सर हम पचन क संग का करत अहइ?”

भाइयन याकूब क सूचना दिहेन

29उ सबइ भाई कनान देस में आपन पिता याकूब क लगे गएन। उ पचे जउन कछू भवा आपन पिता क बताएन। 30उ

पचे कहेन, “उ देस क राजपाल हम लोगन स बहोत रुखा होइके बोला। उ सोचेस कि हम पचे जासूस अही। 31मुला हम लोग कहेन कि हम पचे ईमानदार अही। अउर हम पचे जासूस नाहीं अही। 32हम पचे ओका बतावा कि हम लोग बारह भाई अही। अउर हम लोगन क सब स लहुरा भाई अब भी कनान देस में हमार बाप क संग बाटइ। अउर हमार दूसर भाई मरि गवा ह।”

33“तब देस क राजपाल हम लोगन स इ कहेस, ‘इहइ सिद्ध करइ बरे कि तू ईमानदार अहा इ रस्ता अहइ: आपन भाइयन में स एक क हमरे लगे हिआँ छोड़ि द्या। आपन अनाज लइके आपन आपन परिवारन क लगे लउटि जा। 34आपन सब स लहुरा भाइ क हमरे लगे लिआवा। तब मई समझब कि तू लोग ईमानदार अहा या तू लोग जासूस अहा। जदि तू पचे फुरइ बोलत अहा तउ मई तोहरे भाई क तोहका दइ देब। अउर तू लोग हमार देस स अनाज खरीदइ बरे आज्ञा होइ जाब्या।”

35तब सब भाई आपन बोरा स अनाज लेइ गएन अउ हर एक भाई आपन धने क थइली आपन अनाजे क बोरा में पाएस। भाइयन अउर ओनकइ पिता धन क लखेन, अउर उ सबइ बहोत डरि गएन।

36याकूब ओनसे कहेस, “का तू लोग चाहत ह कि मई आपन सबहिं पूतन स हथवा धोइ बइठउँ। यूसुफ मरि गवा, सिमोन भी चलि गवा अउ तू लोग बिन्यामीन क भी मोसे दूरि लइ जावा चाहत ह।”

37तब रूबेन आपन पिता स कहेस, “पिता जी आप मोरे दुइनउँ पूतन क मारि डया जदि मई बिन्यामीन क आप क लगे न लउटावउँ। मोहे प बिस्सास करा। मई आप क लगे बिन्यामीन क लउटाइ लिआउब।”

38मुला याकूब कहेस, “मई बिन्यामीन क तू लोगन क संग नाहीं जाइ देब। ओकर भाई अउर महतारी मरि गवा अहइ अउर मोर मेहरारु राहेल क उहइ अकेल्ला पूत बचा बाटइ। मिस्त्र तक क जात्रा में जदि ओकरे संग कछू भवा तउ उ होनी मोका मारि डाइ। तू लोग मोका एक दुःख स भवा अउ बूढा मनाई क कब्र में पठउब्या।”

याकूब बिन्यामीन क मिस्त्र जाइ क आग्या दिहस

43 उ देस में अकाल बहोत भयंकर रहा। 2मनइयन उ सारा अन्न खाइ गएन जउन उ पचे उ सबइ मिस्त्र स लिआइ रहेन। जब अनाज खतम होइ गवा, याकूब आपन बेटवन स कहेस, “फुन मिस्त्र जा। हम लोगन क खाइ बरे कछू अउर अनाज बेसहा।”

3मुला यहूदा याकूब स कहेस, “उ देस क राजा हम लोगन क चिताउनी दिहस ह। उ कहेस ह, ‘जदि तू लोग आपन भाई क मोरे लगे वापिस नाहीं लउब्या तउ मई तू लोगन स बात करइ स मना भी कइ देब।’ 4जदि तू हम लोगन क संग बिन्यामीन क पठउब्या तउ हम पचे जाब अउ अनाज खरीदब। 5अन्यथा, हम लोग नाहीं जाब। उ मनई चिताउनी दिहस कि हम लोग बिन्यामीन के बिना वापिस न आइ।”

6इस्राएल कहेस, “तू लोग उ मनई स काहे कह्या, कि तोहार दूसर भाई भी अहइ। तू पचे मोरे संग अइसी बुरी बात काहे किह्या?”

7भाइयन जवाब दिहन, “उ राजपाल हुसियारी स हम पचन स प्रस्न पूछेस। उ हम लोगन अउ हम लोगन क परिवार क बारे में जानइ चाहत रहा। उ हम लोगन स पूछेस, ‘का तू पचन क पिता अबहिं जिअत अहइ? का तू लोगन क दूसर भाई घरे प बाटइ?’ हम लोग सिरिफ ओकरे प्रस्न क जवाब दीन्ह। हम लोग नहीं जानत रहे कि उ हमरे दूसर भाई क आपन लगे लइ आवइ क कही।”

8तब यहूदा आपन पिता इस्राएल स कहेस, “बिन्यामीन क मोरे संग पठवा। मई ओकर देखभाल करब। हम पचे मिस्त्र जरूर जाब अउ भोजन लिआउब। अगर हम पचे नहीं जाई तउ हम सबहीं लोग आपन गदेलन क संग मरि जाबइ। 9मई बिस्सास दियावत अहउँ कि उ सुरच्छित रही। मई एकर जिम्मेदार रहब। जदि मई ओका तोहरे लगे लउटाइके न लिआवउँ तउ तू सदा बरे मोका दोखी ठहराइ सकत ह। 10जदि तू हमका पहिले जाइ दिहे होत्या तउ भोजन बरे हम लोग दुइ जात्रा अबहिं तलक कर चुके होतेन।”

11तब ओनके पिता इस्राएल कहेस, “अगर इ फुरइ सही अहइ तउ बिन्यामीन क आपन संग लइ जा। मुला राजपाल बरे कछू भेंट लइ जा। ओन चीजन में स कछू लइ जा जउन हम पचे आपन देस में बटोरि सका अही। ओकरे बरे कछू सहद, पिस्ता, बादाम, गोदं अउ लोहबान लइ जा। 12इ टेम, पहिले स दुई गुना धन भी लइ ल्या उ धन क भी लइ ल्या जउन पिछली दाई दिहे क पाछे लउटाइ दीन्ह गवा रहा। होइ सकत ह कि राजपाल स गलती भइ ह। 13बिन्यामीन क संग ल्या अउ उ मनई क लगे लइ जा। 14मई पराथना करत हउँ कि सर्वसक्तिमान परमेस्सर तू पचन क उ टेम मदद करी जब तू उ राजपाल क समन्वा ठाइ होब्या। मई इ पराथना भी करत हउँ कि उ बिन्यामीन अउ सिमोन क भी सुरच्छित आवइ देइ। अगर नहीं तउ मई आपन पूतन स वंचित होइ जाब।”

15एँह बरे भाइयन राजा क देइ बरे भेंट लिहन अउ उ पचे जेतना धन पहिले लिहे रहेन ओकर दुइ गुना आपन साथ लिहन। बिन्यामीन भाइयन क संग मिस्त्र गवा।

भाइयन क यूसुफ क घर निमंत्रण मिलत ह

16मिस्त्र में यूसुफ ओनके संग बिन्यामीन क लखेस। यूसुफ आपन सेवक स कहेस: “ओन मनइयन क मोरे घरे लिआवा। एक ठु जनावर मारा अउ पकावा। उ सबइ मनई क आजु दुपहरिया मोरे संग भोजन करइ द्या।” 17नउकर क जइसा कहा गवा रहा वइसा किहस। उ ओन मनइयन क यूसुफ क घर लइ गवा।

18भाई लोग ससान रहेन जब उ सबइ यूसुफ क घर गएन। उ पचे कहेन, “हम पचे हिआँ उ धन बरे लिआवा ग अही जउन पिछली दाई हम लोगन क बोस में रखि दीन्ह ग रहा। उ पचे एँका हम लोगन क बिरुद्ध प्रयोग करिहीं। तब उ पचे हम पचन क गदहन क लइ लेइहीं अउ हम लोगन क गुलाम बनइहीं।”

19एँह बरे यूसुफ क घरे क देख रेख करइवाला नउकर क लगे सबहिं भाई गएन। 20उ पचे कहेन, “महोदय हम सपथ लइके कहत हउँ कि पिछली दाई हम लोग हिआँ भोजन खरीदइ बरे आए रहेन। 21-22घर लउटत समइ हम पचे आपन बोस क खाली कीन्ह अउ हर एक बोरा में आपन धन पावा। हम पचे नहीं जानत रहेन कि ओनमें धन कइसे पहोंचा। मुला हम उ धन आप क लउटावइ बरे साथ लाए अहइँ अउ इ समइ हम लोग जउन अनाज बेसहइ चाहित ह ओकरे बरे धन लाए अही।”

23नउकर जवाब दिहस, “डेराअ जिन, मोहे प पतिआ। तोहरे पिता क परमेस्सर तू लोगन क धन क तोहरे बोरवन में भेंट क रुप में धरे होइ। मोका सुमिरन अहइ कि तू लोगन पिछली दाई अनाज क दाम मोका दइ दिहे रह्या।”

तब नउकर सिमोन क जेल स बाहरे लिआवा। 24नउकर ओन लोगन क यूसुफ क घरे लइ गवा। उ ओनका पानी दिहस अउ उ पचे आपन गोइ पखारेन। उ ओनके गदहन क खाइ बरे चारा दिहस।

25भाइयन सुनेन कि यूसुफ क संग खइया क खइहीं। एँह बरे ओकर भाई आपन भेंट तइयार करइ में उ पचे दुपहर तलक लगा रहेन।

26यूसुफ आपन घर गवा अउ भाइयन ओका भेंट दिहन जउन उ पचे आपन संग लइ आए रहेन। तब उ पचे धरती प निहुरिके पैलगी किहन।

27यूसुफ ओनकइ कुसल पूछेस। यूसुफ कहेस, “तू पचन क बुढ़वा पिता जेकरे बारे में तू लोगन क बताया, ठीक तउ अहइ? का उ अब तलक जिअत अहइ?”

28भाइयन जवाब दिहेन, “हम पचन क बाप नीक अहइँ। उ सबइ अब तलक जिअत अहइँ” अउर उ पचे फुन यूसुफ क समन्वा निहुरेन।

यूसुफ आपन भाई बिन्यामीन स मिलत ह

29तब यूसुफ आपन भाई बिन्यामीन क लखेस। (बिन्यामीन अउ यूसुफ क एक ही महतारी रहिन।) यूसुफ कहेस, “का इ तू लोगन क सब स लहुरा भाई अहइ जेकरे बारे में तू बताए रह्या?” तब यूसुफ बिन्यामीन स कहेस, “परमेस्सर तोह प कृपालु होइ।”

30तब यूसुफ कमरा स बाहरे दौड़ि गवा। आपन भाइ बिन्यामीन क सहानुभूति में बेकाबू होइ गवा रहेन। एँह बरे उ रोवइ वास्ते गुप्त ठउर खोजेस। उ आपन कमरा में गवा अउर हुवाँ रोवा। 31तब यूसुफ आपन मुँह धोएस अउ बाहरे आवा। उ आपन आप पइ काबू रखेस अउर कहेस, “अब खइया क खाइके टेम बाटइ।”

32यूसुफ अकेले एक ठु मेज प खइया खाएस। ओकर भाइयन दूसर मेज प एक साथ भोजन किहन। मिस्त्र क लोगन दूसर मेज प एक संग खाएन। ओनकइ बिस्सास रहा कि ओनके बरे इ ठीक नहीं कि उ पचे हिब्रू लोगन क संग खाईं। 33अब उ पचनक यूसुफ क समन्वा मेज पइ पहलोठा स लइ क सबन त छोटा क तरतीब में बइठा गवा रहेन। एँह बरे सबइ भाइयन अचरज करत भए रहेन। 34नउकर लोग यूसुफ क मेज प ओनका भोजन लइ जात

रहेन। मुला अउरन स अपेच्छा नउकर लोग बिन्यामीन क पाँच गुना बेसी दिहन। यूसुफ क संग उ सबहिं भाई तब तलक खात रहेन अउ दाखरस पिअत रहेन जब तलक उ पचे नसा में मस्त नाहीं होइ गएन।

यूसुफ जाल बिखवत ह

44 तब यूसुफ आपन नउकरन क जउन कि घर क निगारौंकार रहेन। हुकुम दिहेस। यूसुफ कहेस, “ओन मनइयन क बोरियन में ऐतना अनाज भरि द्या जेतना उ पचे लइ जाइ सकई। तउ हर एक मनइयन क पैसा ओकरे बोरामें उपर रख द्या। 2 मुला सब स लहुरा भाई क बोरामें उपर ओकरे आनाज क पैसा क संग मोर चाँदी क पियाला भी रख द्या।” नउकर यूसुफ क हुकुम पूरा किहस।

3 दूसरे दिन भिनसारे सब भाई लोग आपन गदहन क संग अपने देस क वापिस पठइ दीन्ह गएन। 4 जब उ पचे सहर बाहर कछू ही दूर गए रहेन तउ यूसुफ आपन नउकर क हुकुम दिहेस, “जा अउर ओन लोगन क पाछा करा। ओनका रोका अउ ओनसे कहा, ‘हम लोग आपन लोगन बरे नीक रह्या! मुला आप सबन हम लोगन बरे बुरा काहे रहे? 5 हमार मालिक यूसुफ इहइ पियाला स पिअत हीं। उ पचे राज क बात जानइ बरे इहइ पियाला क प्रयोग करत ह। इ पियाला क चोराइके आप लोगन काहे अपराध किहेन?’”

6 एह बरे नउकर हुकुम क मानेस। उ सवार होइ के भाइयन तलक गवा अउ ओनका रोकेस। नउकर ओनसे उ ही बातन किहेस जउन यूसुफ ओनसे कहइ बरे कहे रहा।

7 मुला भाइयन नउकर स कहेन, “राजपाल अइसी बातन काहे कहत हीं? हम पचे अइसा अपराध कबँहू नाहीं करब! 8 लखा हम पचे उ पैसा कनान देस लउटाइके लाए रहेन जउन पहिले हम लोगन क आपन बोरन में मिला रहा। एह बरे हम लोगन तोहार मालिक क घरे स चाँदी या सोना नाहीं चोरावइ चाही? 9 जदि आपन कउनो बोरामें चाँदी क उ पियाला पाइ जाई तउ उ मनई क मारि दीन्ह जाइ। तू ओका मार सकत ह अउर हम लोग तोहार नउकर होब।”

10 नउकर कहेस, “जइसा तू कहत ह हम वइसा ही करब, मुला मई उ मनई क मारब नाहीं। जदि मोका चाँदी क पियाला मिली तउ उ मनई मोर नउकर होइ। दूसर भाई लोग जाइ बरे अजाद होइहीं।”

जाल बिखवा गवा, बिन्यामीन धरा गवा

11 तब सब भाई आपन आपन बोरामें हाली हाली भुइयों प खोलें। 12 नउकर बोरन में लखब सुरु किहेस। उ सब स जेठ भाई स सुरु किहस अउ सब स लहुरा भाई प खतम किहस। उ बिन्यामीन क बोरामें पियाला पाएस। 13 सबइ भाई लोग बहोत दुःखी भएन। एह बरे उ पचे आपन ओढ़ना फारि डापन। तउ आपन आपन गदहन पइ बोरन क लादेन अउर सहर क लउट पडेन।

14 यहूदा अउ ओकर भाई यूसुफ क घर लौटि गएन। यूसुफ तब तलक हुआँ रहा। भाइयन भुइँया तलक निहुरिके प्रणाम किहेन। 15 यूसुफ ओनसे कहेस, “तू पचे इ काहे किहा? का तू लोगन क पता नाहीं अहइ कि छिपी बातन क

फरियावइ क मोर खास ढंग बाटइ। मोहसे बढ़िके अच्छी तरह कउनो दूसर इ नाहीं कइ सकत।”

16 यहूदा कहेस, “महोदय, हम पचन क कहइ बरे कछू नाहीं अहइ। ऐंका फरियावइ क कउनो दूसर तरीका नाहीं बा। इ देखावइ क कउनो तरीका नाहीं बा कि हम पचे अपराधी नाहीं अही। हम पचे अउर कछू किहे होइ जेकरे बरे परमेस्सर हमका अपराधी ठहराएस ह। एह बरे, हम सबहिं बिन्यामीन क साथ, आपका दास होब।”

17 मुला यूसुफ कहेस, “मई तू पचनक सबहिं क आपन दास न बनाउब। सिरिफ उहइ मनई जेकर बोरामें पियाला पावा गवा रहा, मोर दास होइ। तू दूसर लोग आपन पिता क लगे जाइ बरे अजाद अहई।”

यहूदा बिन्यामीन क बारे में सिफारिस करत ह

18 तब यहूदा यूसुफ क लगे गवा अउ उ कहेस, “महोदय, मेहरबानी कइके मोका खुद आपसे साफ कहि लेइ द्या। कृपा कइके मोसे नाखुस न हवा। मई जानत अहउँ कि आप खुद फिरौन जइसे अहईं। 19 जब हम लोग पहिले हिआँ आए रहे, आप पूछे रहेन कि ‘का तोहार पिता या भाई अहईं?’ 20 अउर हम आप क जवाब दीन्ह, ‘हमरे एक तु पिता अहईं, उ बुढ़ान अहईं अउ हम लोगन क एक लहुरा भाई अहइ। हमार पिता ओसे बहोत ज्यादा पियार करत हीं काहेकि ओकर जन्म ओकरे बुढ़ापे में भवा रहा, अउर लहुरा बेटवा क भाई मरि गवा एह बरे इ सिरिफ अकेला बचा अहइ जउन उ मेहरारु स जनमे रहा। हम पचन क पिता ओका बहोत पियार करत हीं।’ 21 तब आप हमसे कहे रहेन, ‘उ भाई क मोरे लगे लिआवा। मई ओका लखइ चाहत हउँ।’ 22 अउर हम लोग कहे रहे, ‘इ नान्ह लरिका नाहीं आइ सकत। उ आपन बाप क नाहीं तजि सकत। अगर ओकरे पिता क ओसे हाथ धोवइ पड़इ तउ ओकर पिता ऐतना दुःखी होइ कि उ मरि जाइ।’ 23 मुला आप हमसे कहेन, ‘तू लोग आपन छोटका भइया क जरुर लिआवा, नाहीं तउ मई फुन तू लोगन क हाथे अनाज न बेचब।’ 24 एह बरे हम लोग आपन पिता क लगे लउटे अउ आप जउन कछू कहेन, ओनका बतावा।

25 “पाछे हम पचन क पिता कहेन, ‘फुन जा अउर हम लोगन बरे कछू अउर अन्न खरीदा।’ 26 हम लोग ओसे कहा, ‘हम लोग आपन सब स लहुरा भाई क बिना नाहीं जाइ सकत। राजपाल कहेस ह कि उ तब तलक हम लोगन क अनाज नाहीं बेची जब तलक उ हमरे सबन त लहुरे भइया क नाहीं लखि लेत।’ 27 तब मोर पिता हम लोगन स कहेस, ‘तू लोग जानत ह कि मोर मेहरारु राहेल मोका दुइ पूत दिहस। 28 मई एक पूत क दूरी जाइ दिहेउँ अउ ओका जंगली जनावर मारि डापन अउ तब स मई ओका नाहीं लखेउँ ह। 29 अगर तू पचे मोर पूत क मोसे दूर लइ जाइ चाहत बाट्या अउ ओका कछू होइ जात ह तउ मोका ऐतना दुःख होइ कि मई मरि जाब।’ 30 एह बरे अब हम लोग आपन छोटका भाई क बिना घरे जाब तब हम पचन क पिता क इ निहारइ क पड़ी। उ छोटका बेटवा हमरे पिता क जिन्गी में सबसे बेसी मानता रखत ह। 31 जब उ

पचे लखिहीं कि छोटका बेटवा हम लोगन क संग नाही अहइ उ पचे मरि जइहीं अउर इ हम लोगन क दोख होइ। हम पचे आपन पिता क घोर दुःख अउ मउत क कारण होइ जाब।

32“मई छोटके बेटवा क जिम्मेदारी लीन्ह ह। मई आपन पिता स कहेउँ, ‘जदि मई ओका आप क लगे लउटाइके न लावउँ तउ आप सारी जिन्गगी भइ मोका दोखी ठहराइ सकत हीं।’ 33एँह बरे मई आप स माँगत अहउँ, अउर आप पराथना करत हउँ कि कृपा कइके छोटके लरिका क आपन भाइयन क संग लौटि जाइ देई अउ मई हिआँ रुकब अउ आप क दास होब। 34मई आपन पिता क लगे लौट नाही सकत जदि हमरे संग छोटका भाई नाही रही। मई इ बात स बहोत ससान अहउँ कि मोरे बाप क संग का घटी।”

यूसुफ आपन क परगट करत ह कि उ कउन अहइ

45 यूसुफ आपन क अउर जियादा न संभारि सका। उ हुआँ हाजिर सबहि लोगन क समन्वा रोइ पड़ा। यूसुफ कहेस, “हर एक स कहा कि हिआँ स हट जाई।” एँह बरे सबहि लोग चला गएन। सिरिफ ओकर भाई ही यूसुफ क संग रहि गएन। तब यूसुफ ओनका बताएस कि उ कउन अहइ। 2यूसुफ रोवत रहा, अउर फिरौन क महल क सब मिस्त्र क मनइयन सुनेन। 3यूसुफ आपन भाइयन स कहेस, “मई आप लोगन क भाई यूसुफ अहउँ। का मोर पिता अब भी जीवित अहइ?” मुला भाइयन ओका जवाब नाही दिहेन। उ पचे डेरन अउ उलझन में रहेन।

4एँह बरे यूसुफ आपन भाइयन स फुन कहेस, “मोरे लगे आवा।” एँह बरे यूसुफ भाई क निअरे गएन अउ यूसुफ ओनसे कहेस, “मई आप लोगन क भाई यूसुफ अहउँ। मई उहइ अहउँ जेका मिस्त्री लोगन क हाथे आप लोग गुलाम क रुप में बेचे रहेन। 5अब परेसान न होई। आप लोग आपन किहे भए पड़ गुस्सा न करई। उ तउ मोरे बरे परमेस्सर क योजना रही कि मई हिआँ आवउँ। मई हिआँ तू लोगन क जिन्गगी बचावइ बरे आवा हउँ। 6इ खौफनाक भुखमरी क समइ दुइ बरिस ही अबहि बीता अहइ अउर अबहि पाँच बरिस बे पौध लगावइ या उपज क अइहीं। 7एँह बरे परमेस्सर तू लोगन स पहिले मोका हिआँ पठएस जेहसे मई इ देस में तू लोगन क बचाइ सकउँ। 8इ आप लोगन क दोख नाही रहा कि मई हिआँ पठवा गवा। इ परमेस्सर क योजना रही। परमेस्सर मोका फिरौन बरे पिता क समान बनाएस। ताकि मई ओकर सारा घर अउ समूचइ मिस्त्र क राजपाल बनि सकउँ।”

इस्त्राएल क मिस्त्र बरे आमन्त्रण मिला

9यूसुफ कहेस, “एँह बरे हाली मोरे पिता क लगे जा। मोरे पिता स कहा कि ओकर पूत यूसुफ इ सँदेसा पठएस ह।”

परमेस्सर मोका समूचइ मिस्त्र क राजपाल बनाएस ह। मोरे लगे आवई। इन्तजार न करई। अबहि आवई। 10आप मोरे निचके गोसेन प्रदेस में रइहीं। आप क, आप क बेटवन

क, आप क सबहि जनावरन अउ झुण्ड क सुआगत अहइ। 11भुखमरी क अगले पाँच बरिस में मई आप क देखरेख करब। इ तरह आप क अउ आप क परिवारे क जउन चीजन अहई ओनसे आप क हाथ धोवइ क न होइ।

12यूसुफ आपन भाइयन स बात करत रहा। उ कहेस, “अब आप लोग निश्चित रूप स लख सकत अहई कि इ फुरइ मई ही यूसुफ अहई” अउर आप लोगन क भाई बिन्यामीन जानत ह कि इ मई ही आप लोगन क भाई अहउँ जउन आप लोगन स बात करत हउँ। 13एँह बरे मोरे पिता स मोका मिस्त्र क जउन सम्मान प्राप्त अहइ क बारे में कहेई। आप लोगन जउन हिआँ लखेन ह उ हर एक चीज क बारे में मोरे पिता क बतावई। अब हाली करा अउ मोरे पिता क लइके मोरे लगे लौटा।” 14तब यूसुफ आपन भाई बिन्यामीन क गले लगाएस अउ रोइ पड़ा अउ बिन्यामीन भी रोइ पड़ा। 15तब यूसुफ सबहि भाइयन क चूमेस अउ ओन कइ बरे रोइ पड़ा। एँकरे पाछे भाई ओकरे संग बतियाइ लागेन।

16फिरौन क पता लाग कि यूसुफ क भाई ओकरे पास आवा अहई। इ खबर फिरौन क पूरे महल में सँवर गइ। फिरौन अउ ओकर नउकर इ बारे में बहोत खुस भएन। 17एँह बरे फिरौन यूसुफ स कहेस, “आपन भाइयन स कहा कि ओनका जेतना खइया क चाही, लइ लेई अउ कनान देस क लौटि जाई। 18आपन भाइयन स कहा कि उ पचे आपन पिता अउ आपन परिवार क लइके हिआँ मोरे लगे आवई। मई तोहका रोजी बरे मिस्त्र में बढ़िया धरती देब अउ तोहार परिवार सब स अच्छा खइया क खाइ जउन हमरे लगे हिआँ अहइ।” 19तब फिरौन कहेस, “हमरी सबन त बढ़िया गाड़ियन में स कछू आपन भाइयन क द्या। ओनका कनान जाइ अउ गाड़ियन में स आपन पिता, मेहररुअन अउ गदेलन क हिआँ आवइ द्या। 20ओनकी सबइ चिजियन क हिआँ लावइ बारे में चिन्ता जिन करा। हम ओनका मिस्त्र में जउन सबन त बढ़िया अहइ, देब।”

21एँह बरे इस्त्राएल क पूतन इहइ किहेन। यूसुफ फिरौन क बचन क मुताबिक नीक गाड़िन क दिहस अउ यूसुफ जात्रा बरे ओनका भरपूर भोजन दिहस। 22यूसुफ हर एक भाई क एक एक जोड़ा सुन्नर ओढ़ना दिहस। मुला यूसुफ बिन्यामीन क पाँच जोड़ा सुन्नर ओढ़ना दिहस अउ यूसुफ बिन्यामीन क तीन सौ चाँदी क सिक्का भी दिहस। 23यूसुफ आपन पिता क भेंट पठएस। उ मिस्त्र स बहोत स बढ़िया चीजन स भरा बोरन स लदा दस तु गदहन क पठएस अउ उ आपन पिता बरे अनाज, रोटी अउ दूसर भोजन स लदी भइ दस तु गदहियन क ओनकी वापसी जात्रा बरे पठएस। 24तब यूसुफ आपन भाइयन क जाइ बरे कहेस। जब उ पचे जाइ क रहेन यूसुफ ओनसे कहेस, “सोइइ घरेजा अउ रस्ता में जिन लइया।”

25इ तरह भाइयन मिस्त्र क तजेन अउ कनान देस में आपन पिता क लगे गएन, 26भाइयन ओनसे कहेन, “पिता जी यूसुफ अबहि जिअत अहइ अउ उ पूरा मिस्त्र देस क राजा अहइ।”

ओनकइ पिता असमंजस में पड़ि गवा। उ ओन पड़ि नाहीं पतियान। 27मुला यूसुफ जउन बातन क कहे रहा, भाइयन हर एक बात आपन पिता स कहेन। तब याकूब ओन गाड़ियन क लखेस जेनका यूसुफ मिस्त्र क वापसी जात्रा बरे पठए रहा। तब याकूब भाव बिभोर होइ गवा अउ बहो बहोतइ खुस भवा। 28इस्त्राएल कहेस, “अब मोका बिस्सास अहइ कि मोर पूत यूसुफ अबहिं जिअत अहइ। मई मरइ स पहिले ओका देखइ जात अहउँ।”

परमेस्सर इस्त्राएल क पतियावत ह

46 एँह बरे इस्त्राएल मिस्त्र क आपन जात्रा सुरु किहस। पहिले इस्त्राएल बेसेबा पहोंचा। हुओं इस्त्राएल आपन पिता इसहाक क परमेस्सर क आराधना अउर बलि भेंट किहस। उ बलि दिहेस। 2राति में परमेस्सर इस्त्राएल स सपना में बोला। परमेस्सर कहेस, “याकूब, याकूब”

अउ इस्त्राएल जवाब दिहेस, “मई हिओं अहउँ।”

3तब परमेस्सर कहेस, “मई यहोवा तोहरे बाप क परमेस्सर अहउँ। मिस्त्र जाइ स डेरअ जिन। मिस्त्र में मई तोहका महान रास्ट बनाउब। 4मई तोहरे संग मिस्त्र चलब अउ मई तोहका फुन मिस्त्र में स बाहेर निकारि लाउब। तू मिस्त्र में मरिब्या। मुला यूसुफ तोहरे संग रही। जब तू मरब्या तउ उ खुद आपन हाथन स तोहार आँखी बन्द करी।”

इस्त्राएल मिस्त्र क जात ह

5तब याकूब बेसेबा तजेस अउ मिस्त्र तलक जात्रा किहस। ओकर बेटवन, अर्थात इस्त्राएल क बेटवन अउ बाप, आपन मेहररुअन अउ आपन सबहिं बच्चन क मिस्त्र लइ गएन। उ पचे फिरौन क जरिये पठई गइन गाड़ियन में जात्रा किहेन। 6ओनके लगे, ओनकइ गोरु अउ कनान देस में ओनका आपन जउन कछू रहा, उ भी संग रहा। इ तरह इस्त्राएल आपन सबहिं लरिकन अउ आपन परिवारे क संग मिस्त्र गवा। 7ओकरे संग ओकर बेटवन अउ बिटियन अउ पोतन अउर पोतिन रहिन। ओकर सारा परिवार ओकरे संग मिस्त्र गवा।

याकूब क परिवार

8इ इस्त्राएल क ओन पूतन अउ परिवारन क नाउँ अहउँ जउन ओकरे संग मिस्त्र गएन।

रूबेन याकूब क पहिला पूत रहा। 9रूबेन क पूत रहेन: हनोक, पललू, हेस्त्रोन अउ कम्म्री।

10सिमोन क पूत: यमूएल, यामीन, ओहद, याकीन अउ सोहर। हुओं साऊल भी रहा। (साऊल कनानी मेहररु अउ पड़इ भवा रहा।)

11लेवी क बेटवन: गोर्सोन, कहात अउ मरारी

12यहूदा क पूतन: एर, ओनान, सेला, पेरेस अउ जेरह। (एर अउ ओनान कनान में रहत समइ मर ग रहेन।) पेरेस क पूतन: हेस्त्रोन अउ हामूल।

13इस्साकार क पूतन: तोला, पुब्बा, योब अउ सिमोन।

14जबूलून क पूतन: सेरेद, एलोन अउ यहलेल।

15रूबेन, सिमोन लेवी, यहूदा, इस्साकार अउ जबूलून जउन याकूब क मेहररु लिआ क पूतन रहेन। लिआ क उ पूतन पदन-अराम में रहेन अउर ओकर संग दीना नाउँ क एक ठू बिटिया भी रही। इ परिवारे में तैंतीस मनई रहेन।

16गाद क पूतन: सिथ्योन, हाग्गी, सूनी, एसबोन, एरी, अरोदी, अउर अरेली।

17आसेर क पूतन: यिम्ना, यिस्वा, यिस्वी, बरीआ अउ ओनकइ बहिन सेरह अउ बरीआ क पूतन: हेबेर अउ मल्कीएल रहेन।

18इ सबइ याकूब क मेहररु क दासी जिल्पा स ओकरे पूत रहेन। (जिल्पा लाबान क दुआरा ओकरे बिटिया लिआ क दीन्ह गवा रहेन।) इ परिवारे में सोलह मनई रहेन।

19याकूब क संग ओकर मेहररु राहेल स पड़इ भवा पूत बिन्यामीन भी रहा। (यूसुफ भी राहेल स पड़इ रहा, मुला उ पहिले स ही मिस्त्र में रहा।)

20मिस्त्र में यूसुफ क दुइ पूतन रहेन, मनस्से अउ एप्रैम। (यूसुफ क मेहररु ओन क याजक पोतीपेरा क बिटिया आसनत रही।)

21बिन्यामीन क पूत: बेला, बेकेर, अस्बेल, गेरा, नामान, एही, रोस, मुप्पीम, हुप्पीम अउ आर्द।

22उ पचे याकूब क मेहररु राहेल स पड़इ भए ओकर दुइ पूत रहेन। इ परिवार में चौदह मनई रहेन। 23दान क पूत: हूसीम। 24नप्ताली क पूतन: यहसेल, गूनी, सेसेर, अउर सिल्लेम।

25उ पचे याकूब अउ बिल्हा क पूत रहेन। (बिल्हा राहेल क नउकरनी रही। जेका लाबन ओका दिहे रहेन) इ परिवारे में सात मनई रहेन।

26इ तरह याकूब क सन्तानन मिस्त्र में पहोंचिन। ओनमें छछठ ओकर सोइ संतान रहिन। (इ गनती में याकूब क बेटवन क मेहररुअन सामिल नाहीं रहिन।)

27यूसुफ क भी दुइ पूत रहेन। उ पचे मिस्त्र में पड़इ भ रहेन। इ तरह मिस्त्र में याकूब क परिवार में सत्तर मनई रहेन।

इस्त्राएल मिस्त्र पहोंचत ह

28इस्त्राएल पहिले यहूदा क यूसुफ क लगे पठएस। यहूदा गोसेन प्रदेश में यूसुफ क लगे गवा। जब इस्त्राएल अउ ओकर लोग उ प्रदेश में गएन। 29यूसुफ क पता लाग कि ओकर पिता नगिचे आवत अहइ। एँह बरे यूसुफ आपन रथ तइयार कराएस अउ आपन पिता इस्त्राएल स गोसेन में भेटइ चला। जब यूसुफ आपन पिता क लखेस तब उ ओकरे गटइया स लपटि गवा अउ देर तलक रोवत रहा।

30तब इस्त्राएल यूसुफ स कहेस, “अब मई सान्ति स मरि सकत हउँ। मई तोहार मुँह देखि लिहेउँ ह अउर मई जानत हउँ कि तू अबहिं जिअत अहा।”

31यूसुफ आपन भाइयन अउ आपन पिता क परिवार स कहेस, “मई जाब अउ फिरौन स कहब कि मोरे पिता हिओं आइ ग अहइँ। मई फिरौन स कहब, ‘मोर भाइयन अउ मोर पिता क परिवार कनान देस तजि दिहे अहइ अउर हिओं मोरे लगे आइ ग अहइँ। 32इ गइरिया क परिवार अहइ। उ पचे

हमेशा गोरु अउ खरका राखे अहई। उ पचे आपन सबहि जनावर अउ ओनकइ जउन कछू आपन अहइ ओका आपन संग लइ आए अहई। 33जब फिरौन आप लोगन क बोलइहीं अउ आप लोगन स पूछिहीं, 'आप लोग का काम करत हीं?' 34आप लोग ओनसे कह्या, 'हम पचे गइरिया अही। हम सबइ पूरी जिन्नगी जनावरन क देखरेख में बितावा ह। हम लोगन स पहिले हमार पुरखन भी अइसे रहेन।' तब फिरौन तू लोगन क गोसेन प्रदेस में रहइ क आग्या दइ देइ। मिस्त्र क लोग गइरिया क पसन्द नहीं करतेन, एँह बरे बढ़िया उहइ होइ कि आप लोग गोसेन में ही ठहरई।"

इस्त्राएल गोसेन में बसत ह

47 यूसुफ फिरौन क लगे गवा अउ उ कहेस, "मोर पिता, मोर भाई अउ ओनके सबहि परिवार हिआँ आइ ग अहई। उ सबइ आपन सबइ जनावर तथा कनान में ओनकइ आपन जउन कछू रहा, ओकरे संग अहइ। इ टेम उ सबइ गोसेन प्रदेस में अहई।" 2यूसुफ आपन भाइयन में स पाँच क फिरौन क समन्वा हाजिर होइ बरे चुनेस। 3फिरौन भाइयन स पूछेस, "तू लोग का काम करत अहा?"

भाइयन फिरौन स कहेन, "महोदय, हम पचे गइरिया अही। हम लोगन स पहिले हमार पुरखन भी गइरिया रहेन।" 4उ पचे फिरौन स कहेन, "कनान में भुखमरी क इ टेम बहोत बुरा बाटइ। हम लोगन क गोरुअन क घास वाला कउनो खेत बचा नहीं रहि गवा बाटइ। एँह बरे हम लोग इस देस में बसइ आवा अही। आप से हम पचे बिनती करत अही कि आप कृपा कइके हम लोगन क गोसेन प्रदेस में रहइ देई।"

5तब फिरौन यूसुफ स कहेस, "तोहरे पिता अउ तोहार भाई तोहरे लगे आवा अहई। 6तू मिस्त्र में कउनो भी जगह ओनके रहइ बरे चुन सकत ह। आपन पिता अउ आपन भाइयन क सबसे अच्छी भुईया द्या। ओनका गोसेन पहुँटा में रहइ द्या अउ अगर उ सबइ कुसल गइरिया अहउँ, तउ उ पचे मोरे जनावरन क भी देख भाल कइ सकत हीं।"

7तब यूसुफ आपन पिता याकूब क भितरे फिरौन क समन्वा बोलाएस। याकूब फिरौन क आसीबाद दिहस। 8तब फिरौन याकूब स पूछेस, "आप क उमिर का अहइ?" 9याकूब फिरौन स कहेस, "बहोत स कस्टन क संग मोर छोटी जिन्नगी रही। मई सिरिफ एक सौ तीस बरिस जिन्नगी बिताएउँ ह। मोर पिता अउ ओनके पुरखन मोसे बेसी उमिर तक जिअत रहेन।"

10याकूब फिरौन क आसीबाद दिहस। तब फिरौन स बिदा लेइके चल दिहस। 11यूसुफ फिरौन क हुकुम मानेस। उ आपन पिता अउ भाइयन क मिस्त्र में भुईया दिहस। इ रामसेस सहर क निअरे मिस्त्र में सबसे बढ़िया भुईया रही। 12यूसुफ आपन पिता, भाइयन अउ ओनके आपन लोगन क, जउन भोजन ओनका जरूरी रहा, दिहस।

यूसुफ फिरौन बरे भुईया खरीदत ह

13भुखमरी क समइ अउर भी जियादा बुरा होइ गवा। देस में कहीं भी भोजन न रहा। इ बुरा समइ क कारण मिस्त्र

अउ कनान बहोत गरीब होइ गएन। 14देस में लोग जियादा स जियादा अनाज बेसहइ लागेन। यूसुफ धन बचाएस अउ ओका फिरौन क महल में लिआएस। 15कछू समइ पाछे मिस्त्र अउ कनान में लोगन क लगे पइसा नहीं रहा। उ पचे आपन सारा धन अनाज बेसहइ में खर्च कइ दिहन। एँह बरे लोग यूसुफ क लगे गएन अउ बोलेन, "कृपा कइके हम पचन क खइया क द्या। हम पचन क धन खतम होइ ग अहइ। अगर हम लोग नहीं खाव तउ आप क लखत लखत मरि जाब।"

16मुला यूसुफ जवाब दिहस, "आपन गोरु मोका द्या अउर मई तू लोगन क भोजन देब।" 17एँह बरे लोग आपन गोरु, घोड़ा अउ दूसर सबहि जनावरन क भोजन बेसहइ बरे प्रयोग में लावइ लागेन अउ उ बरिस यूसुफ ओनके गोरुअन क लिहस अउ भोजन दिहस।

18मुला दूसर बरिस लोगन क लगे जनावर नहीं रहि गएन अउ भोजन बेसहइ बरे कछू न रहा। एँह बरे मनई यूसुफ क लगे गएन अउ बोलेन, "आप जानत हीं कि हम लोगन क लगे धन नहीं बचा बाटइ अउ हमार सबहि गोरु आप क होइ गए अहई। एँह बरे हम लोगन क लगे कछू नहीं बचा अहइ। उ बचा अहइ सिरिफ, जउन आप लखत हीं, हमार तन अउ हमार भुईया। 19आप क लखत भए ही हम फुरइ मरि जाब। मुला जदि आप मोका भोजन देत हीं तउ हम फिरौन क आपन भुईया देब अउ ओकर गुलाम होइ जाब। हमका बिआ द्या जेनका हम बोइ सकी। तब हम लोग जिअत रहव अउ मरब नहीं अउ भुईया हम लोगन बरे फुन अनाज उगाई।"

20एँह बरे यूसुफ मिस्त्र क सारी भुईया फिरौन बरे बेसहेस। मिस्त्र क सबहि लोगन आपन खेतन क यूसुफ क हाथ बेचि दिहन। उ पचे इ एँह बरे किहन काहे कि उ पचे बहोत भुखान रहेन। 21अउर सबइ लोग फिरौन क दास होइ गएन। मिस्त्र में सब जगह लोग फिरौन क दास रहेन। 22एक सिरिफ उहइ भुईया यूसुफ नहीं बेसहेस जउन याजकन क कब्जा में रही। याजकन क भुईया बेचइ क जरूरत नहीं रही। काहेकि फिरौन ओनके काम बरे ओनका पगार देत रहा। एँह बरे उ पचे इ धन क खाइ बरे भोजन बेसहइ में खरच किहन।

23यूसुफ लोगन स कहेस, "अब मई तू पचन क अउ तोहरी भुईया क फिरौन बरे बेसहेउँ ह। एँह बरे मई तू पचन क बिआ देब अउ तू लोग आपन खेतन में पौध लगाइ सकत ह। 24फसल काटइ क समइ तू लोग फसल क पाँचवाँ हींसा फिरौन क जरूर दिहा। तू पचे आपन खातिर पाँच में स चार हींसा रखि सकत ह। तू लोग उ बिआ क जेका भोजन अउ बोवइ बरे रखब्या ओका दुसरे बरिस प्रयोग कइ सकब्या। अब तू आपन परिवारन अउ गदेलन क खिआइ सकत ह।"

25मनइयन कहेन, "आप हम लोगन क जिन्नगी बचाइ लिहन ह।" हम लोग आप क अउ फिरौन क दास होइ में खुस अही।"

26एँह बरे यूसुफ उ समइ देस में एक नेम बनाएस अउ उ नेम अब तलक चला आवत अहइ। नेम क मुताबिक

भुईया स हर एक उपज क पाँचवौं हीसा फिरौन क बाटड़। फिरौन सारी भुईया क सुआमी अहइ। सिरिफ उहइ भुईया ओकर नाहीं जउन याजकन क बाटड़।

“मोका मिस्त्र में जिन दफनाया”

27इस्त्राएल मिस्त्र में रहेउँ। उ गोसेन पहँटा में रहा। ओकर परिवार बाढ़ा अउ बहोत बड़वार होइ गवा। उ पचे मिस्त्र में उ भुईया क पाएन अउ अच्छी जिन्गी बिताएन। 28याकूब मिस्त्र में सत्रह बरिस रहा। इ तरह याकूब एक सौ सैतालीस बरिस क होइ गवा। 29उ समइ आइ गवा जब इस्त्राएल समझ गवा कि उ हाली ही मरी, एँह बरे उ आपन पूत यूसुफ क आपन लगे बोलाएस। उ कहेस, “अगर तू मोसे पिरैम करत ह तउ तू आपन हाथ मोरी जाँघे क तरे धइके मोका बचन द्या कि तू, जउन मई कहब करब्या अउ तू मोरे बरे सच्चा रहब्या। जब मई मरब तउ मोका मिस्त्र में जिन दफनाया। 30उहइ जगह मोका दफनाया जउने जगह मोरे पुरखन दफनावा गए अहइँ। मोका मिस्त्र स बाहेर लइ जा अउ मोरे पुरखन जहाँ दफनाए गवा अहइँ उहइ जगह मोका दफनावा।”

यूसुफ जवाब दिहस, “मई बचन देत हउँ कि उहइ करब जउन आप कहत हीं।” 31तब याकूब कहेस, “मोसे एक प्रण करा” अउर यूसुफ ओसे प्रण किहेस कि उ एँका पूरा करी। तब इस्त्राएल आपन मूँडी खटिया प पाछे धरेस।*

मनस्से अउ एप्रैम क असीस

48 कछू टेम पाछे यूसुफ क पता लाग कि ओकर पिता बेराम अहइ। एँह बरे यूसुफ आपन दुइनउँ बेटहनन मनस्से अउ एप्रैम क संग लिहस अउ आपन पिता क लगे गवा। 2जब यूसुफ पहँचा तउ कउनो इस्त्राएल स कहेस, “तोहार पूत यूसुफ तोहका लखइ आवा ह।” इस्त्राएल बहोत दुर्बल रहा, मुला उ बहोत जतन किहेस अउ खटिया प बइठि गवा।

3तब इस्त्राएल यूसुफ स कहेस, “कनान देस में लूज क जगह प सर्वसत्तीमान परमेस्सर मोका खुद दर्सन दिहस। परमेस्सर हुआँ मोका आसीबाद दिहस। 4परमेस्सर मोसे कहेस, “मई तोहार एक बड़वार परिवार बनाउब। मई तोहका बहोत स बच्चन क देब अउर तू एक महान रास्ट्र बनब्या। तोहरे लोगन इ भुईया प सदा बना रहीं।” 5अउर अब तोहार दुइ पूत बाटेन। मोरे आवइ स पहिले मिस्त्र देस में हिआँ इ सबइ पइदा भए रहेन। तोहार दुइनउँ पूत एप्रैम अउ मनस्से मोरे आपन बेटवन क तरह होइहीं। उ पचे वइसेन होइहीं जइसे मोका रूबेन अउ सिमोन अहइँ। 6इ तरह इ दुइनउँ मोर पूत होइहीं। उ पचे मोर सबहिं चीजन में हिस्सेदार होइहीं। मुला अगर तोहार दूसर पूत होइहीं तउ उ सबइ तोहार बच्चन होइहीं। मुला उ पचे भी एप्रैम अउ मनस्से क

तब ... धरेस या तब इस्त्राएल लाठी क सहारा लइके पराथना में आपन मूँडे निहराएस। डंडा बरे हिब्रू सब्ब “बिखउना” सब्ब क तरह बाटड़ अउ पराथना बरे बइपरा सब्ब का अरथ “पैलगी करब” “ओलरब” होत ह।

बेटवन क नाई होइहीं। अरथ अहइ भविस्स में एप्रैम अउ मनस्से क जउन कछू होइ, ओहमाँ हिस्सेदार होइहीं। 7पद्वनअराम स जात्रा करत समइ में राहेल मरि गइ। इ बात मोका बहोतइ दुःखी किहस। उ कनान क भुईया में मरी। हम पचे अबहिं एप्राता कइँती जात्रा करत रहे। मई ओका एप्राता कइँती जाइवाली सइक प दफनावा।” (एप्राता बेटलेहेम अहइ।)

8तब इस्त्राएल यूसुफ क पूतन क लखेस। इस्त्राएल पूछेस, “इ सबइ लरिक्न कउन अहइँ?”

9यूसुफ आपन पिता स कहेस, “इ सबइ मोर बेटवन अहइँ। इ सबइ उ पचे लरिक्न अहीं जेनका परमेस्सर मोका दिहस ह।”

इस्त्राएल कहेस, “आपन बेटवन क मोरे लगे लइ आवा। मई ओनका असीसब।”

10इस्त्राएल बुढ़वा रहा, अउर ओकर आँखिन ठीक नाहीं रहिन। एँह बरे यूसुफ आपन बेटहनन क अपने बाप क निचके लइ गवा। इस्त्राएल बच्चन क चूमेस अउ गले स चिपकाएस। 11तब इस्त्राएल यूसुफ स कहेस, “मई कबहुँ नाहीं सोचेउँ कि मई तोहार मुँह फुन लखब मुला देखा। परमेस्सर तोहका अउर तोहरे गदेलन क मोका निहारइ दिहस।”

12तब यूसुफ बच्चन क गोदी स लिहस अउ उ पचे ओकरे पिता क समन्वा पैलगी करइ क निहुरेन। 13यूसुफ एप्रैम क आपन दाहिन कइँती किहस अउ मनस्से क आपन बाई कइँती इ तरह एप्रैम इस्त्राएल क बाई कइँती रहा अउ मनस्से दाई कइँती रहा। 14मुला इस्त्राएल आपन हाथ क पहला बदलिके आपन दाहिन हाथ क लहुरा लरिका एप्रैम क मूँडे प धरेस अउ तब बाएँ हाथ क इस्त्राएल जेठ लरिका मनस्से क मूँडे प राखेस। उ आपन बाएँ हाथ क मनस्से प धरेस, तउ भी मनस्से क जन्म पहिले भवा रहा। 15अउर इस्त्राएल यूसुफ क आसीबाद दिहस अउ कहेस,

“मोरे पुरखा इब्राहीम अउ इसहाक हमरे परमेस्सर क आराधना किहस अउ उहइ परमेस्सर मोर पूरी जिन्गी क रास्ता क देखेवइया रहा बाटड़।

16उहइ सरगदूत रहा जउन मोका सबहिं कस्टन स बचाएस अउर मोर पराथना अहइ कि इ सबइ लरिक्न क उ असीसइ। अब इ सबइ बच्चन मोर नाम पइहीं। उ पचे हमरे पुरखा इब्राहीम अउ इसहाक क नाउँ पइहीं। मई पराथना करत हउँ कि उ पचे धरती प महान परिवार अउ रास्ट्र बनिहीं।”

17यूसुफ लखेस कि ओकर पिता एप्रैम क मूँडे प दाहिना हाथ रखेस ह। इ यूसुफ क खुस न कइ सका। यूसुफ आपन पिता क हाथे क धरेस। उ ओका एप्रैम क मूँडे स हटाइके मनस्से क मूँडे प रखइ चाहत रहा। 18यूसुफ आपन पिता स कहेस, “आप आपन दाहिन हाथ गलत लरिका प धरे अहा। मनस्से क जन्म पहिले अहइ।”

19मुला ओकर पिता नकारेस, अउ कहेस, “पूत, मई जानत हउँ। मनस्से क जन्म पहिले अहइ अउर उ महान होइ। उ बहोत स लोगन क पिता भी होइ। मुला लहुरा भाई जेठ भाई स बड़ा होइ अउ लहुरे भाई क परिवार ओसे

बहोत बड़ा होइ।” 20इ तरह इस्राएल उ दिन ओनका आसीर्बादि दिहस। उ कहेस,

“इस्राएल क लोग तोहरे नाउँ क प्रयोग आसीर्बादि देइ बरे करिहीं, उ लोगन कहब्या: ‘परमेस्सर तोहका एप्रैम अउ मनस्से क तरह बनावइ।’”

इ तरह इस्राएल एप्रैम क मनस्से स बड़वार बनावस।

21तब इस्राएल यूसुफ स कहेस, “लखा मोरी मउत क टेम निचकाइ ग अहइ। मुला परमेस्सर तोहरे साथ अब भी रही। उ तोहका तोहरे पुरखन क देस तलक लउटाइ लइ जाइ। 22मई तोहका अइसा कछू दिहेउँ ह जउन तोहरे भाइयन क नाहीं दिहेउँ ह। मई तोहका उ पहाड़े क देत अहउँ जेका मई एमोरी लोगन स जीतेउँ ह। उ पहाड़ बरे मई आपन तरवार अउ आपन धनुख स जुद्ध किहेउँ रहे अउर मोर जीत भइ रही।”

याकूब आपन पूतन क असीसत ह

49 तब याकूब आपन सबहिं बेटवन क आपन लगे बोलाएस। उ कहेस, “मोर सबइ बेटवनो, हिउँँ मोरे लगे आवा। मई तोहका बताउब कि भविस्स में का होइ।

2“याकूब क पूते, एक साथे आवा अउ सुना, आपन पिता इस्राएल क सुना।”

रूबेन

3“रूबेन, तू मोर पहिलउटी क बेटवा अहा। तू मोर पहिलउटी क बेटवा अउ मोरी सक्ती क पहिला सबूत अहा। तू मोर सबहिं बेटवन स जियादा इज्जतदार अउ बरिआर अहा।

4मुला तोहार उमंग बाढ़े का लहर क नाई बेकाबू रहा। इस्राएल तू मोर सबहिं पूतन स जियादा सम्मानित पूत अउर नाहीं रहिसकब्या। तू आपन बाप क बिछाउना पइ चढ़्या अउ ओकर पत्नियन में स एक क संग सोया। तू आपन पिता क बिछाउना क लज्जित किहेस ह।”

सिमोन अउ लेवी

5“सिमोन अउ लेवी भाई अहई। ओनका आपन तरवारे स लड़ब पियारा अहइ।

6उ पचे छुपे रूप बुरी योजना बनावन। मई ओनकइ योजना क कउनो हीसा नाहीं चाहत हउँ मई ओनकइ छुपी बइठकन क अनुमोदन नाहीं करब। उ पचे मनइयन क कतल किहन जब उ सबइ किरोध में रहेन। अउ उ पचे सिरिफ मजाक बरे जनावरन क चोट पहोंचाएन।

7ओनकइ किरोध एक सराप अहइ। इ सबइ बहोत जियादा कठोर अहइ जब उ सबइ पगलात हीं। याकूब क देस में ओनके परिवारन क आपन भुईया न होइ। उ पचे पूरा इस्राएल में फइलि जइहीं।”

यहूदा

8“यहूदा, तोहार भाईयन तोहार प्रसंसा करिहीं। तू आपन दुस्मनन क हरउब्या। तोहरे भाई तोहरे समन्वा निहुरिहीं।

9यहूदा उ सेर क नाई अहइ जउन कउनो जनावर क मारे होइ। हे मोर पूत, तू उ सेर क तरह अहा जउन आपना सिकार क बाद अराम कई बरे सोइ जात ह। अउर कउनो ऐतना बहादुर नाहीं कि ओका छेड़ि देइ।

10यहूदा क परिवार क मनई राजा होइहीं। ओकरे परिवार क राज-चीन्हा सीलो* क अवाई स पहिले खतम न होइ। तब अनेक लोग ओकर हुकुम मनिहीं।

11उ आपन गदहा क अंगूरे क लता स बाँधत ह। उ आपन गदहा क बच्चन क सबसे बढ़िया अंगूरे क लता में बाँधत ह। उ आपन ओढ़ना क धोवइ बरे सबसे बढ़िया दाखरस क बइपरत ह।

12ओकर आँखिन दाखरस पिए स ललछउँइ रहत हीं। ओकर दँतवन दूध पिए स उज्जर अहई।”

जबूलन

13“जबूलन समुदर क निअरे रही। ऐंकर समुदर क किनारा जहाजन बरे सुरच्छित रही। ऐंकर पहँटा सीदेन तलक फइला होइ।”

इस्साकर

14“इस्साकर उ गदहा क तरह अहइ जउन बहोत जियादा कठोर काम किहे अहइ। उ भारी बोझ ढोवइ क कारण पस्त पड़ अहइ।

15उ लखी कि ओकरे आराम क जगह अच्छी अहइ। अउर इ कि ओकर भुईया आनन्दायक ह। तब उ भारी बोझा ढोवइ क तइयार होइ। उ गुलाम क रुप में काम करब अंगीकार करी।”

दान

16“दान आपन लोगन क निआव वइसे ही करब्या जइसे इस्राएल क दूसर परिवार क संग करत हीं।

17दान सड़क क किनारे सरप क तरह अहइ। उ रास्ता क लगे ओलरा भवा खौफनाक सरप क तरह अहइ, जउन घोड़न क गोड़न क डसत ह, अउ सवार भुईया प भहराइ पड़त ह।

18“यहोवा, मई मुक्ति क जोहत अहउँ।”

गाद

19“डकुअन क एक ठु गिरोह गाद प हमला करी। मुला गाद ओनका मार भगाई।”

आसेर

20“आसेर क भुईया बहोत बढ़िया उपज देइ। ओका उहइ खइया क मिली जउन राजा लोगन बरे जोगग होइ।”

नप्ताली

21“नप्ताली एक अजाद मादा हिरन क तरह अहइ जेका अजाद कीन्ह गवा ह। उ सुन्नर सब्द कहत ह।”

सीलो एक कठिन इब्रानी सब्द, सम्भवतः एक नाउँ, जेका अरथ होसकत ह, “उहइ एक जेका अधिकार मई अहइ।”

यूसुफ

22“यूसुफ बहोत सुफल अहइ। यूसुफ फलन स लदी भइ गवा क तरह अहइ। उ झरना क लगे जमी अंगूरे क गवा क तरह बाटइ, बाड़ा क सहारे जमी अंगूरे क गवा क तरह अहइ।

23ढेर मिला ओकरे खिलाफ भएन अउ ओसे लड़न। धनुर्धारी मनइयन ओकर दुस्मन होइ गवा।

24मुला उ आपन सक्तीवाला धनुख अउ फुर्तीला बाँहें स जुद्ध जीतेस। उ याकूब क सक्तीवाला परमेस्सर गइरियन, इस्त्राएल क चट्टान, स सक्ती पावत ह।

25अउर आपन पिता क परमेस्सर स सक्ती पावत ह। परमेस्सर तोहका आसीबादि देइ। सर्वसत्कीमान परमेस्सर तोहका आसीबादि देइ। उ तोहका ऊपर स आसीबादि देइ अउर खाले गहिर समुदर स आसीबादि देइ। होइ सकत ह उ तोहका छाती अउ गरभ स आसीबादि देइ।”

26मोरे महतारी-बाप क बहोत स बढ़िया चीजन होत रहिन। अउर मई तोहार पिता बहोत जियादा आसीबादि पावत रहा। अब मई आपन आसीबादि क यूसुफ पइ जमा करब जउन पहाड़ क समान ऊँचा होइ, हाँ ओकरे सिर पइ जेका ओकरे भाईयन स अलगाइ दीन्ह गवा रहेन।”

बिन्यामीन

27“बिन्यामीन एक अइसा भूखा बड़का कूकुर क समान अहइ। जउन भिन्सारे मारत ह ओका खात ह। संझा क उ बचा खुचा स काम चलावत ह।”

28इ सबइ इस्त्राएल क बारह परिवार अहइँ। अउर उहइ चीजन अहइँ जेनका ओनके पिता ओनसे कहे रहा। उ हर एक पूत क उ आसीबादि दिहस जउन ओकरे बरे ठीक रहा। 29तब इस्त्राएल ओनका एक हुकुम दिहस। उ कहेस, “जब मई मरउँ तउ मई आपन लोगन क बीच रहइ चाहत हउँ। मई आपन पुरखन क संग हिल्ली एप्रोन क खेतन क गुफा में दफनावा जाइ चाहत हउँ।

30उ गुफा मग्रे क नगिचे मकपेला क खेते में अहइ। इ कनान देस में अहइ। इब्राहीम उ खेत क एप्रोन स एँह बरे बेसहेस जेहसे ओकरे लगे एक ठु कब्रिस्तान होइ सकइ। 31इब्राहीम अउ ओकर मेहरारु सारा उहइ गुफा में दफनावा गए अहइँ। इसहाक अउ ओकर मेहरारु रिबका उहइ गुफा में दफनाए गएन। मई आपन मेहरारु लिआ क उहइ गुफा में दफनावा। 32उ गुफा उ खेत में अहइ जेका हिल्ली लोगन स बेसहा ग रहा।” 33आपन पूतन स बातन खतम करइ क पाछे याकूब ओलर गवा, गोड़वन क आपन बिछउना प धरेस अउ मरि गवा।

याकूब क आखिरी किरिया करम

50 जब इस्त्राएल मरा, यूसुफ बहोत दुःखी भवा। उ पिता स लपटि गवा, ओह प रोवा अउ ओका चूमेस। 2यूसुफ आपन नउकरन क हुकुम दिहस कि उ पचे ओकरे बाप क लहासे क तइयार करइँ। (इ सबइ नउकर वैदय रहेन।) वैदय लोग याकूब क लहास गाड़इ बरे तइयार किहन। उ पचे मिस्र क लोगन क खास तरीका स लहासे

क तइयार किहन। 3जब मिस्र क लोग खास तरह स लहास तइयार किहन तब ओका गाड़इ क पहिले चालीस दिन तलक जोहेन। ओकरे पाछे मिस्री लोगन दुःख क खास समइ रखेन। इ समइ सत्तर दिन क रहा।

4सत्तर दिन पाछे दुःख क समइ खतम भवा। एँह बरे यूसुफ फिरौम क अफसरन स कहेस, “कृपा कइके फिरौन स इ कहा, 5जब मोर पिता मरत रहेन तब मई ओनसे एक प्रण किहेउँ रहेउँ। मई प्रण किहेउँ रहे कि मई ओनका कनान देस क गुफा में गाड़ब। इ उ गुफा बाटइ जेका उ अपने खातिर बनाएस ह। एँह बरे कृपा कइके मोका जाइ देई अउर हुआँ पिता क गाड़इ देई। तब मई आपक लगे वापिस लउटि आउब।”

6फिरौन कहेस, “आपन प्रतिग्या पूरी करा। जा अउर आपन बाप क गाड़ा।”

7एँह बरे यूसुफ आपन पिता क गाड़इ गवा। फिरौन क सबहिं अफसरन यूसुफ क संग गएन। फिरौन क बुजुर्गन अउ मिस्र क बड़का लोग यूसुफ क संग गएन। 8यूसुफ अउ ओकरे भाइयन क परिवार क सबहिं मनई ओकरे संग गएन अउ ओकर पिता क परिवार क सबहिं लोग भी यूसुफ क संग गएन। सिरिफ बच्चन अउ जनावरन गोसेन पहुँटा में रहि गएन। 9यूसुफ क संग जाइ बरे लोग रथन अउ घोड़न प सवार भएन। इ बहोतइ बड़ा मनइयन क झुण्ड रहा।

10उ पचे गोसन आताद क गएन। जउन यरदन नदी क पूरब में रहा। इ ठउर प इ पचे इस्त्राएल क अखिरी संस्कार किहन। इ सबइ आखिरी संस्कार सात दिन तलक होत रहा।

11कनान क बसइयन गोसन आताद में आखिरी संस्कार क लखेन। उ पचे कहेन, “उ पचे मिस्र क लोग फुरइ बहोतइ दुःख भरा संस्कार करत अहइँ।” एह बरे उ जगह क नाउँ यरदन नदी क पार तलक अब आबेलमिस्त्रैम अहइ।

12इ तरह इस्त्राएल क बेटवन उहइ किहन जउन ओनके पिता हुकुम दिहे रहेन। 13उ पचे ओकरे लहासे क कनान लइ गएन अउ मकपेला क गुफा में ओका गाड़न। इ गुफा मग्रे क निचके उ खेते में रही जेका इब्राहीम हिल्ली एप्रोन स खरीदा हा। इब्राहीम उ गुफा क कबरिस्तान बरे खरीदा रहा। 14यूसुफ क आपन पिता क दफनाइ क पाछे उ, ओकरे भाईयन अउर ओकरे संग झुण्ड क हर एक मनई मिस्र क लौट गवा।

भाई यूसुफ स डेराएन

15याकूब क मरइ क पाछे यूसुफ क भाई चिन्ता में पड़न। उ पचे आपन स कहेन, “होइ सकत ह जउन कछू हम कीन्ह ह ओकरे बरे यूसुफ अब भी हमसे घिना करत ह अउर जउन बुरा काम हम लोगन ओकर संग किहस ह ओकर बदला लेब।” 16एँह बरे भाइयन इ सँदेसा यूसुफ क पठएन:

तोहार पिता मरइ क पहिले हम लोगन क हुकुम दिहे रहा। 17उ कहेस, ‘यूसुफ स कहया कि मई निवेदन करत हउँ कि कृपा कइके उ अपराधे क छिमा कइ देई जउन

उ पचे ओकरे संग किहेन।' ऐह बरे अब हम तोहसे पराथना करित अही कि उ अपराध क छिमा कइ द्या जउ, हम कीन्ह ह। हम लोग सिरिफ तोहरे पिता क परमेस्सर क सेवक अही।

यूसुफ क भाइयन जउन कछू कहेन ओसे ओका बड़ा दुःख भवा अउर उ रोइ पड़ा। 18यूसुफ क भाई ओकरे सामने गएन अउ ओकरे समन्वा निहुरि के पैलगी किहन। उ पचे कहेन, "हम लोग तोहार सेवक होब।"

19तब यूसुफ ओनसे कहेस, "डेराअ जिन मई परमेस्सर नाहीं अहउँ। 20इ फुरइ अहइ कि तू मोका नोस्कान पहुँचावइ बरे योजना बनाए रहा, मुला परमेस्सर फुरइ अच्छी योजना बनवत रहा। परमेस्सर क योजना बहोत स लोगन क जिन्नगी बचावइ बरे मोर प्रयोग करइ क रही अउर आजु भी ओकर इहइ योजना अहइ।

21ऐह बरे डेराअ जिन। मई तू लोगन अउ तोहरे बच्चन क देखरेख करब।" इ तरह, यूसुफ ओनका समझाइ बुझाइ क बात किहस अउ नम्र होइके बोला।

22यूसुफ आपन पिता क परिवार क संग मिस्त्र मँ रहत

रहा। यूसुफ एक सौ दस बरिस होइके मरा। 23यूसुफ क जिन्नगी मँ एप्रैम क पूतन अउ पोतन भएन अउ ओकर पूत मनस्से क एक पूत माकीर नाउँ क भवा। यूसुफ माकीर क बच्चा क लखइ बरे जिअत रहा।

यूसुफ क मउत

24जब यूसुफ मरइ क भवा, उ आपन भाइयन स कहेस, "मोरे मरइ क टेम आइ गवा। मुला मई जानत हउँ कि परमेस्सर तू लोगन क रच्छ करी। उ इ देस स तू लोगन क बाहेर लइ जाइ। परमेस्सर तू लोगन क उ देस मँ लइ जाइ जेका उ इब्राहीम, इसहाक अउ याकूब क देइ क बचन दिहे रहा।"

25तब यूसुफ आपन लोगन क एक प्रण करइ क कहेस। यूसुफ कहेस, "मोसे प्रतिग्या करा कि तब मोर हड्डी आपन संग लइ जाब्या जब परमेस्सर तू लोगन क नवे देस मँ लइ जाइ।"

26यूसुफ मिस्त्र मँ मरा, जब उ एक सौ दस बरिस क रहा। वैद्य लोग ओकरी अर्थी क गाइइ बरे तइयार भएन अउ मिस्त्र मँ ओकरी अर्थी क एक ठु ताबूत मँ धरेन।

License Agreement for Bible Texts

World Bible Translation Center

Last Updated: September 21, 2006

Copyright © 2006 by World Bible Translation Center

All rights reserved.

These Scriptures:

- Are copyrighted by World Bible Translation Center.
- Are not public domain.
- May not be altered or modified in any form.
- May not be sold or offered for sale in any form.
- May not be used for commercial purposes (including, but not limited to, use in advertising or Web banners used for the purpose of selling online ad space).
- May be distributed without modification in electronic form for non-commercial use. However, they may not be hosted on any kind of server (including a Web or ftp server) without written permission. A copy of this license (without modification) must also be included.
- May be quoted for any purpose, up to 1,000 verses, without written permission. However, the extent of quotation must not comprise a complete book nor should it amount to more than 50% of the work in which it is quoted. A copyright notice must appear on the title or copyright page using this pattern: "Taken from the HOLY BIBLE: EASY-TO-READ VERSION™ © 2006 by World Bible Translation Center, Inc. and used by permission." If the text quoted is from one of WBTC's non-English versions, the printed title of the actual text quoted will be substituted for "HOLY BIBLE: EASY-TO-READ VERSION™." The copyright notice must appear in English or be translated into another language. When quotations from WBTC's text are used in non-saleable media, such as church bulletins, orders of service, posters, transparencies or similar media, a complete copyright notice is not required, but the initials of the version (such as "ERV" for the Easy-to-Read Version™ in English) must appear at the end of each quotation.

Any use of these Scriptures other than those listed above is prohibited. For additional rights and permission for usage, such as the use of WBTC's text on a Web site, or for clarification of any of the above, please contact World Bible Translation Center in writing or by email at distribution@wbtc.com.

World Bible Translation Center

P.O. Box 820648

Fort Worth, Texas 76182, USA

Telephone: 1-817-595-1664

Toll-Free in US: 1-888-54-BIBLE

E-mail: info@wbtc.com

WBTC's web site – World Bible Translation Center's web site: <http://www.wbtc.org>

Order online – To order a copy of our texts online, go to: <http://www.wbtc.org>

Current license agreement – This license is subject to change without notice. The current license can be found at: <http://www.wbtc.org/downloads/biblelicense.htm>

Trouble viewing this file – If the text in this document does not display correctly, use Adobe Acrobat Reader 5.0 or higher. Download Adobe Acrobat Reader from: <http://www.adobe.com/products/acrobat/readstep2.html>

Viewing Chinese or Korean PDFs – To view the Chinese or Korean PDFs, it may be necessary to download the Chinese Simplified or Korean font pack from Adobe. Download the font packs from: <http://www.adobe.com/products/acrobat/acrrasianfontpack.html>